

ರೋಮಾಪುರದವರಿಗೆ ಬರೆದ ಪತ್ರಿಕೆ ರೋಮಾಪುರಾತ್‌ಲ್ಯಾನಾ ಲಿವ್‌ಲ್ಯಾಲ ಪತ್ರ ವಳಕ್

ರೋಮಾಪುರಾಲಾ ಲಿವ್‌ಲ್ಯಾಲ ಪತ್ರ ಲ ಕರುನ್ ಆಪೋಸ್ತಲ್ ಜಾಲ್ಯಾಲ್ಯಾ ಪಾಲಾನಿ ಲಿವ್ ಆಸಲ್. ಹ್ಯ ಪುಸ್ತಕ್ ಯೇಸು ಕ್ರಿಸ್ತ ಜಲಾಮಲ್ಯಾ ನಂತರ್ 54-58 ವರ್ಸಾಚೆ ನಂತರ್ ಅಪೋಸ್ತಲ್ ಪಾಲ್ ರೋಮಾತ್ ಗೆಲಾ ನವ್ಲಾ. ಮನ್ವುನ್ ಹ್ಯಾ ಪತ್ರ್‌ಲ್ಯಾನ್ ರೋಮಾತ್ ಆಸ್‌ಲ್ಯಾಲ್ಯಾ ಯೆಹುದಿ ಆನಿ ಯೆಹುದಿ ನಸಲ್ಯಾಲ್ಯಾ ಕ್ರಿಸ್ತ ಲೋಕಾನಾ ದಿಲ್ಯಾ ಹ್ಯ ಪತ್ರ ಕೊರಿಂಥ ಪೆರತ್ಲಿಲಿವ್ ತವಾ ತ್ಯೊತಿಥ ಹುತ್ತಾ. ಪಾಲಾನಿ ಲಿವ್ಲ ಕಾ ಮಂಜೆ ಸಗ್ಳಿ ದುನ್ಯಾ ಯೆಸುವ ಇಸ್ವಾಸ್ ಥೆವಾಯಾ ಆನಿ ಪಾಳಾಯಾ ವ್ಹಯಿ ಮನ್ವುನ್ 16:26

ರೋಮಾಪುರಾತ್‌ಲ್ಯಾನಾ ಲಿವ್‌ಲ್ಯಾಲ ಹ್ಯ ಪತ್ರ ಸಗ್ಳ್ಯಾ ಕ್ರಿಸ್ತಾನಾ ಖುಬ್ ಆವಶ್ ಹಾ ಸಗ್ಳಿಕ್ ಆನಿ ಸಗ್ಳ್ಯಾಯೆಳಾತ್. ಕಾ ಮಂಜೆ ಪಾಲಾನಿ ಯೇಸು ಕ್ರಿಸ್ತಾಸ್ ಲಾಗುನ್ ಆಮಿ ರಕ್ತನೆ ಗಿಹ್ಯಾ ವ್ಹಯಿಲ್ ಮನ್ವುನ್ ಚಾಂಗ್ಲ ಆನಿ ಶಾರ್ಕ್ ಫುಡುನ್ ಸಾಂಗಲ್ಯಾ ಪಾಲಾನಿ ಯೇಸು ಕ್ರಿಸ್ತಾಚಿ ಬರಿ ಖಬರ್ ಜುನ್ಯಾ ಕರಾರಾಲಾ ಮಿಳಿವ್ಲೆ ಕಿತಿಕಿ ವಿದ್ವಾಂಸಾಂಚಾನಿ ಹ್ಯಾ ಪತ್ರಲ್ಯಾಚ್ ಮುಖ್ಯ ವಚನ್ 1:16 ಮನ್ವುನ್ ಸಾಂಗ್‌ಲ್ಯಾ ಹ್ಯ ವಚನ್ ಆಸ ಸಾಂಗತ ಪೂರ್ನ್ ಆತ್ಮಾ ಇಸ್ವಾಸ್ ಹಾ ಕಾ ಮಂಜೆ ತ್ಯೆಹುದಿ ಆನಿ ಯೆಹುದಿ ನಸಲ್ಯಾಲ್ಯಾನಾ ತ್ಯೆಚಾತ್ ಇಸ್ವಾಸ್ ಥೆವತ್ಯಾಲ್ಯಾ ಸಗ್ಳ್ಯಾನಾ ರ್ಲ್ಯಾಕ್‌ತ್ಯಾಲ ಬಳ್ ಜಾಲೆ.

ಪೈಲಾ ಭಾಗ್ ರೋಮ್ 1—12 ಖೊಲ್‌ಜಾಲ್ಯಾಲ ದೈವಿಕ್ ಶಾಸ್ತರ್ ಜಾಲ್ಯಾ ದೊನ್ವಾ ಭಾಗ್ 13—15 ಕ್ರಿಸ್ತಾಚಾ ಜಿವ್ನಾ ಚಾಲ್ವಾಯಾ ವ್ಹಯಿಜಾಲ್ಯಾಲ್ಯಾ ಸಲಹ್ಯಾ ದಿಲ್ಯಾ

ಹ್ಯಾ ಪತ್ರ್‌ಲ್ಯಾತ್ಲೆ ಗುಪ್ತಚ ಭಾಗ್

- 1) ಪೌಲ್ ಪತ್ರ ಲಿವ್ತಾನಾ ಆಂದಿ ಕವಾಬಿ ತ್ಯಚಿ ವಳಕ್ ಕರ್ತೊ ಆನಿ ಕುನಾಲಾ ಲಿವ್‌ಲ್ಯಾ ಮನ್ವುನ್ ಚಾಲು ಕರ್ತೊ.1:1-15
- 2) ಮಂಗ್ ಮಾನುಸ್ವನಾಚಿ ಸ್ಥಿತಿ ಆನಿ ಯೇಸು ಕ್ರಿಸ್ತಾಸ್ಲಾಗುನ್ ರಕ್ಷಣೆ ವ್ಹಯಿಲ್ ಮನ್ವುನ್ ಚಾಲು ಕರ್ತೊ.1:16—11:36
- 3) ಮಂಗ್ ಕ್ರಿಸ್ತಾಚಾ ಜಿವ್ವಾಚಾಲವಾಯಾ ವ್ಹಯಿ ಜಾಲ್ಯಾಲ್ಯಾಸಲಹ್ಯಾ ದೆತೊ. 12:1-15-13
- 4) ತ್ಯೊ ರೋಮಾತ್ ಆಸಲ್ಯಾಲೆ ಸಬೆಚಾ ಲೋಕಾನಾ ನಮಸ್ಕಾರ್ ಸಾಂಗಿತ್ ಹ್ಯ ಪುಸ್ತಕ್ ಸಪಿವ್ತೊ.16

¹ ಕ್ರಿಸ್ತ ಯೇಸುಚಾ ಸೇವಕ್ ಜಾಲ್ಯಾಲಾ ಪೌಲ್ ಲಿವ್‌ತ್ಯಾಲ ಪತ್ರ.

ದೇವಾನಿ ಮನಾ ಅಪೋಸ್ತಲ್ ವ್ಹಯಾಲಾ ಹಾಕಟ್ಲೆ, ದೇವಾಚಿ ಬರಿ ಖಬರ್ ಸಗ್ಳ್ಯಾ ಲೋಕಾನಾ ಸಾಂಗಾಯಾಸಾಟಿ ಮನಾ ನಿವಡ್‌ಲ್ಯಾ.

² ದೇವಾನಿ ಆಪ್‌ಲ್ಯಾ ಲೋಕಾನಾ ಹಿ ಬರಿ ಖಬರ್ ದಿಯಾಲಾ ಖುಬ್ ಕಾಲಾಚೆ ಮಾಗ ಆಪ್‌ಲ್ಯಾ ಪ್ರವಾದಿಂಚಿಪಿ ಪವಿತ್ರ ಪುತಿಕಾತ್ ಸಬ್ದ ದಿಲ್ತಾ.

³ ತ್ಯೊ ದೇವಾಚಾ ಲ್ಯೊಕ್ ಆಮಚಾ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಚಿ ಗ್ಯೊಶ್ಟುಸ್ ಜಾಲೆ. ಮಾನ್ಸಾಚಾ ರುಪಾತ್ ತ್ಯೊ ದಾವಿದಾಚಾ ಕುಟ್ಮಾತ್ ಜಲಾಮ್‌ಲ್ಯಾಲಾ.

⁴ ಫನ್ ಪವಿತ್ರ ಆತಮ್ಯಾಚಾ ಬಳಾನಿ ಮೇಲ್ಯಾಲ್ಯಾತ್ಲಿ ಜೀತ್ತಾ ವ್ಹಪುನ್ ಉರುನ್ ಯವುನ್ ಹ್ಯಲಾ ದೇವಾಚಾ ಲ್ಯೊಕ್ ಮನ್ವುನ್ ದಾವುನ್ ದಿಲ, ಹ್ಯೊಸ್ ಆಮಚಾ ಪ್ರಭು ಯೇಸು ಕ್ರಿಸ್ತ ಜಾಲ್ಯಾ.

⁵ ತ್ಯಚಿಸ್ ಲಾಗುನ್ ದೇವಾನಿ ಮನಾ ಕ್ರಿಸ್ತಾಸಾಟಿ ಅಪೋಸ್ತಲ್ ವ್ಹಯಾ ಕ್ರಪಾ ದಿಲೆ. ಹ್ಯಚಿಸ್ ಲಾಗುನ್ ಸಗ್ಳೆ ದುನೆತಲ್ಯಾ ಲೋಕಾನಾ ತ್ಯಚಿ ಆಜ್ಞಾ ಪಾಳಾಯಾ ಆನಿ ತ್ಯಚಿವ ಇಸ್ವಾಸಾತ್ ಆನಾಯಾ ವ್ಹಯಿಲ್,

⁶ ರೋಮಾಪುರಾತ್ ಆಸ್‌ಲ್ಯಾಲಿ ತುಮಿ ಸಾಹಿತ್ ಮಿಳುನ್ ಯೇಸು ಕ್ರಿಸ್ತಾಚಿ ವ್ಹಯಾಲಾ ದೇವಾನಿ ಹಾಕಟ್‌ಲ್ಯಾತ.

7 ಆನಿ ರೋಮಾತ್ ಆಸ್‌ಲ್ಯಾಲ್ಯಾ ತುಮಾನಾ ಸಗ್‌ಳ್ಯಾನಾ ಲಿವ್‌ತ್ಯೊ ದೇವ್ ತುಮ್ಮಿ ಮಾಯಾ ಕರ್ತೊ ಆನಿ ಆಪ್ಲಿ ಸ್ವತಾಚಿ ಲೋಕ ವ್ಹಯಾಲಾ ಹಾಕಟ್‌ಲ್ಯಾತ:

ಆಮಚಾ ಬಾ ಭಾಲ್ಯಾಲ್ಯಾ ದೇವಾಪ್ಲಿ ಪ್ರಭು ಭಾಲ್ಯಾಲ್ಯಾ ಯೇಸು ಕ್ರಿಸ್ತಾಪ್ಲಿ ತುಮಾನಾ ಕ್ರಪಾ ಶಾಂತಿ ವ್ಹವುನಿ.

ದನ್ಯವಾದಾಚ್ ಮಾಗ್ತು

8 ಆಂದಿ, ತುಮಚಾ ಇಸ್ವಾಸ್ ದುನೆತ್ ಸಗ್‌ಳೆ ಮೊರ್ಟ್ ಆಲಾ ಮನ್ವುನ್ ತುಮಚೆ ಸಗ್‌ಳ್ಯಾಂಚೆಸಾಟಿ ಯೇಸು ಕ್ರಿಸ್ತಾಪ್ಲಿ ಮಾಜಾ ದೇವಾಲಾ ದನ್ಯವಾದ್ ಸಾಂಗ್ತೊ.

9 ಮಿ ಮಾಗ್ತು ಕರ್ತಾನಾ ಖಾಯಿಮ್ ತುಮಚಿಸಾಟಿ ಇನಂತಿ ಕರ್ತೊ. ದೇವಾಚಾ ಲೇಕಾಚಿ ಬರಿ ಖಬರ್ ಸಾಂಗಿತ್ ದೇವಾಚಿ ಸೆವಾ ಮಾಜಾ ಮನಾನಿ ಕರ್ತೊ ಹ್ಯಾಲಾ ದೇವುಸ್ ವಳಕ್ ಭಾಲ್ಯಾ.

10 ಮಾಜಾ ಮಾಗ್‌ನ್ಯಾತ್ಲಿ ಮೀ ಪರತೇಕ್ ಪಾವ್ಲಿ ದೇವಾಪ ಮಾಗಾಚ್ ಕ್ಯಾ ಮಂಜೆ ದೇವ್ ಆಪ್‌ಲ್ಯಾ ಮನಾಚೆಗತ್ ಆತಾತರಿ ತುಮಾನಾ ಬೇಟ್ ವ್ಹಯಾ ದಿವುನಿ.

11 ಮಿ ಖುಬ್ ಮನ್ ಕರ್ತೊ ಕಾ ಮಂಜೆ ಮಿ ತುಮಾನಾ ಬೇಟ್ ವ್ಹವುನ್ ಥೊಡಾ ಆಶಿರ್ವಾದ್ ದಿಯಾ ಹ್ಯಚಿಸ್ ಲಾಗುನ್ ಬಳ್ ಗೆತಲ್ಯಾಲಿ ವ್ಹವಾ.

12 ಮೀ ಸಾಂಗಾಚ್ ಕ್ಯಾ ಮಂಜೆ, ಮಿ ತುಮ್ಮಿಪ ಯತಾನಾ ಮಾಜಾ ಆನಿ ತುಮ್ಮಾ ಇಸ್ವಾಸಾನಿ ಆಮಿ ಯಕಾಮಕಾಲಾ ಮಜತ್ ಕರಾಯಾ ವ್ಹಯಿ.

13 ಬಾವ್ತಾಂಡಾನು, ಹ್ಯ ತುಮಾನಾ ಯಾದ್ ರಾಹುನಿ ಖುಬ್ ಪಾವ್ಲಿ ಮಿ ತುಮಾನಾ ಬೇಟ್ ವ್ಹಯಾ ಯವಜ್ನಾ ಕೆಲೆ. ಫನ್ ಕ್ಯಾಯಾಕ್ ಮನಾ ತಸ ಕರಾಯಾ ಥಾಂಬಿತ್ಯಾ ದುಸರ್‌ಲ್ಯಾ ಲೋಕಾಪ್ಲಿ ಮೀ ಜಿತ್‌ಲ್ಯಾಚೆಗತ್ ತುಮ್ಮಿಪ ಸಾಹಿತ್ ಮಿ ಫಳ್ ಜಿತ್ತಾಯಾ ಮನ್ ಕರ್ತೊ.

14 ಮೀ ಗ್ರೀಕಾಂಚೆ ಆನಿ ಗ್ರೀಕ್ ನಸ್‌ಲ್ಯಾಲ್ಯಾಂಚೆ, ತಸ ಶಾನ್ಯಾಂಚೆ ಆನಿ ಬುದ್ಧಿ ನಸ್‌ಲ್ಯಾಲ್ಯಾಂಚೆ ಸೇವೆಚ್ ವಜ್ಜ ಮಾಜಿವ ಹಾ.

15 ಮನ್ವುನ್ ರೋಮಾತ್ ಆಸ್‌ಲ್ಯಾಲ್ಯಾ ತುಮಾನಾಬಿ ಬರಿ ಖಬರ್ ಸಾಂಗಾಯಾ ಖುಬ್ ಉಮೇದಿನಿ ಹಾ.

ಬರೆ ಖಬರಿಚ್ ಬಳ್

16 ಬರೆ ಖಬರಿಚಿ ಗುಶ್ಟಿತ್ ಮಿ ಲಾಙ್ ನಾಹಿ. ತಿ ಖಬರ್ ಆಂದಿ ಯಹುದ್ಯಾನಾ ಮಂಗೆ ಗ್ರಿಕಾನಾ ಆನಿ ಇಸ್ವಾಸ್ ಥೆವ್‌ತ್ಯಾಲ್ಯಾ ಸಗ್ಳ್ಯಾನಾ ರ್ಯಾಕ್‌ತ್ಯಾ ದೇವಾಚ್ ಬಳ್ ಜಾಲ್ಯಾ.

17 ಕಸ ಮಂಜೆ ದೇವಾಪ್ನಿ ಗಾವಲ್ಯಾಲಿ ನಿಯೆತ್ ಬರೆ ಖಬರಿತ್ ದಿಸುನ್ ಯತಿ. ಪವಿತ್ರ ಗ್ರಂಥಾತ್ ಆಸ ಲಿವ್‌ಲ್ಯಾ “ನಿಯತಿಚಾ ಇಸ್ವಾಸಾನಿ ಜೀವ್ಣಾ ಕರ್ನಾರ್. ” * ತಿ ನಿಯೆತ್ ಇಸ್ವಾಸಾಚ್ ಫಳ್ ವ್ಹಪುನ್ ಇಸ್ವಾಸ್ ಬಳ್ಳಟ.

ಮಾನ್ಸಾಚಾ ಕುಳಾತ್ಲಾ ಅಪರಾದ್

18 ಸಗ್ಳೆ ಪಾಪಿ ಆನಿ ಬುರ್ಸ ಲೋಕ್ ಬುರ್ಶಾ ಫನಾನಿ ಖರ ಜಾಕತ್ಯಾತ್ ತ್ಯಂಚಿವ ದೇವಾಚಾ ರಾಗ್ ಸ್ವರ್ಗಾತ್ಲಿ ಉತರುನ್ ಯನಾರ್.

19 ಕಾ ಮಂಜೆ ದೇವಾಚಿ ಗುಶ್ಟಿತ್ ವ್ಹಯಿಲ್ ತ್ಯವ್ ತ್ಯನಾ ಶಾರ್ಕ ರಾವ ಹಾ. ಕಾ ಮಂಜೆ ದೇವಾನಿಸ್ ತ್ಯನ್ಯಾ ಶಾರ್ಕ ಆಪ್ಲೆ ಗುಶ್ಟಿತ್ ಸಾಂಗ್‌ಲ್ಯಾ.

20 ಕಸ ಮಂಜೆ ಡೊಳ್ಳಾನಾ ದಿಸನಸ್ಸಾರ ತ್ಯಚ್ ಗುನ್ ಶಾಸ್ವತ್ ಬಳ್ ಆನಿ ದೈವಿಕ್ ಸ್ವಭಾವ್ ದುನ್ಯಾ ಉತ್ಪನ್ ಕೆಲ್ಯಾಲೆದರ್ನಿ ತ್ಯನಿ ಉತ್ಪತ್ತಿ ಕೆಲ್ಯಾಲ್ಯಾ ಸಗ್ಳ್ಯಾ ಸಾಮಾನಾನಿ ಹ್ಯ ಸಗ್ಳೆ ಬಗ್ತಾವ್ ಹ್ಯಚಿ ಸಾಟಿ ತ್ಯಾ ಲೋಕಾಂಚಿಪ ಕಳಾ ನೇವಾ ರಾಹಿತ್ಯಾಹಿ.

21 ಕಾ ಮಂಜೆ ಲೋಕಾನಾ ದೇವ್ ಸಮಾಜ್ಲಾತರಿ ದೇವಾಲಾ ಮಹಿಮೆ ಕಿಲಿನಾಹಿ, ತ್ಯಲಾ ಮರ್ಯಾದ್ ನಾಹಿತ ಉಪ್ಕಾರ್ ದಿಲಾನಾಹಿ. ಲೋಕಾಂಚಿ ಯವಜ್ಞಾ ಫುಕಟ್ ಜಾಲಿ. ಬುದಿ ನಸಲ್ಯಾಲಿ ತ್ಯಂಚಿ ಮನ ಆಂದಾರ್ ಜಾಲ್ಯಾತ್.

22 ತೀ ಲೊಕ ಆಪ್‌ಲ್ಯಾಲ್ಯಾ ಶಾನಿ ಮನ್ವುನ್ ಗೆಡ್ಯಾತ್ ಫನ್ ತೇ ಮುರ್ಕ್ ಜಾಲ್ಯಾತ್.

* 1:17 ಹಬ 2:4

23 ನಾಸ್ ವ್ಹಯಾಂಚೆ ಅಂದಿ ಆಸ್‌ಲ್ಯಾಲ್ಯಾ ದೇವಾಚಿ ಮೈಮಾ ತ್ಯಂಚಾನಿ ನಾಸ್ ವ್ಹನಾರ್ಯಾ ಮಾನ್ಸಾಂಚಾ, ಪಾಕ್ರಾಂಚಾ, ಭನಾವಾರಾಂಚಾ ಸರ್ಪಾಟ್ಕಾನಿ ಭಾತ್ಯಾಲ್ಯಾ ಭನಾವಾರಾಂಚಿ ಪಾಶಾನ ಕರುನ್ ತ್ಯನಾ ವವ್ಯಾಳಾಯಾ ಲಾಗಿತ್.

24 ಮನ್ವುನ್ ತ್ಯಂಚಾನಿ ಮನಾತ್ಲೆ ಬುರಸ್ ಆಸೆಂಚೆಗತ್ ಚಾಲುನ್ ಆಪ್ಲಿ ಆಪ್ಲಿ ಶರೀರ ಆಪಲ್ಯಾತುಸ್ ಮರ್ಯಾದ್ ಕಾಡುನ್ ಗಿಹುನ್ತ ಮನ್ವುನ್ ದೇವಾನಿ ತ್ಯನಾ ಬುರ್ಶಾ ಕಾಮಾನಾ ಥರಿವ್ಲಿತ.

25 ತ್ಯಂಚಾನಿ ಖರ್ಯಾ ದೆವಾಲಾ ಸುಡುನ್ ಲಬಾಡಾಲಾ ದರಲ್ವುನ್; ಸ್ರಶ್ಟಿ ಕೇಲ್ಯಾಲ್ಯಾ ದೆವಾಲಾ ಸುಡುನ್ ತ್ಯನಿ ಸ್ರಶ್ಟಿ ಕೇಲ್ಯಾಲೆ ಸ್ರಶ್ಟಿಚಿ ಪುಜಾ ಕರುನ್ ವವ್ಯಾಳಾಯಾ ಲಾಗಿತ್. ಫನ್ ಸ್ರಶ್ಟಿ ಕೇಲ್ಯಾಲಾ ದೇವ್ ಖಾಯಿಮ್ ವವ್ಯಾಳುನ್ ಗೆನ್ನಾರ್. ಆಮೇನ್.

26 ತ್ಯಂಚಾನಿ ತಸ ಕೇಲ ಮನ್ವುನ್, ದೇವಾನಿ ತ್ಯನಾ ಲಾಭಚಾ ಕಾಮಾನಾ ಸುಡುನ್ ದಿಲಿತ. ತ್ಯಂಚಾ ಬ್ಯಾಯ್ಕಾ ಸಾಹಿತ್ ಸಬಾವಾಚೆ ಶಾರಿಕ್ ಸಂಬಂದ್ ಸುಡುನ್ ಸಬಾವಾಚೆ ಬಾಹಿರ್ಲಿ ಕಾಮ ಕರಾಯಾ ಲಾಗಲ್ಯಾ.

27 ತಸಸ್, ಗಡಿಬಿ ಬ್ಯಾಯ್ಕಾಂಚಿ ಸಂಗ ಶಾರಿರಿಕ್ ಸಂಬಂದ್ ಕರಾಚೆ ಸುಡುನ್ ಆಪಲ್ಯಾ ಆಪಲ್ಯಾತುಸ್ ಸಲಿಂಗಕಾಮಿ ಜಾಲ್ವಲಾಭಗಿಡೆ ಜಾಲ್ವ ಆಪ್ಲೆ ಬುರ್ಶೆ ಚಾಲ್ತುಕಿಲಾ ಶಾರ್ಕಿ ಸಿಕ್ಷಾ ತೆ ಆಪ್ಲಿವ ಗೆಥ್ಯಾತ್.

28 ಕಾ ಮಂಜೆ ದೇವಾಚೆ ಖರ ಗಿನ್ಯಾನ್ ಗಿಹ್ಯಾಲಾ ತ್ಯಂಚಾನಿ ನಕಾರ್ ಕೇಲಾ. ತ್ಯನಾ ಮನ್ ನವ್ಲ ಮನ್ವುನ್ ದೇವಾನಿ ತ್ಯನಾ ತ್ಯಂಚಾ ಬುರ್ಶಾ ಮನಾಲಾ ವಪ್ಸುನ್ ದಿಲಿತ. ಮನ್ವುನ್ ತೀ ಆಪ್ಲು ಕರು ನಾಹಿ ತಿ ಕಾಮ್ ಕರ್ತಾತ್.

29 ತೀ ಸಗ್ಳೆ ತರಚಾ ಬುರ್ಶಾ ಫನಾನಿ ಬರ್ಲ್ಯಾಲಿ ಹಾತ್ತ , ರಾಗ್ , ಖೊಟಫನ್ ಖುನ್ , ಮಾರಾಮಾರ್ಯಾ ನಿಯತ್ ನಸ್‌ಲ್ಯಾಲಿ, ಮೊಸ್, ಹಗೆತನಾನಿ ಬರ್ಲ್ಯಾಲಿ ಹಾತ್ತ. ಚಾಡಿ ಸಾಂಗ್‌ತ್ಯಾಲಿ.

30 ಆನಿ ದುಸ್ಮಾರ್ಯಾಂಚೆ ಗುಶ್ಟಿತ್ ಬುರ್ಸ ಬೊಲಾಚೆ, ದೇವಾಚಾ ಇರೊದ್ ಕರ್ತಾತ್. ದಿಮಾಕಾಚಿ, ಗರ್ವಿಚಿ, ಆನಿ ಆಪ್ಲೆ ಗುಶ್ಟಿತ್

ಬಡಾಯಾ ಸಾಂಗ್‌ತ್ಯಾಲಿ ಜಾಲ್ಯಾತ. ತೀ ಬುರ್ಸಿ ಕಾಮ ಕರಾಯಾ ಖುಬ್ ವಾಟಾ ಶೊತ್ಯಾತ ತೀ ಆಪಾಲೆ ಆಯಿಬಾಲಾ ಏಕತ್ ನಸ್‌ಲ್ಯಾಲಿ.

31 ತೇ ಸಮಜುತ್ ನಸ್‌ಲ್ಯಾಲ ಸಾಂಗ್‌ಲ್ಯಾಲ್ಯಾ ಸಬ್ಬಾಚೆಗತ್ ಕರಿನಸ್ವಾರ ಆನಿ ತೀ ದುಸ್‌ರಾಂಚಿವ ದಯಾ ಮಾಯಾ ಕರ್ನಾ ನಸ್ವಾರಿ ಜಾಲ್ಯಾತ.

32 ಆಸ್‌ಲ್ಯಾನಾ ಮರ್ನಾಚಿ ಶಿಕ್ಯಾ ವ್ಹಯಾ ವ್ಹಯಿ ಮನ್ವುನ್ ದೇವಾಚ್ ಧರ್ಮಶಾಸ್ತ್ರಾರ್ ಸಾಂಗ್ತ ಮನ್ವುನ್ ತ್ಯನಾ ರಾವ ಹಾ. ತರೀಬಿ ತೀ ಆಸ್ಲಿ ಕಾಮ ಕರಿತ್ ರಾಧ್ಯಾತ ಆನಿ ಆಸ್ಲಿ ಕಾಮ ಕರಾಯಾ ದುಸ್‌ರಾಂಚಿನಾ ಉಮೆದ್ ದೇತ್ಯಾತ.

2

ದೇವಾಚಾ ತೀರ್ಮಾನ್

1 ಮನ್ವುನ್ ದುಸ್‌ರಾಂಚಿ ಭುಕ್ ಶೊತ್ಯಾಲಾ ತು ಕೊನ್ ಆಸಲಾಸ್ ತರಿ ತುಜಿ ಭುಕ್ ಮಾಪ್ ವ್ಹನಾರ್ ನಾಹಿ. ಕಾ ಮಂಜೆ ತು ದುಸ್‌ರಾಂಚಾ ನ್ಯಾಯಿ ತಿರ್ಮಾನ್ ಕರ್ತಾನಾ ತ್ಯಂಚಾನಿ ಕೆಲ್ಯಾಲಿ ಭುಕ್ ತು ಕರ್ತೊಸ್ “ಆನಿ ಯಕಾಪ ಭುಕ್ ಸುದುನುಸ್ ತು ಗುನ್ನದಾರ್ ಜಾಲ್ಯಾಸ್.

2 ಭುಕ್ ಕರ್ತಾಲ್ಯಾ ಲೋಕಾನಾ ದೇವ್ ತಿರ್ಮಾನ್ ಕರ್ತೊ. ತ್ಯಚಾ ತಿರ್ಮಾನ್ ಖರಾ ಮನ್ವುನ್ ಆಮಾನಾ ರಾವಾ ಹಾ.

3 ಫನ್ ದುಸ್‌ರಾಂಚಿನಾ ತಿರ್ಮಾನ್ ಕರ್ತಾಲ್ಯಾ ತು ದೇವಾಚಾ ತಿರ್ಮಾನಾತ್ಲಿ ಭುಕ್ವುನ್ ಗಿಹಿನ್ ಮಂಥೊಸ್ ಕ್ಯಾ?

4 ನಾಹಿತ ತ್ಯಚಿ ಮುಟಿ ಕರುನಾ ಥಂಢ್ಯನ್ ಸುಸಿವ್ವ ತುಮಿ ಬಾರಿಕ್ ಸಮಜುನ್ ಗೆಥಾಸಾ ಕ್ಯಾ. ಖರಾಂನಿಸ್ ದೇವ್ ಕರುನಾಮಯಿ ಮನ್ವುನ್ ತುಮಾನಾ ರಾವಾ. ಕಾ ಮಂಜೆ ತ್ಯೊ ತುಮಚಿ ಮನ ಬದ್ಲಾಯಾಸಾಟಿ ಯತ್ನ ಕರ್ತೊ.

5 ಫನ್ ತುಮಿ ಘಟ್ ಮನಾಚ್ ಆನಿ ಮೊಚ್ಲಾಟ್ ಜಾಲ್ಯಾಸಾ. ಮನ್ವುನ್ ತುಮಾನಾ ಯತ್ಯಾಲಿ ಶಿಕ್ಯಾ ತುಮಿ ಖುಬ್ ಖುಬ್ ಕರುನ್ ಗೆಥಾಸಾ. ದೇವ್ ಆಪ್ಲಾ ರಾಗ್ ದ್ಯಾವ್‌ತ್ಯಾಲ್ಯಾ ದಿಸಾತ್ ತುಮಾನಾ ತೀ ಶಿಕ್ಯಾ

ವ್ಹನಾರ್. ತ್ಯಾ ದೀಸಾತ್ ದೇವಾಚಾ ನ್ಯಾಯಾಚಾ ತಿರ್ಮಾನ್ ಲೋಕ ಬಗ್ಸಾರ್.

⁶ ಕಾ ಮಂಜೆ ದೇವ್ ಪರತೇಕಾಲಾ ತ್ಯಂಚಾ ಕಾಮಾ ಶಾರ್ಕ್ ಪ್ರತಿ ಫಳ್ ದೇನಾರ್.

⁷ ಥುಡಿ ಲೋಕ ಚಾಂಗ್ಲ ಕರ್ತ್ಯಾತ ಆನಿ ಮೈಮಾ ಮರ್ಯಾದಿಸಾಟಿ ಆನಿ ಶಾಸ್ವತ್ ಜೀವ್ನಾ ಶೋತ್ಯಾತ ತ್ಯನಾ ದೇವ್ ಶಾಸ್ವತ್ ಜೀವ್ ದೇನಾರ್.

⁸ ಫನ್ ಬಾಕಿಚಿ ಲೋಕ ಆಪಲ್ಯಾಚಿಗತ್ ವ್ಹವುನಿ, ಖರ್ಯಾನಿ ಚಾಲಾಚೆ ಆಂದಿ ಬುರ್ಸ ಕರತ್ಯಾಲಿ ಚಾಲ್ಯಾತ. ತ್ಯಂಚಿವ ದೇವಾಚಾ ರಾಗ್ ಆನಿ ರೋಸ್ ಯನಾರ್.

⁹ ಬುರ್ಸ ಚಾಲಿವತ್ಯಾಲ್ಯಾ ಪರತೇಕ್ ಮಾನ್ಸಾಲಾ ಮಂಜೆ ಆಂದಿ ಯಹುದ್ಯಾನಾ, ತ್ಯಾ ನಂತರ್ ಯೆಹುದಿ ನಸ್ಲ್ಯಾಲ್ಯಾನಾ ಸಾಹಿತ್ ಕಶ್ಟ್ ಆನಿ ದುಖ ರಾಢ್ಯಾತ.

¹⁰ ಫನ್ ಚಾಂಗ್ಲ ಕರ್ತ್ಯಾಲ್ಯಾ ಪರತೇಕಾಲಾ ಮಂಜೆ ಆಂದಿ ಯಹುದ್ಯಾನಾ, ನಂತರ್ ಯೆಹುದಿ ನಸ್ಲ್ಯಾಲ್ಯಾನಾ ಸಾಹಿತ್ ದೇವ್ ಮೈಮಾ, ಮರ್ಯಾದ್ ಆನಿ ಥಂಡ್ವನ್ ದೇನಾರ್.

¹¹ ಕಾ ಮಂಜೆ ದೇವ್ ಪರತೇಕಾಲಾ ಯೆಹುಸ್ ತರನಿ ನ್ಯಾಯಿ ತಿರ್ಮಾನ್ ದೇನಾರ್.

¹² ಯೆಹುದಿ ನಸ್ಲ್ಯಾಲ್ಯಾನಾ ಮೊಶೆಚಾ ನೇಮ್ ನವ್ವ ತೀ ಲೋಕ ಮೊಶೆಚಾ ಧರ್ಮಶಾಸ್ತ್ರಾರಾತ್ನಿ ಬಾಹಿರ್ ರಾಹುನ್ ಪಾಪ ಕರ್ತ್ಯಾತ. ಯಹುದ್ಯಾಂಚಿಪ ಧರ್ಮಶಾಸ್ತ್ರಾರ್ ಹಾ ತೇ ಪಾಪ್ ಕರ್ತ್ಯಾತ ಆನಿ ತ್ಯನಾ ಧರ್ಮಶಾಸ್ತ್ರಾರಾ ಶಾರ್ಕ್ ನ್ಯಾಯಿ ತೀರ್ಮಾನ್ ವ್ಹನಾರ್.

¹³ ಕಾ ಮಂಜೆ ಧರ್ಮಶಾಸ್ತ್ರಾರ್ ಐಕ್ಲ್ಯಾಲಿ ಲೋಕ ದೇವಾಚೆ ನದ್ರಲಾ ನೀಯತಿಚಿ ವ್ಹಯಿತ್ಪಾಹಿತ. ಧರ್ಮಶಾಸ್ತ್ರಾರ್ ಸಾಂಗ್ತ್ಯಾಲ್ಯಾ ಶಾರ್ಕ್ ಚಾಲತ್ಯಾಲಿ ಲೋಕ ನೀಯತಿಚಿ ವ್ಹತ್ಯಾತ.

¹⁴ ಯೆಹುದಿ ನಸ್ಲ್ಯಾಲ್ಯಾಂಚಿಪ ಧರ್ಮಶಾಸ್ತ್ರಾರ್ ನವ್ವ. ಫನ್ ತ್ಯ ಧರ್ಮಶಾಸ್ತ್ರಾರ್ ಸಚ್ಚಾವರಿ ಪ್ಯಾಳ್ತ್ಯಾತ. ತ್ಯನಾ ಧರ್ಮಶಾಸ್ತ್ರಾರ್ ನಸ್ಲತರಿ ತ್ಯಂಚ ಮನುಸ್ ತ್ಯನಾ ಧರ್ಮಶಾಸ್ತ್ರಾರ್ ವ್ಹತ್.

15 ತ್ಯಂಚ್ ಚಾಲ್ನ ತ್ಯಂಚಾ ಮನಾತ್ ದರ್ಮಶಾಸ್ತ್ರಾರಾಚಾ ಆಜ್ಞಾ ಲಿವ್‌ಲ್ಯಾತಾ ಮನ್ವನ್ ದಾವುನ್ ದೆತ. ತ್ಯಂಚಾ ಮನಾಚಾ ಸಾಕ್ಷಿ ಸಾಹಿತ್ ಹ್ಯೆ ಖರ ಮನ್ವನ್ ದಾವುನ್ ದೆತ್ಯಾತಾ ಕಾ ಮಂಜೆ ಥೊಡೆ ಪಾವ್ಟಿ ತ್ಯಂಚಾ ಯೆವಜ್ಞಾ ತೆ ಚುಕ್ ಕರ್ತಾತ ಆನಿ ಚುಕ್ ಕರಿತ್ನಾಹಿತ ಮನ್ವನ್ ದಾವುನ್ ದೆತ.

16 ಮಾನ್ಸಾಚಾ ಮನಾತ್ ಆಸ್‌ಲ್ಯಾಲ್ಯಾ ಗುಪ್ತಿ ದೇವ್ ತೀರ್ಮಾನ್ ಕರಾಚಾ ದಿಸಾತ್ ಹ್ಯೆ ಸಗ್ಳೆ ಘಡ್ತಾರ್. ದೇವ್ ಯೇಸು ಕ್ರಿಸ್ತಾಸ್ ಲಾಗುನ್ ಲೋಕಾನಾ ತೀರ್ಮಾನ್ ಕರ್ನಾರ್ ಮನ್ವನ್ ಬರಿ ಖಬರ್ ಸಾಂಗ್ತೆ. ಮೀ ಲೋಕಾನಾ ಸಾಂಗಾಚ್ ಕ್ಯಾ ಮಂಜೆ ತೀ ಬರಿ ಖಬರುಸ್.

ಯೆಹುದಿ ಆನಿ ಮೊಶೆಚಾ ನೇಮ್

17 “ಫನ್ ತು ತುಲಾಸ್ ಯೆಹುದಿ ಮನ್ವನ್ ಗಿಹ್ಯಾಚ್ ಜಾಲ್ಯಾವ ಮೊಶೆಚಾ ನೆಮಾಚಾ ಆದಾರ್ ಕರುನ್ ದೇವಾವ ಬಡಾಯಿ ಸಾಂಗ್ತೊಸ್.

18 ತುಮಿ ಕ್ಯಾ ಕರಾಯಾ ವ್ಹಯಿಸಾ ಮನ್ವನ್ ದೇವಾಲಾ ರಾವ ಹಾ ಆನಿ ತುಮಿ ಮೊಶೆಚಾ ನೆಮಾಚೆ ಯೆವಜ್ಞೆನಿ ತುಮಿ ಕಚ್ ಶಾರ್ಕ್ ಮನ್ವನ್ ಸಿಕ್‌ಲ್ಯಾಸಾ;

19 ತು ಕುರಡ್ಯಾಲಾ ವಾಟ್ ದ್ಯಾವ್‌ತ್ಯಾಲಾ ಆನಿ ಆಂದಾರಾತ್ ಆಸ್‌ಲ್ಯಾಲ್ಯಾನಾ ಉಜಿಡ್ ಜಾಲ್ಯಾಸ್ ಮನ್ವನ್ ತುಲಾ ಖಾತ್ರಿ ಹಾ,

20 ಸಮಜ್‌ತ್ ನಸ್‌ಲ್ಯಾಲ್ಯಾ ಲೋಕಾನಾ ಯೊಕ್ ಮಾಸ್ಥರ್ ಜಾಲ್ಯಾಸ್. ಮೊಶೆಚಾ ನೆಮಾಚ್ ಸಗ್ಳೆ ಗಿನ್ಯಾನ್ ಆನಿ ಖರ ತುಲಾ ರಾವ ಹಾ.

21 ತು ದುಸ್‌ರ್ಯಾನಾ ಸಾಂಗ್ತೊಸ್. ಫನ್ ತು ತುಲಾಸ್ ಸಾಂಗುನ್ ಗಿಹಿತ್ ನಾಹಿಸ್ ಕಾ? ಚೊರಾಚ್ ನಾಹಿ ಮನ್ವನ್ ಸಾಂಗ್ತೊಸ್, ಫನ್ ತುಸ್ ಕಾ ಚೊರ್ತೊಸ್?

22 ತು ಮಂಥೊಸ್ ವೇಬಿಚಾರ್ ಕರು ನಕೊಸಾ, ಫನ್ ತು ವೇಬಿಚಾರ್ ಕರಿತ್ನಾಹಿಸ್ ಕ್ಯಾ? ತು ಪಾಶಾನಾಂಚಾ ರಾಗ್ ಕರ್ತೊಸ್, ಫನ್ ತು ದೇವ್‌ಚಿ ಚುರಿ ಕರಿತ್ ನಾಹಿಸ್ ಕ್ಯಾ?

23 ತು ದೇವಾಚಾ ನೇಮ್ ತುಜಿಪ ಆಸ್‌ಲ್ಯಾಚೆಗತ್ ಮೊಟೆಫನ್ ಸಾಂಗ್ತೊಸ್ ಫನ್ ತ್ಯಾ ದರ್ಮಶಾಸ್ತ್ರಾರ್ ವಲ್ಯಾಂಡುನ್ ದೇವಾಲಾ ಅವ್ತಾನ್ ಕರಿತ್ ನಾಹಿಸ್ ಕ್ಯಾ?

24 “ಯಹುದಿ ಜಾಲ್ಯಾಲ್ಯಾ ತುಮ್ಹಿಪ್ಪಿಸ್ ಯಹುದಿ ನಸ್‌ಲ್ಯಾಲಿ ಲೊಕ ದೇವಾಚಾ ನಾವಾಲಾ ಆಡ್ಲಿ ಬೊಲ್‌ತ್ಯಾತ್” ಮನ್ವನ್ ಪವಿತ್ರ ಗ್ರಂಥಾತ್ ಲಿವ್‌ಲ್ಯಾ.

25 ತು ಧರ್ಮಶಾಸ್ತ್ರಾಚಿ ಆಜ್ಞಾ ಪ್ಯಾಳ್ಯಾವ ತು ಕೇಲ್ಯಾಲೆ ಮುಂಜಿಲಾ ಅರ್ಥ ಹಾ. ಫನ್ ತು ಧರ್ಮಶಾಸ್ತ್ರಾರ್ ವಲ್ಯಾಂಡುನ್ ಚಾಲಾಸ್ತ ತುಲಾ ಮುಂಜಿ ಜಾಲ್ಲಿ ನಾಹಿ ಆಸ ಜಾಲ್ಲ್ಯಾ.

26 ಯಹುದಿ ನಸ್‌ಲ್ಯಾಲ್ಯಾನಾ ಮುಂಜಿ ಜಾಲಿನಾಹಿ, ಫನ್ ಧರ್ಮಶಾಸ್ತ್ರಾರ್ ಸಾಂಗ್‌ತ್ಯಾಲ ತ್ಯಂಚಾನಿ ಕೇಲತ, ತ್ಯಂಚಾನಿ ಮುಂಜಿ ಕೇಲ್ಯಾಚೆಗತ್ ಜಾಲ್ವಾನಾಹಿ ಕ್ಯಾ?

27 ಯೆಹುದಿ ಜಾಲ್ಯಾಲ್ಯಾ ತುಮಾನಾ ಲೀವ್‌ಲ್ಯಾಲ ಧರ್ಮಶಾಸ್ತ್ರಾರ್ ಹಾ ಆನಿ ಮುಂಜಿ ಕೇಲೆ. ಫನ್ ತುಮಿ ಧರ್ಮಶಾಸ್ತ್ರಾರ್ ವಲ್ಯಾಂಡುನ್ ಚಾಲ್ತಾಸಾ. ಆಸ ಆಸ್ಲಾನಾ, ಶರೀರಾಲಾ ಮುಂಜಿ ಕಿಲಿನಾಹಿತರಿ ಧರ್ಮಶಾಸ್ತ್ರಾಚೆಗತ್ ಚಾಲತ್ಯಾಲ್ಯಾ ತುಮಾನಾ ಗುನ್ನದಾರ್ ಮನ್ವನ್ ದಾವುನ್ ದೇನಾರ್.

28 ಖರಾ ಯೆಹುದಿ ಆನಿ ಖರಿ ಮುಂಜಿ ಕರಾಚಿ ಮಂಜೆ ಕ್ಯಾ? ಬಾಹಿರ್ ಯಹುದಿ ವ್ಹಪುನ್ ರಾಧ್ಯಾಲಾ ಯಹುದಿ ನವ್ವ ಬಾಹಿರ್ಲಿ ಶರೀರಾಚಿ ಮುಂಜಿ ಖರಿ ಮುಂಜಿ ನವ್ವ.

29 ಮನಾತ್ ಯಹುದಿ ವ್ಹಪುನ್ ರಾಧ್ಯಾಲಾಸ್ ಖರಾ ಯಹುದಿ. ಮನಾಲಾ ಜಾಲ್ಯಾಲಿ ಮುಂಜಿ ಖರಿ ಮುಂಜಿ. ಹೀ ಮುಂಜಿ ಜಾಲ್ಯಾಲಿ ದೇವಾಚಾ ಆತ್‌ಮ್ಯಾನಿಸ್ ನಾಹಿತ ಲಿವ್‌ಲ್ಯಾಲ್ಯಾ ಧರ್ಮಶಾಸ್ತ್ರಾರಾನಿ ನವ್ವ ದೇವಾಚಾ ಆತ್‌ಮ್ಯಾನಿಸ್ ಮನಾಲಾ ಮುಂಜಿ ಜಾಲ್ಯಾಲಾ ಮಾನುಸ್ ಮರ್ತ್ಯಾದ್ ಗಿಹ್ಯಾಚಿ ದೇವಾಪ್ಪಿಸ್ ಮಾನ್ಸಾಪ್ಪಿ ನವ್ವ.

3

1 ಆಸ ಜಾಲ್ಯಾ ಯೆಹುದಿ ವ್ಹಪುನ್ ಯೆಹುದಿ ನಸ್‌ಲ್ಯಾಲ್ಯಾಂಚೆ ಪಕ್ಷಿ ಉಪಯೊಗ ಕ್ಯಾ? ಮುಂಜಿ ಕರುನ್ ಗೆತಲ್ಯಾಲ್ಯಾಚಿ ಕಿಮ್ತತ್ ಕ್ಯಾ?

2 ವ್ಹಯ್ ಯೆಹುದ್ಯಾನಾ ಸಾಂಗಾಚ್ ಖುಬ್ ಹಾ. ಸಗ್‌ಳ್ಯಾ ಗುಶ್ಟಿಂಚ್ ಸಾಂಗಾಚ್ ಖುಬ್ ಹಾ ಪೈಲ ವಚನ್ ಯೆಹುದ್ಯಾನ ದಿಲ.

3 ಫನ್ ತ್ಯಾತ್ಲ್ಯಾ ಥೊಡ್ಯಾನಾ ಇಸ್ವಾಸ್ ನವ್ಲಾ ಮನ್ವನ್ ಕ್ಯಾ ಜಾಲ್ಹಾ? ದೇವ್ ಇಸ್ವಾಸಾತ್ ಘುಕತ್ಯಾಲಾ ಜಾಲ್ಹಾ ಕ್ಯಾ?

4 ಖರೈನಿಸ್ ನವ್ಲಾ ಪರತೇಕ್ ಮಾನುಸ್ ಲಬ್ಡಾ ಜಾಲ್ಹಾತರಿ ದೇವ್ ಖರಾಸ್ ವ್ಹಪುನ್ ರಾನ್ದಾರ್. ಪವೀತ್ರ ಪುತಿಕಾತ್ ಆಸ ಸಾಂಗಲ್ಯಾ;

“ತುಜೆ ಬುಲಿತ್ ತು ನೀಯತಿಚಾ ಮನ್ವನ್ ದಾವುನ್ ದಿಯಾ ವ್ಹಯಿ.

ತುಜಾ ತೀರ್ಮಾನ್ ವ್ಹತಾನಾ ತು ಜಿತ್ತಾಯಾ ವ್ಹಯಿಸ್. ಕೀರ್ತನೆ

51:4

5 ದೇವ್ ನೀಯತಿಚಾ ಮನ್ವನ್ ಆಮಿ ಕೇಲ್ಯಾಲಿ ಘುಕ್ ಆನಿ ತ್ಯವ್ಣಿ ಶಾರ್ಕಿ ದ್ಯಾವ್ಣಿ ಆಸ ಆಸ್ಲಾನಾ ದೇವ್ ಆಮಾನಾ ಶಿಕ್ಯಾ ದೇತಾನಾ ತ್ಯೊ ಅನೇವ್ ಕರ್ತೊ ಮನ್ವನ್ ಆಮಿ ಸಾಂಗಾಯಾ ವ್ಹಯಿಲ್ ಕ್ಯಾ? ಕಂದಿಸ್ ನಾಹಿ ಹಿ ಸಭಾವರಿಚಿ ಬುಲಿ.

6 ಖರೈನಿಸ್ ನಾಹಿ! ದೇವಾನಿ ನ್ಯಾಯಿಚ್ ನಸ್ಥಾತ್, ತ್ಯೊ ದುನೆಚಾ ನ್ಯಾಯಿ ತೀರ್ಮಾನ್ ಕಸಾ ಕರ್ನಾರ್?

7 “ಮೀ ಬೊಲ್ತ್ಯಾಲ ಲಬಾಡ್ ದೇವಾಚ್ ಖರ ದಾವುನ್ ದಿಯಾ ಮಾಜಾ ಲಾಬಾಡಾನಿ ದೇವಾಲಾ ಖರೈನಿಸ್ ಮೈಮಾ ವ್ಹಯಾಚಿ ಜಾಲ್ಯಾವ. ಮನಾ ಪಾಪಿ ಮನ್ವನ್ ಖಡ್ಯಾವಾಚಾ ಕಾ?

8 “ಚಾಂಗ್ಲ ವ್ಹಯಾಸಾಟಿ ವಾಯಿಟ್ ಕರುಯಾ ಮನ್ವನ್ ಆಮಿ ಕಾ ಸಾಂಗು ನಾಹಿ? ಆಸ ಮೀಸ್ ಶಿಕಿವತ್ಯೊ ಮನ್ವನ್ ಖುಬ್ ಲೊಕ ಮಾಜಿ ನಿಂದಾ ಕರ್ತ್ಯಾತ ತೀ ಲೊಕ ಘುಕಿಚಿ ಮನ್ವನ್ ಸಾಂಗಾಚ್ ಶಾರ್ಕ.

ನಿಯತಿಚಾ ಯೊಕ್ತಿ ನಾಹಿ

9 ತಸಜಾಲ್ಯಾ ಆಮಿ ಕ್ಯಾ ಸಾಂಗುಯಾ? ಯಹುದಿ ಜಾಲ್ಯಾಲ ಆಮಿ ಯೆಹುದಿ ನಸ್ಲ್ಯಾಲ್ಯಾಂಚಾವ್ಣಿ ಚಾಂಗ್ಲ ಹಾವ್ ಕ್ಯಾ? ಜರಾಬಿ ನಾಹಿ! ಯಹುದಿ ವ್ಹಪುಂತ ಯಹುದಿ ನಸ್ಲ್ಯಾಲಿ ವ್ಹಪುಂತ ಸಗ್ಳಿ ಪಾಪಾಚಾ ಅಧಿಕಾರಾತ್ ಹಾತ್ತ್ ಮನ್ವನ್ ಮೀ ತುಮಾನಾ ಆಂದಿಸ್ ದಾವುನ್ ದಿಲ್ಯಾ

10 ಪವಿತ್ರ ಗ್ರಂಥ ಆಸ ಸಾಂಗ್ಲ:

“ನಿಯತಿಚಾ ಯೊಕ್ತಿ ನಾಹಿ. ನಾಹಿಸ್ನಾಹಿ!

11 ಕೊನುಸ್ ಗಿನ್ಯಾನ್ ಆಸ್‌ಲ್ಯಾಲಾ ನಾಹಿ ನಾಹಿತ ದೇವಾಲಾ ಶೊತ್ಯಾಲಾ ಕೊನುಸ್ ನಾಹಿ.

12 ಸಗ್ಳಿ ದೇವಾಚೆ ಆಡ್ಣಿ ಪರಾತ್ಲಿತ ಸಗ್ಳಿ ಲೊಕ ಕಾಮಾಲಾ ಯಯಿನಸ್ವಾರಿ ಜಾಲ್ಯಾತ ಚಾಂಗ್ಲ ಕರ್ತ್ಯಾಲಾ ಯೊಕ್ಪಿನಾಹಿ. ನಾಹಿಸ್ವಾಹಿ!

13 ಲೊಕಾಂಚಿ ತೊಂಡ ಉಗಾಡ್‌ಲ್ಯಾಲೆ ಮಸುರ್ಡಿಚೆಗತ್ ಹಾತ್ತ್. ತ್ಯಂಚಾ ಬೊಲ್ಯಾ ಮೊಸಾನಿ ಬರ್ಲ್ಯಾತಾ ತ್ಯಂಚಾ ಜಿಬಿ ಲಬಾಡಾನಿ ಬರ್ಲ್ಯಾತಾ ತ್ಯಂಚಾ ವಟಾವ ಸಾಪಾಚ್ ಈಸ್ ಹಾ.

14 ತ್ಯಂಚಾ ತೊಂಡಾತ್ ಸರಾಪ್ ಆನಿ ಕಡುಫನ್ ಬರ್ಲ್ಯಾ.

15 ತರಾಸ್ ದಿಯಾ ಆನಿ ಮಾರುನ್ ಟಾಕಾಯಾ ತೀ ಕವಾಬಿ ತಯಾರ್ ಹಾತ್ತ್.

16 ತೆ ಭಾಯಿಲ್ ತಿಥ ಪಿಡಾ ಆನಿ ನಾಸ್ ತರಾಸ್ ರಾತ್ಯಾತ.

17 ತ್ಯನಾ ಸಮಾದಾನಾಚಾ ಮಾರ್ಗ ಸಮಾಜ್ಲಾ ನಾಹಿ.”

18 ತ್ಯಂಚೆ ನದ್ರಲಾ ದೇವಾಚ್ ಭ್ಯಾ ನಾಹಿ.

19 ಧರ್ಮಶಾಸ್ತಾರ್ ಕ್ಯಾ ಹಾ ಮನ್ವುನ್ ಆಮಿ ಸಗ್ಳ ಸಮಜುನ್ ಗೆತಲ್ಯಾ. ಧರ್ಮಶಾಸ್ತಾರಾಚಾ ತಾಬ್ಯಾತ್ ಆಸ್‌ಲ್ಯಾಲ್ಯಾ ಲೊಕಾಂಚೆ ಗುಪ್ತಿತ್ ಸಾಂಗ್ತ, ಮನ್ವುನ್ ಸಗ್ಳಿ ತೊಂಡ ಜಾಕ್ವಾರ್ ಆನಿ ಸಗ್ಳಿ ದುನ್ಯಾ ದೇವಾಲಾ ಲೆಖಾ ದಿಯಾವ್ವಯಿ.

20 ಕಾ ಮಂಜೆ ಧರ್ಮಶಾಸ್ತಾರಾಚೆಗತ್ ಚಾಲತ್ಯಾಲಾ ಪರತೀಕ್ ಮಾನುಸ್ ದೇವಾಚೆ ನದ್ರಲಾ ನೀಯತಿಚ್ ವ್ಹಯಾ ಕುನಾಲಾಸ್ ವ್ಹಯಿತ್ವಾಹಿ. ತ್ಯಾ ಆಮಚ್ ಪಾಪ್ ತ್ಯವ್ಡಸ್ ದ್ಯಾವ್ತ.

ಆಮಿ ದೇವಾಚೆ ಮೊರ್ವ್ಡ್ ಕಸ ನಿಯತಿಚ್ ವ್ಹತಾವ್

21 ಫನ್ ಆತಾ ಮಾನ್ಸಾಟಿ ದೇವಾನಿ ಹ್ಯ ದಾವುನ್ ದಿಲ್ಯಾ ತ್ಯೊ ದರ್ಮಶಾಸ್ತಾರಾಚೆ ಸಿವಾರ್ ನೀಯತಿಚಾ ಕರ್ತೊ ಯವ್ಡಸ್ ನವ್ವ ಹೇ ಬುಲಿಚಿ ವಳಕ್ ಮೊಶೆಚಾ ನೇಮ್ ಆನಿ ಪ್ರವಾದಿ ಜಾಲ್ಯಾತ.

22 ದೇವ್ ಲೋಕಾನಾ ಯೇಸು ಕ್ರಿಸ್ತಾವ ಆಸ್‌ಲ್ಯಾಲ್ಯಾ ಇಸ್ವಾಸಾನಿ ತ್ಯನಿ ಭಕ್ತಿಚ್ ಮನ್ವುನ್ ಥರಿವ್ನ್ ದೇವಾಪ ಕಸ್ಲಾ ಬೇದ್ ಭಾವ್ ನಾಹಿ.

23 ಸಗ್ಗಿ ಲೊಕ ಪಾಪ್ ಕರುನ್ ದೇವಾಚಿ ಮೈಮಾ ಗಿಹ್ಯಾಚೆ ಆಂದಿ ಹಾತ್ತ್.

24 ಫನ್ ಯೇಸು ಕ್ರಿಸ್ತಾಚೆ ಸುಟ್ಕುಕಿನಿ ದೇವಾಚೆ ಫುಕಟ್ಲೆ ಕ್ರಪೆನಿ ತ್ಯಾಚೆ ಮೊರ್ದು ಆಮಿ ನಿಯತಿಚ್ ಮನ್ವುನ್ ಧರ್ಲ್ಯಾವ್.

25 ದೇವಾನಿ ಇಸ್ವಾಸಾಸ್ ಲಾಗುನ್ ಲೋಕಾಂಚಿ ಪಾಪ ಮಾಪ್ ಕರ್ತಾಲಾ ಮಾರ್ಗ ಕೆಲ್ಯಾ. ತ್ಯೊ ಮಾರ್ಗ ಯೇಸು. ಕ್ರಿಸ್ತಾಚಾ ರಕ್ತಾನಿಸ್ ಪಾಪ ಮಾಪಿ ಕೆಲ್ಯಾತ. ದೇವಾನಿ ಕೆಲ್ಯಾಲ ಕವಾಬೀ ಶಾರ್ಕ ರಾಧ ಆನಿ ಶಾರ್ಕ ರಾಧ ಮನ್ವುನ್ ಹ್ಯ ದ್ಯಾವ್ತ. ದೇವ್ ಮಾಗ್ಲಾ ಕಾಲಾತ್ ಥಂಡ್ ಫನಾನಿ ರಾಹುನ್ ಲೋಕಾನಾ ತ್ಯಂಚಾ ಪಾಪಾತ್ಲಿ ಶಿಕ್ಯಾ ದಿಯಾಚೆ ಆಂದಿ ಗೇಲಾತರಿ ದೇವ್ ನೀಯತಿಚ್ ಭಾಲ್ಯಾ.

26 ಆಸ ದೇವಾನಿ ಆಪ್ಲು ನೀಯತಿಚ್ ಮನ್ವುನ್ ಆನಿ ಯೇಸುವ ಇಸ್ವಾಸ್ ಥೆವ್ತಾಲಾ ಕೋನ್ಪಿ ವ್ಹಪುನಿ ನೀಯತಿಚ್ ಕರ್ತೊ ಮನ್ವುನ್ ದ್ಯಾವ್ತೊ.

27 ತಸಭಾಲ್ಯಾ ಆಮಾನಾ ಆಮಿ ವವ್ಯಾಳುನ್ ಗಿಹ್ಯಾ ಆವಕಾಸ್ ಕುರಹಾ? ಕುರಸ್ತಾಹಿ! ಆನಿ ಹ್ಯಲಾ ಕ್ಯಾ ಕಾರನ್ ಹಾ? ಆಮಿ ಧರ್ಮಶಾಸ್ತಾರ್ ಪಾಳಾಚ್ ಕಾರನ್ ಹ್ಯ ಕ್ಯಾ? ನಾಹಿ! ಫನ್ ಆಮಿ ಕಚಾವ ಇಸ್ವಾಸ್ ಥೆವ್ತಾವ್ ತ್ಯ ಆಮಚಾ ವವ್ಯಾಳನ್ಯಾಲಾ ಕಾರನ್ ಭಾಲ್ಯಾ.

28 ಸರ್ತ್ಯಾಲಾ ಮೀ ಹ್ಯ ಸಾಂಗ್ತೊ ಕಚ್ಚಾ ಮಾನುಸ್ ಧರ್ಮಶಾಸ್ತಾರಾಚೆಗತ್ ಚಾಲ್ತೊ ಮನ್ವುನ್ ನವ್ವ್ ನಿಸ್ಥಾ ಇಸ್ವಾಸಾನಿಸ್ ತ್ಯೊ ನೀಯತಿಚ್ ಮನ್ವುನ್ ಗೆನ್ಹಾರ್.

29 ನಾಹಿತ ದೇವ್ ನಿಸ್ಥಾ ಯಹುದ್ಯಾನಾ ತ್ಯವ್ಡಾಸ್ ಕ್ಯಾ? ತ್ಯೊ ಯಹುದಿ ನಸ್ಲಾಲ್ಯಾನಾ ದೇವ್ ನವ್ವ್ ಕ್ಯಾ? ಖರ್ಚಾನಿಸ್ ವ್ಹಯ್ ತ್ಯೊ ಯಹುದಿ ನಸ್ಲಾಲ್ಯಾನಾಬಿ ದೇವ್ ಭಾಲ್ಯಾ.

30 ದೇವ್ ಯೊಕುಸ್. ತ್ಯೊ ಯಹುದ್ಯಾಂಚ್ಚಾ ತ್ಯವಡಾಸ್ ನವ್ವ್ ಯಹುದ್ಯಾನಾ ಯಹುದಿ ನಸ್ಲಾಲ್ಯಾನಾ ತ್ಯಂಚಾ ಇಸ್ವಾಸಾನಿ ನೀಯತಿಚ್ ಕರ್ತೊ.

31 ಆಮಿ ಹ್ಯಾ ಇಸ್ವಾಸಾನಿ ಧರ್ಮಶಾಸ್ತಾರ್ ದುರ್ ಕರ್ತಾವ್ ಕ್ಯಾ?

ನಾಹಿ ಖರೈನಿಸ್ ನಾಹಿ! ಹೈಚೆ ಬದ್ಲಿ ಆಮಿ ಧರ್ಮಶಾಸ್ತರ್ ಉಚ್ಚುನ್ ದರ್ಥಾವ್.

4

ಅಬ್ರಾಹಾಮಾಚೆ ಉದಾಹರನ್

¹ ತಸ ಜಾಲ್ಯಾವ, ಆಮಚಾ ವಡಿಲ್ ಜಾಲ್ಯಾಲ್ಯಾ ಅಬ್ರಾಹಾಮಾಚೆ ಗುಶ್ಟಿತ್ ಆಮಿ ಕ್ಯಾ ಸಾಂಗುಯಾ? ತ್ಯೊ ಇಸ್ವಾಸಾಚೆ ಗುಶ್ಟಿತ್ ತ್ಯೆಚಾ ಕ್ಯಾ ಅನುಭವ್ ಜಾಲ್ಲ್ಯಾ?

² ಫನ್ ತ್ಯೊ ಆಪೆಲ್ಯಾ ಚಾಂಗಲ್ಯಾ ಕಾಮಾನಿ ನೀಯತಿಚಾ ಜಾಲ್ಯಾವ ವವ್ಯಾಳುನ್ ಗಿಹ್ಯಾ ತ್ಯೆಲಾ ಕಾರನ್ ರಾಹಿತ. ಫನ್ ಅಬ್ರಾಹಾಮಾಲಾ ದೇವಾಚೆ ಮೊರ್ದಾವವ್ಯಾಳುನ್ ಗಿಹ್ಯಾ ಜಾಲ್ಲ್ಯಾ ನಾಹಿ.

³ ಅಬ್ರಾಹಾಮಾನಿ ದೇವಾವ ಇಸ್ವಾಸ್ ಥೆವ್ಲಾ. ದೇವಾನಿ ಅಬ್ರಾಹಾಮಾಚಾ ಇಸ್ವಾಸಾಚಾ ಕಾರ್ನಾನಿ ನೀಯತಿಚಾ ಮನ್ವನ್ ಗೇತ್ಲಾ. ಆಸ ಪವಿತ್ರ ಗ್ರಂಥ ಸಾಂಗ್ತೆ.

⁴ ರಾಬೆತ್ಯಾಲ್ಯಾಲಾ ಗಾವತ್ಯಾಲಾ ಪಗಾರ್ ದಾನ್ ನವ್ವ ತ್ಯೆಚಿವ ತ್ಯೆಲಾ ಹುಕುಮ್ ಹಾ.

⁵ ಫನ್ ಕೊನ್ ಪುನ್ಯಾಚಿ ಕಾಮ ಕರುನ್ ಪಾಪಿನಾ ನೀಯತಿಚೆ ಮನ್ವನ್ ಥರಿವತ್ಯಾಲ್ಯಾವಿಸ್ವಾಸ್ ಥೆವ್ಲೊ ತ್ಯೆಚಾಸ್ ಇಸ್ವಾಸ್ ನೀಯತಿಚಾ ವ್ಹತೊ.

⁶ ದೇವಾನಿ ಯಕಾಚೆ ಚಾಂಗ್ಲೆ ಕಾಮ್ ಬಗಾಚೆ ಆಂದಿ ತ್ಯೆಲಾ ನೀಯತಿಚಾ ಮನಲ್ಯಾವ ತ್ಯೊ ಖರೈನಿಸ್ ಬರೈ ನಸಿಬಾಚಾ ಮನ್ವನ್ ದಾವಿದಾನಿ ಸಾಹಿತ್ ಸಾಂಗ್ಲೆಲ್ಯಾ; ಕಸ ಮಂಜೆ

⁷ ಕುನಾಚಿ ಪಾಪ ಮಾಪಿ ಜಾಲ್ಯಾತ ತ್ಯೆಂಚಾ ಚುಕಿ ಚಾಕುನ್ ಹಾತ್ತಾ ತೇ ಖರೈನಿಸ್ ಬರೈ ನಸಿಬಾಚೆ!

⁸ ಪ್ರಭು ಕುನಾಚೆ ಪಾಪ್ ಯದತ್ ದರಿತ್ವಾಹಿ ತ್ಯೊ ಖರೈನಿಸ್ ಬರೈ ನಸಿಬಾಚಾ

⁹ ಹೆ ನಸಿಬ್ ಮುಂಜಿ ಕರುನ್ ಗೆತಲ್ಯಾಲ್ಯಾನಾ ತ್ಯೆವ್ಡಸ್ ಕ್ಯಾ? ಮುಂಜಿ ಕರುನ್ ಗೆತಲ್ಯಾ ನಸಲ್ಯಾಲ್ಯಾ ಲೊಕಾನಾಬಿ ಜಾಲ್ಯಾ. ಕಾ ಮಂ ಜೆ

“ಅಬ್ರಹಾಮಾನಿ ದೇವಾವ ಇಸ್ವಾಸ್ ಥೆವ್ಲಾ ತ್ಯಚಾ ಇಸ್ವಾಸಾನಿಸ್ ತ್ಯಲಾ ನೀಯೆತಿಚಾ ಕೆಲಾ ” ಹ್ಯ ಪವಿತ್ರ ಪುತಿಕಾತ್ ಲಿವ್‌ಲ್ಯಾ.

10 ಹ್ಯ ಕವಾ ಜಾಲ? ತ್ಯಲಾ ಮುಂಜಿ ವ್ಹಹ್ಯಾಚೆ ಆಂದಿ ಕ್ಯಾ ಮುಂಜಿ ಜಾಲ್ಯಾವ್? ಮುಂಜಿ ವ್ಹಹ್ಯಾಚೆ ಆಂದಿಸ್.

11 ದೇವಾನಿ ಆಪಲ್ಯಾಲಾ ಗೆತಲ್ಯಾ ಮನ್ವುನ್ ದಾವುನ್ ದಿಯಾ ಸಾಟಿ ಅಬ್ರಹಾಮಾನಿ ನಂತರ್ ಮುಂಜಿ ಕರುನ್ ಗೆತ್ಲಿ ಅಬ್ರಹಾಮಾನಿ ಮುಂಜಿ ಕರುನ್ ಗಿಹ್ಯಾಚೆ ಆಂದಿ ಇಸ್ವಾಸಾನಿಸ್ ನೀಯೆತಿಚಾ ಜಾಲ್ಲ್ಯಾ ಮಂಥ್ಯಾಲ್ಯಾಲಾಸ್ ತ್ಯಚಿ ಮುಂಜಿ ಆದಾರ್ ಜಾಲೆ. ತ್ಯಾ ಕಾರ್ನಾನಿ ಇಸ್ವಾಸ್ ಥೆವ್‌ತ್ಯಾಲ್ಯಾ ಸಗ್ಳ್ಯಾ ಲೋಕಾನಾ ತ್ಯಂಚಾನಿ ಮುಂಜಿ ಕರುನ್ ಗೆತ್ಲಿ ನಸ್ಲಿ ತರಿ ಅಬ್ರಹಾಮ್ ಆತ್ಮಿಕ್ ಬಾ ಜಾಲ್ಯಾ ಕಾ ಮಂಜೆ ತೇ ಆಪ್‌ಲ್ಯಾ ಇಸ್ವಾಸಾಸ್ ಲಾಗುನ್ ನೀಯೆತಿಚ್ ಮನ್ವುನ್ ಗಿಥಿಲ.

12 ತ್ಯವ್ಡಸ್ ನವ್ವ ಮುಂಜಿ ಕರುನ್ ಗೆತಲ್ಯಾಲ್ಯಾ ಲೋಕಾನಾ ಸಾಹಿತ್ ಅಬ್ರಹಾಮ್ ಆತ್ಮಿಕ್ ಬಾ ಜಾಲ್ಯಾ ಫನ್ ತ್ಯನಾ ಆಪ್ಲಾ ಬಾ ಮನ್ವುನ್ ಕರ್ತಾಲಾ ತ್ಯಂಚಿ ಮುಂಜಿ ನವ್ವ ಆಮಘಾ ಬಾ ಜಾಲ್ಯಾಲಾ ಅಬ್ರಹಾಮ್ ಮುಂಜಿ ಕರುನ್ ಗಿಹ್ಯಾಚೆ ಆಂದಿ ಗೆತಲ್ಯಾಲ್ಯಾ ಇಸ್ವಾಸಾಚೆಗತ್ ತ್ಯಂಚಾನಿ ಜಿವ್ವಾ ಕೇಲಾತಸ್. ತ್ಯೊ ತ್ಯನಾ ಬಾ ಜಾಲ್ಯಾ

ಇಸ್ವಾಸಾಸ್ ಲಾಗುನ್ ಸಬ್ ಗೆತಲ್ಯಾಲ

13 ಅಬ್ರಹಾಮಾಲಾ ಆನಿ ತ್ಯಚೆ ಪಿಳ್ಗಿಲಾ ದುನ್ಯಾ ಸಗ್ಳಿ ದೇತೊ ಮನ್ವುನ್ ದೇವಾನಿ ಸಬ್ ದಿಲ್ಯಾಫನ್ ಅಬ್ರಾಮಾನಿ ತ್ಯೊ ಸಬ್ ಗೆತಲ್ಯಾಲಾ ಧರ್ಮಶಾಸ್ತ್ರಾಚೆಗತ್ ಚಾಲ್ಯಾಲಿ ನವ್ವ ಆಬ್ರಹಾಮ್ ಇಸ್ವಾಸಾನಿ ನೀಯೆತಿಚಾ ಜಾಲ್ಯಾಲ್ಯಾ ಕಾರ್ನಾನಿ ತ್ಯೊ ಸಬ್ ಗೆತಲ್ಲಾ.

14 ಆಸ ಆಸ್ಥಾನಾ ದೇವಾನಿ ಸಬ್ ದಿಲ್ಯಾಲಾ ಲೋಕ ಧರ್ಮ ಶಾಸ್ತ್ರಾಚೆಗತ್ ಚಾಲಾಯಾ ಗಿಹ್ಯಾ ಜಾಲ್ಲ್ಯಾತ್, ಇಸ್ವಾಸ್ ಉಪೇಗ್ ನಸ್‌ಲ್ಯಾಲಾ ಜಾಲ್ಯಾ ತ್ಯವ್ಡಸ್ ನವ್ವ ದೇವಾನಿ ಅಬ್ರಹಾಮಾಲಾ ದಿಲ್ಯಾಲಾ ಸಬ್ ಉಪೇಗ್ ನಸ್‌ಲ್ಯಾಲಾ ಜಾಲ್ಯಾ.

15 ಧರ್ಮಶಾಸ್ತ್ರಾರಾಚೆಗತ್ ತ್ಯಂಚಿವ ದೇವಾಚಾ ರಾಗ್ ಉತ್ರನ್ ಯತೊ ಫನ್ ಧರ್ಮಶಾಸ್ತ್ರಾರ್ ನಾಹಿ ತಿಥ ಧರ್ಮಶಾಸ್ತ್ರಾರ್ ಪಾಳಾಚೆ ಆಂದಿ ಆಸ್‌ಲ್ಯಾಲಿ ಪ್ರಶ್ನೆ ನಾಹಿ.

16 ತ್ಯಾ ಕಾರ್ನಾನಿ ಲೊಕ ಇಸ್ವಾಸಾಸ್ ಲಾಗುನ್ ದೇವಾಚಾ ಸಬ್ಬಿ ಗೇನ್ದಾರ್. ತ್ಯಾ ಫುಕಟ್ ದಿಲ್ಯಾಲ ವ್ಹಯಾ ವ್ಹಯಿ ಮನ್ವುನ್ ಆಸ ಜಾಲ್ಲ್ಯಾ ತ್ಯಾ ಫುಕಟ್ ಜಾಲ್ಯಾಲ ಜಾಲ್ಯಾವ ಅಬ್ರಹಾಮಾಚಿ ಪಿಳ್ಳಿ ಸಗ್ಳಿ ತ್ಯೊ ಸಬೋತ್ ಗೆಥ್ಯಾತ್. ಹ್ಯೊ ಸಬ್ಬಿ ಮೊಶೆಚಾ ಧರ್ಮಶಾಸ್ತ್ರಾರಾಚೆಗತ್ ಚಾಲತ್ಯಾಲ್ಯಾ ಲೊಕಾನಾ ತ್ಯವ್ಡಾಸ್ ನವ್ವ್ ಅಬ್ರಹಾಮಾಚೆಗತ್ ಇಸ್ವಾಸಾನಿ ಚಾಲತ್ಯಾಲ್ಯಾ ಸಗ್ಳ್ಯಾ ಲೊಕಾನಾ ದಿಲ್ಯಾ. ಕಾ ಮಂಜೆ ಅಬ್ರಹಾಮ್ ಆಮಾನಾ ಸಗ್ಳ್ಯಾನಾ ಆತ್ಮಿಕ್ ಬಾ ಜಾಲ್ಯಾ.

17 ಮೀ ತುಲಾ ಖುಬ್ ಲೊಕಾನಾ ಆತ್ಮಿಕ್ ಬಾ ಕೆಲ್ಯಾ ಮನ್ವುನ್ ಪವಿತ್ರ ಗ್ರಂಥಾತ್ ಲಿವ್‌ಲ್ಯಾ ಹ್ಯಾ ದೇವಾಚೆ ಮೊರ್ದುಖರ ಜಾಲ್ಯಾ ಮೇಲ್ಯಾಲ್ಯಾನಾ ಜೀವ್ ದೇನಾರಾ ಆಜುನ್ ಗಡ್‌ಲ್ಯಾ ನಸ್‌ಲ್ಯಾಲಿ ಕಾಮ ಕರ್ನಾರಾ ಜಾಲ್ಯಾಲ್ಯಾ ದೇವಾವ ಅಬ್ರಹಾಮಾನಿ ಇಸ್ವಾಸ್ ಥೆವ್ಲಾ.

18 ಅಬ್ರಹಾಮಾಲಾ ಪೊರ ವ್ಹತಿಲ ಮನ್ವುನ್ ಇಸ್ವಾಸ್ ನವ್ಲಾ ಫನ್ ತ್ಯೊ ದೇವಾವ ಇಸ್ವಾಸ್ ಥಿವುನ್ ಆಪ್ಲೆ ಆಶೆನಿ ಮೊರ್ದುಸರ್ಲಾ. ತ್ಯಾಸ್ ಕಾರ್ನಾನಿ ತ್ಯೊ ಖುಬ್ ದೆಶೆನಾ ಆತ್ಮಿಕ್ ಬಾ ಜಾಲ್ಲ್ಯಾ ದೇವ್ ತ್ಯಲಾ ತು ಖುಬ್ ಲೊಕಾನಾ ಗೆನಾರ್ ಪವಿತ್ರ ಗ್ರಂಥಾತ್ ತುಜಿ ಪಿಳ್ಳಿ ಆಬ್ಕಾತ್‌ಲ್ಯಾ ಚಾನ್ಯಾಂಚೆಗತ್ ರಾನಾರ್ ಮನ್ವುನ್ ಪವಿತ್ರ ಗ್ರಂಥ ಸಾಂಗ್ತೆ.

19 ಅಬ್ರಹಾಮಾಲಾ ಜವ ಜವಳ್ ಶೆಂಬರ್ ವರ್ಸ ಜಾಲ್ದಿತ್. ತವಾ ತ್ಯಚ್ ಶರಿರ್ ಬಳ್ ನಸ್‌ಲ್ಯಾಲ ಜಾಲ್ಲ್ಯಾ ಮನ್ವುನ್ ತ್ಯಲಾ ಪೊರ ವ್ಹತಿಲ ಆಶಿ ಆಶಾ ನವ್ಲಿ. ನಾಹಿತ ಸಾರಾಳಾಲಾ ಸಾಹಿತ್ ಪೊರ ವ್ಹಯಿತಿಲ ಮನ್ವುನ್ ಆಶಾ ನವ್ಲಿ. ಫನ್ ದೇವಾವ ಆಸಲ್ಯಾಲಾ ತ್ಯಚ್ಚಾ ಇಸ್ವಾಸ್ ಕಮ್ಮಿ ಜಾಲ್ಲ್ಯಾ ನಾಹಿ.

20 ದೇವಾನಿ ದಿಲ್ಯಾಲ್ಯಾ ಸಬ್ಬಾಚೆ ಗುಶ್ಟಿತ್ ತ್ಯಲಾ ಸಂಶೆವ್ ಆಲಾ ನಾಹಿ. ಆನಿ ಆಪ್ಲಾ ಇಸ್ವಾಸ್ ನಾಹಿ ಕೆಲಾನಾಹಿ. ತ್ಯಚಾ ಇಸ್ವಾಸಾನಿಸ್ ತ್ಯಲಾ ಬಳ್ ದಿಲ ಆನಿ ದೇವಾಲಾ ಸ್ತೊತ್ರ ಕಿಲಿತ್.

21 ದೇವಾನಿ ಆಪ್ನು ದಿಲ್ಯಾಲಾ ಸಬ್ಬಿ ಖರಾನ್‌ನಿಕ್ ಚಾಲಿವ್ವಾರ್ ಮನ್ವನ್ ಆಬ್ರಾಹಾಮಾನಿ ಘಟ್ ಇಸ್ವಾಸ್ ಥೆವ್ಲಾ.

22 ಮನ್ವನ್, “ದೇವಾನಿ ಅಬ್ರಾಹಾಮಾಲಾ ತ್ಯಚಾ ಇಸ್ವಾಸಾನಿ ತ್ಯಲಾ ನಿಯತಿಚಾ ಮನ್ವನ್ ಕೇಲಾ. ”

23 ನಿಯತಿಚಾ ಮಂಥ್ಯಾಲಾ ಹ್ಯೊಸಬೊತ್ ತ್ಯಾ ಬೊಲ್ಯಾ ಲಿವ್‌ಲ್ಯಾಲ್ಯಾ ಅಬ್ರಾಹಾಮಾಲಾ ತ್ಯವಡ್ಯಾಸ್ ನವ್ತಾ.

24 ತ್ಯಾ ಆಮ್ಚಾ ಪ್ರಭುಜಾಲ್ಯಾಲ್ಯಾ ಯೇಸುಲಾ ಜೀವಂತ್ ಉರಿವಲ್ಯಾಲ್ಯಾವ ಇಸ್ವಾಸ್ ಥೆವ್‌ಲ್ಯಾಲಾ ಆನಿ ನಿಯತಿಚ್ ಮನ್ವನ್ ಸ್ವಿಕಾರ್ ಕರುನ್ ಗೇತ್‌ಲ್ಯಾಲ್ಯಾ ಆಮ್ಚಿ ಸಾಟಿ ಸಾಹಿತ್ ಲಿವ್‌ಲ್ಯಾತಾ.

25 ಆಮ್ಚಾ ಪಾಪಾಸ್ ಲಾಗುನ್ ಯೇಸುಲಾ ಮರಾಯಾ ದಿಲಾ. ಆಮಾನಾ ನಿಯತಿಚ್ ಮನ್ವನ್ ಧರ್ವಾಯಾ ತ್ಯಲಾ ಮೇಲ್ಯಾಲ್ಯಾತ್ಲಿ ಪುನಾ ಜಿತ್ತಾ ಉರೀವ್ಲಾ.

5

ದೇವಾ ಸಂಗ ನಿಯತ್

1 ಆಸ ಆಸ್ಥಾನಾ, ಆಮಿ ಇಸ್ವಾಸಾನಿ ನೀಯತಿಚಿ ಹಾವ್. ತ್ಯಾ ಕಾರ್ನಾನಿ ಆಮಚಾ ಪ್ರಭುಜಾಲ್ಯಾಲ್ಯಾ ಯೇಸು ಕ್ರಿಸ್ತಾಸ್ ಲಾಗುನ್ ಆಮಾನಾ ದೇವಾ ಸಂಗ ಸಮಾದಾನ್ ಹಾ.

2 ತ್ಯನಿ ಆಮಾನಾ ಆಮ್ಚಾ ಇಸ್ವಾಸಾಸ್ ಲಾಗುನ್ ದೇವಾಚಿ ಕ್ರಪೆ ಗೇತ್ಲೆ ಆತಾ ಆಮಿ ತ್ಯಾತ್ ಜೀವ್ನ್ ಕರ್ತಾಂವ್ ಮನ್ವನ್ ದೇವಾಚೆ ಮೈಮೆತ್ ಆಮಿ ವಾಟೆದಾರ್ ವ್ಹನಾರ್ ಮನ್ಯಾಚಿ ಆಶಾ ಆಮಾನಾ ಹಾ ಮನ್ವನ್ ಆಮಿ ಬಡಾಯಿ ಕರ್ತಾಂವ್.

3 ನಾಹಿತ, ಆಮ್ಚಾತ್ ಕಸ್ತಾತ್ ತರಾಸಾತ್ ಹೆಮ್ಮೆನಿ ಹಾವ್ ಕಾ ಮಂಜೆ, ಹ್ಯೊ ಕಸ್ವ ತರಾಸ್ ಆಮ್ಚಾತ್ ಖುಬ್ ಥಂಡ್ ಫನ್ ಆಂತೊ.

4 ದಿರಾನಿ ಚಾಂಗ್ಲಾ ಸ್ವಭಾವ್ ಉತ್ಪನ್ ವ್ಹತ್ಲೊ. ಹ್ಯಾ ಚಾಂಗ್ಲಾ ಸಭಾವಾನಿ ಇಸ್ವಾಸ್ ವ್ಹತ್ಲೊ. ಹಿ ಆಶಾ ಆಮಾನಾ ಕವಾಸ್ ನಿರಾಶ್ ಕರಿತ್ ನಾಹಿ.

5 ಕಾ ಮಂಜೆ ದೇವಾನಿ ಆಮಾನಾ ಬೊಮಾನ್ ದಿಲ್ಯಾಲ್ಯಾ ಪವಿತ್ರಾತ್ಮಾಸ್ ಲಾಗುನ್ ಆಪ್ಲಿ ಮಾಯಾ ಆಮ್ಚಾ ಮನಾತ್ ಗ್ಯಾತ್ಲೆ.

6 ಆಮಿ ಆಶೆತ್ ನಸ್ಥಾನಾ ದೇವಾನಿ ನಿವಡ್‌ಲ್ಯಾಲ್ಯಾ ಯಳಾಲಾ ಕ್ರಿಸ್ತ ಆಮ್ಚಾ ಬುರ್ಶಾಚೆ ಸಾಟಿ ಮೇಲಾ.

7 ನಿಯೆತಿಚಾ ಸಾಟಿ ಕೊನ್ತರಿ ಮೆಲ್ಯಾವ ಮರಲ್. ಚಾಂಗಲ್ಯಾ ಸಾಟಿ ಮರಾಯಾ ಖರಾನ್ ಕೊನ್ತರಿ ಧಿರ್ ಕೆಲ್ಯಾವ ಕರಿಲ್.

8 ಫನ್ ಆಮಿ ಆಘುನ್ ಪಾಪಿ ಆಸ್ಥಾನಾಸ್ ಕ್ರಿಸ್ತಾನಿ ಆಮ್ಚಾ ಪಾಪಾ ಸಾಟಿ ಜೀವ್ ದಿಲಾ ಹ್ಯಚಿಸ್ ಲಾಗುನ್ ದೇವಾನಿ ಆಪ್ಲಿ ಮಾಯಾ ದಾವುನ್ ದಿಲಿ.

9 ಆಮಿ ಕ್ರಿಸ್ತಾಚಾ ರಕ್ತಾನಿ ದೇವಾಚೆ ಮೋರ್ಡ್ ಆಮಿ ನೀಯತಿಚ್ ಜಾಲ್ಯಾವ್ ಮನ್ವುನ್ ತ್ಯಚಿಸ್ ಲಾಗುನ್ ದೇವಾಚಾ ರಾಗಾತ್ಲಿ ಖರಾನ್ ಕೊನ್ತರಿನ್ ಚುಕ್ಪುನ್ ಗೆಥಾವ್.

10 ಮಂಜೆ ಆಮಿ ದೇವಾಚ್ ವಾದಿ ಜಾಲ್ಯಾಲ ವ್ಹತ್ತಾವ್ ತವಾಸ್ ದೇವಾನಿ ಆಪ್‌ಲ್ಯಾ ಲೇಕಾಚಾ ಮರ್ನಾನ್ ಆಮಾನಾ ಆಪ್ಲ ಸುಪ್ತಿ ಕೇಲ್ಯಾತ. ಆತಾ ಆಮಿ ದೇವಾಚ್ ಸುಪ್ತಿ ಜಾಲ್ಯಾವ್ ಆಸ ಆಸ್ಥಾನಾ ಆತಾ ಕ್ರಿಸ್ತಾಚಾ ಜೀವ್ನಾಸ್ ಲಾಗುನ್ ತ್ಯೊ ಆಮ್ಚಿ ಕಿತಿ ಖುಬ್ ರಕ್ಯನ್ ಕರಿಲ್.

11 ಯವ್ಡಸ್ ನವ್ವ ಆಮ್ಚಾ ಪ್ರಭುಜಾಲ್ಯಾಲ್ಯಾ ಯೇಸು ಕ್ರಿಸ್ತಾಸ್ ಲಾಗುನ್ ಆಮಿ ದೇವಾನಿ ಕೆಲ್ಯಾಲ್ಯಾ ಕಾಮಾನಿ ಸಂತೋಶಾನಿ ರಾಥಾವ್. ಆತಾ ಆಮಿ ದೇವಾಚ್ ಸುಪ್ತಿ ವ್ಹಯಾಚ್ ತ್ಯಚಿಪ್ಪಿಸ್.

ಆದಾಮ್ ಆನಿ ಕ್ರಿಸ್ತ

12 ಯೊಕ್ ಮಾನುಸ್ ಆದಾಮಾನಿ ಕೇಲ್ಯಾಲ್ಯಾ ಕಾಮಾನಿ ಪಾಪ್ ಹೇ ದುನೆತ್ ಆಲ. ಹ್ಯಾ ಕಾರ್ನಾನ್ ಸಗ್ಳೆ ಮಾನ್ವಾಚೆ ಭಾತಿತ್ಲಿ ಮರಾನ್ ಪಗಾಳ. ತಚಿಸ್ ಲಾಗುನ್ ಸಗ್ಳಿ ಲೋಕ ಮರಾಯಾಸ್ ವ್ಹಯಿ. ಕಾ ಮಂಜೆ ಸಗ್ಳಾ ಲೋಕಾಂಚಾನಿ ಪಾಪ್ ಕೇಲ್ಯಾ.

13 ಮೊಶೆಚಾ ಧರ್ಮಶಾಸ್ತ್ರಾರಾಚೆ ಆಂದಿ ಹೇ ದುನೆತ್ ಪಾಪ್ ಹುತ್ತ್. ಫನ್ ಧರ್ಮಶಾಸ್ತ್ರಾರ್ ಯಯಿ ಪರೆತ್ ಕುನಾಚ್‌ಪ್ ಪಾಪ್ ಮೆಜ್ಜಾಯಾ ವ್ಹಯಿತ್ ನವ್ವ.

14 ಫನ್ ಆದಾಮಾಚಾ ಕಾಲಾದರ್ನಿ ಮೊಶೆಚಾ ಕಾಲಾ ಪರತ್ ಸಗ್ಳ್ಯಾ ಲೋಕಾನಾ ಮರಾನ್ ಹುತ್ತ. ಫನ್ ಥೊಡ್ಯಾಂಚಾನಿ ಆದಾಮಾಚೆಗತ್ ದೇವಾಚಾ ಆಜ್ಞಾ ವಲ್ಯಾಂಡ್ಯಾಚೆ ಪಾಪ್ ಕೇಲ್ ನವ್ ತ್ಯನಾ ಫನ್ ಮರಾನ್ ಹುತ್ತ.

ಆದಾಮ್ ಮೋರ್ಲ್ಯಾ ದೀಸಾತ್ ಯನಾರ್ಲ್ಯಾ ಕ್ರಿಸ್ತಾಲಾ ಮೋರ್ಲ್ಯಾ ದಾವುನ್ ದೇತ್ಯಾಲಾ ಜಾಲ್ಲ್ಯಾ.

15 ಫನ್ ಆದಾಮ್ ಆನಿ ಕ್ರಿಸ್ತ ಯೇಸುಸ್ ನವ್ವ ಕಾ ಮಂಜೆ ದೇವಾಚೆ ಫುಕಟ್ ದಾನ್ ಆದಾಮಾಚಾ ಪಾಪಾಚೆಗತ್ ನವ್ವ ಹ್ಯಾ ಖರ ಹಾ ಮುಬ್ ಲೋಕ ತ್ಯಾಚಾ ಪಾಪಾನಿ ಮಿಲಿತ. ಫನ್ ದೇವಾಚಾ ಆಶಿರ್ವಾದ್ ಮುಬ್ ಮೋಟಾ ಜಾಲ್ಲ್ಯಾ ಆನಿ ತ್ಯಾಚೆ ದಾನ್ ಯೋಕ್ ಮಾನುಸ್ ಯೇಸು ಕ್ರಿಸ್ತಾಸ್ ಲಾಗುನ್ ಮುಬ್ ಲೋಕಾನಾ ಗಾವ್ಲ.

16 ಆದಾಮಾನಿ ಯಂಗ್ಡಾ ಪಾಪ್ ಕೇಲ್ಯಾವ ತ್ಯಾಲಾ ಗುನ್ನದಾರ್ ಮನ್ವುನ್ ತೀರ್ಮಾನ್ ಜಾಲ್ಲ್ಯಾ ಫನ್ ದೇವಾಚೆ ಫುಕಟ್ಟೆ ದಾನ್ ತ್ಯಾಲಾ ಆಡ್ಖ ಜಾಲ್ಲ್ಯಾ ಮುಬ್ ಪಾಪಾಸ್ ಲಾಗುನ್ ದೇವಾಚೆ ಫುಕಟ್ಟೆ ದಾನ್ ಆಲ ತ್ಯಾ ಫುಕಟ್ಟೆ ದಾನ್ ಚುಕ್ ನಸ್ಲಾಲ್ ಕರ್ತ.

17 ಯಕಾನಿ ಪಾಪ್ ಕೇಲ. ತ್ಯಾಯಕಾಸ್ ಲಾಗುನ್ ಸಗ್ಳ್ಯಾ ಲೋಕಾಂವ್ಚಿ ಮರ್ನಾಚಾ ಹುಕುಮ್ ಚಾಲಿವ್ಲಾ ಫನ್ ಯೋಕ್ ಮಾನುಸ್ ಯೇಸು ಕ್ರಿಸ್ತಾಸ್ ಲಾಗುನ್ ತ್ಯಾನಿ ಕೇಲ್ಯಾಲಿ ಹ್ಯಾ ಕಾಮಾಚಾ ಪರಿನಾಮ್ ಮುಬ್ ಮೊಟೆ ಹಾ ತೀ ಸಗ್ಳಿ ಲೋಕ ದೇವಾಚೆ ಮುಬ್ ಕ್ರಪೆ ಆನಿ ಫುಕಟ್ ತ್ಯಾಚೆ ಮೋರ್ಲ್ಯಾನಿಯತಿಚಿ ಮನ್ವುನ್ ದಾವುನ್ ದೇತ. ತೀ ಸಗ್ಳಿ ಕ್ರಿಸ್ತಾಸ್ ಲಾಗುನ್ ಜೀವ್ತಾತ್ ರಾಜ್ ಭಾರ್ ಚಾಲಿವ್ವಾರ್.

18 ಕಸ ಯಕಾ ಮಾನ್ಸಾಚೆ ಪಾಪ್ ಸಗ್ಳ್ಯಾ ಲೋಕಾನಾ ಚುಕ್ ಕರ್ತಾಲಿ ದ್ಯಾವ್. ತೇಸ್ ತರನಿ ಕ್ರಿಸ್ತಾಚೆ ಯಾಕ್ ಚಾಂಗ್ಲೆ ಕಾಮ್ ತ್ಯಾ ಸಗ್ಳ್ಯಾ ಲೋಕಾನಾ ಸ್ವತಂತ್ರ ಕರ್ತ ಆನಿ ಜೀವ್ ದೇತ.

19 ಯೋಕ್ ಮಾನುಸ್ ದೇವಾಲಾ ಆಡ್ಖ ಜಾಲ್ಲ್ಯಾ ಮನ್ವುನ್ ಸಗ್ಳಿ ಲೋಕ ಪಾಪಿ ಜಾಲ್ಲಿತ ತಸಸ್ ಯೋಕ್ ದೇವಾಲಾ ವಾಕುನ್ ಚಾಲ್ಲ್ಯಾ ಮನ್ವುನ್ ಸಗ್ಳಿ ನೀಯತಿಚಿ ವ್ಹನಾರ್.

20 ಧರ್ಮಶಾಸ್ತ್ರಾರಾಚಾ ಯನ್ಯಾನಿ ಪಾಪ ಖುಬ್ ಜಾಲ್ಹಿತ ಆನಿ ದಿಸುನ್ ಆಲಿತ ದೇವಾಚೆ ಅನುಗ್ರಹ ಖುಬ್ ಜಾಯಿತ್ ಗೆಲ.

21 ಯಕಾ ಕಾಲಾತ್ ಪಾಪಾನಿ ಮರ್ನಾಸ್ ಲಾಗುನ್ ಅಧಿಕಾರ್ ಚಾಲಿವ್ಲಾ ಫನ್ ದೇವಾನಿ ಲೋಕಾನಾ ನೀಯತಿಚ ಮನ್ವುನ್ ಕರಾಯಾ ಆಪ್ಲಿ ಕ್ರಪಾ ಲ ದಿಲಿ. ಹೀ ಕ್ರಪಾ ಆಮ್ಚಾ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಸ್ ಲಾಗುನ್ ಆಮಾನಾ ಖಾಯಿಮಚಾ ಜೀವ್ನ್ಯಾ ಆಂತಿ.

6

ಪಾಪಾತ್ ಮೇಲ್ಯಾಲಿ, ಫನ್ ಕ್ರಿಸ್ತಾಪ ಜೀವ್ ಆಸ್‌ಲ್ಯಾಲಿ

1 ತಸ ಜಾಲ್ಯಾ ತುಮಚೆ ಮನ್ವ್ ಕ್ಯಾ? ದೇವ್ ಆಮಾನಾ ಖುಬ್ ಕ್ರಪಾ ದಾವುನಿ ಮನ್ವುನ್ ಆಮಿ ಪಾಪಾತುಸ್ ಮೊರ್ಲ್ ಜಾಯಾವ್ಲಯಿ ಕ್ಯಾ?

2 ಆಜೆಬಾದ್ ನಾಹಿ! ಆಮಿ ಪಾಪಾಸಾಟಿ ಮೇಲಾವ್ ಆಸ ಆಸ್ಥಾನಾ ಪಾಪಾತ್ ಕಸಾ ಜೀವ್ನ್ಯಾ ಕರಾಯಾ ವ್ಹತ್ತೊ?

3 ಆಮಾನಾ ಖರ್ಚುನಿಸ್ ರಾವ ಹಾ ಆಮಿ ಯೇಸು ಕ್ರಿಸ್ತಾಪ ಬಾಪ್ತಿಸ್ಮಾ ಗೆತಲ್ಯಾ ಮನ್ವುನ್ ಆಮಿ ತ್ಯಾ ಯಳಾತ್ ತ್ಯಚಾ ಮರ್ನಾಚಾ ಯಳಾತ್ಲಿ ಬಾಪ್ತಿಸ್ಮಾ ಗೆತಲ್ಯಾ.

4 ಆಸ ಆಸ್ಥಾನಾ, ತ್ಯಚಾ ಮರ್ನಾತ್ ಬಾಪ್ತಿಸ್ಮಾ ಗೆತಲ್ಯಾ ಮನ್ವುನ್ ಆಮಾನಾ ಕ್ರಿಸ್ತಾ ಸಂಗ ಪುರ್ಲ್ಯಾ. ಆನಿ ತ್ಯಚಾ ಮರ್ನಾತ್ ಆನಿ ಭಾಗ್ ಜಾಲ್ಯಾವ್ ಕಾ ಮಂಜೆ ಕಸಾ ಕ್ರಿಸ್ತ ಬಾಚಾ ಮಹಿಮೆಚಾ ಬಳಾನಿ ಮರ್ನಾತ್ಲಿ ಜಿತ್ತಾ ಉಟ್ಲಾ ತಸಸ್ ಆಮಿ ನವ್ವಾ ಜೀವ್ನ್ಯಾ ಕರಾವ.

5 ಕಸ ಆಮಿ ತ್ಯಚಿ ಸಂಗ ಯೇಕ್ ವ್ಹವುನ್ ತ್ಯಚಾ ಮರ್ನಾತ್ ವಾಟೆದಾರ್ ಜಾಲ್ಯಾವ್ ತಸ ತ್ಯೊ ಜಿತ್ತಾ ವ್ಹವುನ್ ಉರುನ್ ಯತ್ಯಾಲ್ಯಾತ್ ವಾಟೆದಾರ್ ವ್ಹತ್ತಾವ್.

6 ಆಮಚಾ ಜುನ್ಯಾ ಸ್ವಭಾವ್ ಯೇಸು ಕ್ರಿಸ್ತಾ ಸಂಗ ಶಿಲ್ವೆವ ಮರುನ್ ಗೇಲಾ ಮನ್ವುನ್ ಆಮಾನಾ ರಾವಾ ಹಾ. ಕಾ ಮಂಜೆ ಪಾಪಾಚೆ ಬಳ್ ನಾಸ್ ವ್ಹವುನಿ ಮನ್ವುನ್ ಆನಿ ಆಮಿ ಮೊರ್ಲ್ ಪಾಪಾಲಾ ಗುಲಾಮ್ ವ್ಹವುನ್ ರಾಹುನಾಹಿ.

7 ಪಾಪಾಚೆ ವಾಟ್ಸೆನ್ ಮೇಲ್ಯಾಲಾ ಪಾಪಾಚಾ ಬಾನ್ನಾತ್ಲಿ ಸುಟ್ಕಾ ಛಾಲ್ಯಾ.

8 ಆಮಿ ಕ್ರಿಸ್ತಾ ಸಂಗ ಮೇಲ್ಯಾವ. ಆಮಾನಾ ಹ್ಯೊ ಇಸ್ವಾಸ್ ಹಾ ತ್ಯಚಿ ಸಂಗ ಜಿವ್ವಾ ಕರ್ನಾರ್.

9 ಕ್ರಿಸ್ತ ಮೇಲ್ಯಾಲ್ಯಾತ್ಲಿ ಜಿತ್ತಾ ವ್ಹಪುನ್ ಉರುನ್ ಆಲಾ. ತ್ಯೊ ಆನಿಕ್ ಮರಾಯಾ ವ್ಹಯೀತ್ ನಾಹಿ ಮನ್ವುನ್ ಆಮಾನಾ ರಾವ ಹಾ. ಹಿತ್ಲಿ ಮೊರ್ದ್ಕಂದಿಸ್ ಮರ್ನಾಲಾ ತ್ಯಚಿವ ಅಧಿಕಾರ್ ನಾಹಿ.

10 ತ್ಯೊ ಮೇಲ್ಯಾಲಾ ಸಗ್ಳಾಂಚೆ ಸಾಟಿ ಪಾಪಾಚೆ ವಾಟ್ಸೆನ್ ಯಂಗ್ವಾಡ್ಸ್ ಮೇಲಾ ಫನ್ ಆತಾ ತ್ಯೊ ದೇವಾ ಸಂಗ ಯೇಕ್ ವ್ಹಪುನ್ ಜೀವ್ವಾ ಕರ್ತೊ.

11 ತೇಸ್ ತರನಿ ತುಮಿ ಸಾಹಿತ್ ತುಮಚಾ ಪಾಪಾಂಚೆ ವಾಟ್ಸೆಲಾ ಮೆಲ್ಯಾಸಾ ಮನ್ವುನ್ ಆನಿ ಕ್ರಿಸ್ತ ಯೇಸುಸ್ ಲಾಗುನ್ ದೇವಾ ಸಂಗ ಜೀವ್ವಾ ಕರ್ತಾಲಿ ಮನ್ವುನ್ ನಿರ್ದಾರ್ ಕರಾ.

12 ತುಮಚಾ ನಾಸ್ ವ್ಹತ್ಯಾಲಾ ಶರೀರಾವ ಪಾಪಾನಿ ಹುಕುಮ್ ಛಾಲ್ವಾ ನಾಹಿ. ಕಾ ಮಂಜೆ ತು ಪಾಪಾಚೆ ಆಶೆತ್ ಚಾಲು ನಕೊಸ್.

13 ತುಮ್ಚಾ ಶರೀರಾಚಾ ಭಾಗ್ ಪಾಪಾಚೆ ಸೇವೆಲಾ ವಪ್ಸು ನಕೋಸಾ; ತುಮ್ಚಿ ಆಂಗ್ ಪಾಪಾಲಾ ವಪ್ಸುನ್ ಬುರ್ಸಫನ ಚಾಲಿವತ್ಯಾಲಿ ಹಾತ್ಯಾರಿ ವ್ಹಪುನಕೋಸಾ. ತ್ಯಚೆ ಬದ್ಲಿ ಮರ್ನಾತ್ಲಿ ಜಿತ್ತಾ ವ್ಹಪುನ್ ತುಮಾನಾ ತುಮಿಸ್ ದೇವಾಲಾ ಅರ್ಪನ್ ಕರಾ. ಆನಿ ತುಮಚಾ ಶರೀರಾಚ್ ಭಾಗ್ ನಿಯತಿಚಾ ಉದ್ದೆಶಾಚಾ ಉಪಯೋಗಾಸಾಟಿ ದೇವಾಚಾ ತಾಬ್ಯಾತ್ ದೇವಾ.

14 ಪಾಪ್ ತುಮಚಾ ವಡಿಲ್ ವ್ಹಯಿತ್ಲಾಹಿ. ಕಾ ಮಂಜೆ, ತುಮಿ ಧರ್ಮಶಾಸ್ತ್ರಾರಾಲಾ ಆತ್ ನಾಹಿಸಾ. ಫನ್ ಆತಾ ತುಮಿ ದೇವಾಚೆ ಕ್ರಪೆತ್ ಜೀವ್ವಾ ಕರ್ತಾಲಿ ಛಾಲ್ಯಾಸಾ.

ನೀಯತಿಚ್ ಗುಲಾಮ್

15 ಆಸ ಆಸ್ಲಾನಾ ಆಮಿ ಕ್ಯಾ ಕರಾಯಾ ವ್ಹಯಿ? ಆಮಿ ಧರ್ಮಶಾಸ್ತ್ರಾರಾಚೆಗತ್ ಆಂದಿ ದೇವಾಚೆ ಕ್ರಪೆತ್ ಹಾವ್ ಮನ್ವುನ್ ಪಾಪ್ ಕರಾಯಾ ವ್ಹಯಿ ಕ್ಯಾ? ಆಜೆಬಾದ್ ನಾಹಿ!

16 ತುಮಿ ಕುನಾಲಾ ತರಿ ತ್ಯಾ ಆಜ್ಞಾ ಪಾಳಾಯಾ ವಪ್ಪುನ್ ದೇತಾಸಾ ತ್ಯಲಾ ತುಮಿ ಧನ್ವಿ ವ್ಹತಾಸಾ ಆನಿ ತ್ಯಲಾ ಗುಲಾಮ್ ವ್ಹತಾಸಾ ಆಸ ಆಸ್ಥಾನಾ ತು ಪಾಪಾಚಾ ಗುಲಾಮ್ ವ್ಹನಾರ್ ತ್ಯಚಾ ಪರಿನಾಮ್ ಮರಾನ್ ಜಾಲ್ಯಾ ನಾಹಿತ ದೇವಾಚೆ ಮೊರ್ದುನೀಯತಿಚಾ ಮನ್ವುನ್ ದ್ಯಾವ್.

17 ಮಾಗ್ಲ್ಯಾ ಕಾಲಾತ್ ತುಮಿ ಪಾಪಾಲಾ ಗುಲಾಮ್ ಜಾಲ್ತಾಸಾ ಪಾಪಾನಿ ತುಮಾನಾ ಆಪ್ಲ್ಯಾ ಹಾತಾತ್ ದರ್ಲಿ ಹುತ್ತಿತ. ತುಮಾನಾ ಸಾಂಗ್ಲ್ಯಾಲೆ ಗುಶ್ಟಿತ್ ತುಮಿ ಪೂರ್ನ್ ಆತ್ ಜಾಲ್ಯಾಸಾ ಮನ್ವುನ್ ದೇವಾಲಾ ಸ್ತೊತ್ರ ವ್ಹವುನಿ.

18 ತುಮಿ ಪಾಪಾತ್ನಿ ಸುಟ್ಕಿ ಜಾಲ್ಯಾಸಾ. ಆತಾ ತುಮಿ ನೀಯತಿಲಾ ಗುಲಾಮ್ ಜಾಲ್ಯಾಸಾ.

19 ಲೋಕಾನಾ ಸಮಾಜ್‌ಲ್ಯಾಲಿ ಉದಾಹರನಾನಿ ಮೀ ಹ್ಯ ತುಮಾನಾ ಉಗ್ಡುನ್ ಸಾಂಗ್‌ತ್ಯೊ ಯಕಾ ಕಾಲಾತ್ ತುಮಿ ತುಮ್ಮಾ ಧಡಾಚಾ ಆಂಗಾಲಾ ಪಾಪಾಲಾ ಬುರ್ಶಾ ಫನಾಲಾ ಆನಿ ದುಶ್ಟ ಕಾಮಾಚಾ ಬುರ್ಶಾ ಉದ್ದೆಶಾಚಿ ಗುಲಾಮ್ ಜಾಲ್ತಾಸಾ. ತಸಸ್ ಆತಾ ತುಮಿ ತುಮಚಾ ಶರಿರಾಚ್ ಭಾಗ್ ಆಳಾಚಾ ರೂಪಾತ ನಿಯತಿಚಾ ಅಧಿನಾತ್ ಪವಿತ್ರ ಜಾಲ್ಯಾಲ್ಯಾ ಉದ್ದೆಶಾಸಾಟಿ ವಪ್ಪುನ್ ದೆವಾ.

20 ಕವಾ ತುಮಿ ಪಾಪಾಲಾ ಗುಲಾಮ್ ಜಾಲ್ಯಾಸಾ ಆನಿ ನೀಯತಿಚಾ ತಾಬ್ಯಾತ್ ನವ್ಡಾಸಾ.

21 ತುಮಿ ಬುರ್ಸಿ ಕಾಮ ಕೆಲ್ಯಾಸಾ. ಆತಾ ತುಮಿ ತ್ಯಾ ಕಾಮಾಚೆ ಗುಶ್ಟಿತ್ ಲಾಜ್ ವಾಟ್ನಾರ್. ತ್ಯಾ ಕಾಮಾಂಚಾನಿ ತುಮಾನಾ ಮಜ್ಜತ್ ಕೇಲೆ ಕ್ಯಾ? ನಾಹಿ. ತ್ಯಾ ಕಾಮಾಂಚಾ ಪರಿನಾಮ್ ಮರಾನ್ ಜಾಲ್ಯಾ!

22 ಫನ್ ಆತಾ ತುಮಿ ಪಾಪಾತ್ನಿ ಸುಟ್ಕಿ ವ್ಹವುನ್ ದೇವಾಚಿ ಗುಲಾಮ್ ಜಾಲ್ಯಾಸಾ. ಹ್ಯಚಾ ತುಮಾನಾ ಫಾಯಾಯ್ದಾ ಕ್ಯಾ ಮಂಜೆ ತುಮಚಾ ಜೀವ್ನ್ ತ್ಯನಾ ಅರ್ಪನ್ ಕರಾಚಾ ಆನಿ ಹ್ಯಚಾ ಪರಿನಾಮ್ ಶಾಸ್ವತ್ ಜೀವ್ ಗಿಹ್ಯಾಚಾ.

23 ಕಾ ಮಂಜೆ ಪಾಪಾಚಿ ಮಜ್ಜುರಿ ಮರಾನ್. ಫನ್ ದೇವಾಚ್ ಫುಕಟ್ ದಾನ್ ಆಮಚಾ ಪ್ರಭು ಜಾಲ್ಯಾಲ್ಯಾ ಕ್ರಿಸ್ತ ಯೇಸುಪ ಆಸ್‌ಲ್ಯಾಲಾ ಶಾಸ್ವತ್

ಜೀವ್ ಹಾ.

7

ಲಗ್ನಾಚೆ ಗುಶ್ಟಿತ್ ಯೇಕ್ ಉದಾರನ್

¹ ಬನ್ನಿ ಬಾವ್ತಾನು, ಮಿ ಕಚೆ ಗುಶ್ಟಿತ್ ಸಾಂಗ್‌ತ್ಯೊ ಮನ್ವುನ್ ತುಮಾನಾ ಸಮಾಜಲ್ಯಾ ಕಾ ಮಂಜೆ ಮೊಶೆಚಾ ಧರ್ಮಶಾಸ್ತ್ರಾಚೆ ಗುಶ್ಟಿತ್ ತುಮಾನಾ ಸಗ್ಳ್ಯಾನ್ ತಾವ ಹಾ. ತ್ಯಾ ಲೊಕ ಜೀವ್ ಆಸ ಪರೇತ್ ತ್ಯವ್ನ್ ತ್ಯಂಚಿವ ಅಧಿಕಾರ್ ಘಾಲಿವ್ತ.

² ಮೀ ತುಮಾನಾ ಯೇಕ್ ಉದಾರನೆ ದೇತೊ: ದನ್ಹೊರ್ ಜಗಪರೆತ್ ದನ್ಹರ್ ಕಾನುನಾಸ್ ಲಾಗುನ್ ತಾಬ್ಯಾತ್ ರಾಹ್ಯಾ ವ್ಹಯಿ. ಫನ್ ತಿಚಾ ದನ್ಹೊರ್ ಮೇಲ್ಯಾವ, ಲಗ್ನಾಚಾ ಕಾನುನಾನಿ ತೀ ಸುಟ್ಕಿ ಜಾಲೆ.

³ ಫನ್ ಆಪ್ಲಾ ದನ್ಹೊರ್ ಜೀತ್ಲಾ ಆಸ್ಥಾನಾಸ್ ಆನಿ ಯಕಾಲಾ ಲಗೀನ್ ಕರುನ್ ಗೇತ್ಲತ ತೀ ವ್ಯಬೀಚಾರ್ ಮಂಥ್ಯಾಲೆ ಚುಕಿಲಾ ಮುಜರಾ ಜಾಲ್ಯಾ ಮನ್ವುನ್ ಧರ್ಮಶಾಸ್ತ್ರಾರ್ ಸಾಂಗ್ತ. ಫನ್ ತೀಚಾ ದನ್ಹೊರ್ ಮರುನ್ ಗೇಲಾತ ತೀ ಲಗ್ನಾಚಾ ಹಂಗಾನಿ ಸುಟ್ಕಿ ಜಾಲೆ. ಆಸ ಆಸ್ಥಾನ ಆಪ್ಲಾ ದನ್ಹೊರ್ ಮೇಲ್ಯಾವ ಆನಿ ಯಕಾಲಾ ಲಗೀನ್ ಕರುನ್ ಗೇತ್ಲತ ತೀ ವ್ಯಬೀಚಾರ್ ಮಂಥ್ಯಾಲೆ ಚುಕಿಲಾ ಗುರಿ ವ್ಹಯಿತ್ ನಾಹಿ.

⁴ ಮಾಜಾ ಬನ್ನಿ ಬಾವ್ತಾನಾ, ಹ್ಯಾಸ್ ತರನಿ ತುಮಚ್ ಪೈಲ ಗುನ್ ಮರುನ್ ಗೇಲ; ತುಮಿ ಕ್ರಿಸ್ತಾಚಾ ದಠಾಸ್ ಲಾಗುನ್ ಧರ್ಮಶಾಸ್ತ್ರಾಚೆ ವಾಟ್ಲಿಲಾ ತುಮಿ ಮೆಲ್ಯಾಸಾ ಆತಾ ತುಮಿ ಮೇಲ್ಯಾಲ್ಯಾತ್ಲಿ ಜಿತ್ಲಾ ವ್ಹಪುನ್ ಉರುನ್ ಆಲ್ಯಾಲ್ಯಾಪ ಮಿಳುನ್ ಹಾಸಾ. ಆಮಿ ದೇವಾಚೆ ಸೇವೆಲಾ ಉಪೇಗ್ ಜಾಲ್ಯಾಲಿ ವ್ಹಪುನ್ ಫಳ್ ದಿಯಾ ಕ್ರಿಸ್ತಾ ಸಂಗ ಹಾವ್.

⁵ ಕವಾ ಆಮಿ ಪಾಪಾಚಾ ಸ್ವಭಾವಾತ್ ಜಿವ್ನ್ ಕರೀತಾವ್ ಆಮ್ಚಾ ಪಾಪಾಂಚಿ ಇಚ್ಛಾ ಧರ್ಮಶಾಸ್ತ್ರಾಸ್ ಲಾಗುನ್ ಆಮ್ಚಾ ಶರೀರಾತ್ ಹುತ್. ಕಾ ಮಂಜೆ ಆಮಿ ಮರ್ನಾಚ್ ಫಳ್ ಉತ್ಪನ್ ಕರಾಯಾ ವ್ಹಯಿ.

⁶ ಫನ್ ಆತಾ ಆಮಾನಾ ಧರ್ಮಶಾಸ್ತ್ರಾತ್ಲಿ ಸುಟ್ಕುಕ್ ಜಾಲೆ. ಕಾ ಮಂಜೆ ಕಚಾ ಧರ್ಮಶಾಸ್ತ್ರಾನಿ ಆಮಾನಾ ಬ್ಯಾಂದ್ಲ ಹುತ್. ಆಮಿ

ತೃಚಿ ಸಾಟಿ ಮೇಲ್ಯಾವ್ ಆನಿ ಆತಾ ಜುನ್ನ ಲಿವಲ್ಯಲ್ಯಾನಿ ನವ್ವ ಧರ್ಮಶಾಸ್ತ್ರಾರಾಚೆಗತ್ ನವ್ವ ಆತ್ಮಾಚೆ ನವೆ ತರನಿ ಆಮಿ ದೇವಾಚಿ ಸೇವಾ ಕರ್ತಾವ್.

ಧರ್ಮಶಾಸ್ತ್ರಾರ್ ಆನಿ ಪಾಪ್

7 ಧರ್ಮಶಾಸ್ತ್ರಾರ್ ಪಾಪಿ ಮನ್ವುನ್ ಮಿ ಸಾಂಗತ್ಯೊ ಕ್ಯಾ? ಖರ್ಯಾನಿ ನವ್ವ ಪಾಪ್ ಮಂಜೆ ಕ್ಯಾ ಮನ್ವುನ್ ಸಿಕಾಯಾ ಧರ್ಮಶಾಸ್ತ್ರಾರ್ ಯಾಕುಸ್ ಮಾರ್ಗ ಜಾಲ್ಯಾ ಧರ್ಮಶಾಸ್ತ್ರಾರ್ ನಸ್ಥತ ಬುರ್ಸಿ ಆಶಾ ಮಂಜೆ ಕ್ಯಾ ಮನ್ವುನ್ ಮನಾ ಸಮಜತ್ ನವ್ವಿ “ದುಸರ್ಯಾಂಚಾ ಸಾಮಾನಾವ ತುಮಾನಾ ಮನ್ ರಾಹು ನಾಹಿ ಮನ್ವುನ್ ಧರ್ಮಶಾಸ್ತ್ರಾರಾನಿ ಸಾಂಗಲ್ಯಾ ತ್ಯ ಮನಾ ಸಮಾಜ್.

8 ಫನ್ ಪಾಪ್ ತ್ಯಾ ಆಜ್ಞಾ ಉಪೇಗ್ ಕರುನ್ ಮಾಜಿಪ ಸಗ್ಳೆ ತರಚಾ ಬುರ್ಶೆ ಆಶತ್ಪಿಪ್ಯಾಡ್ಲ. ಮನ್ವುನ್ ತೇ ಆಜ್ಞೆನಿ ಪಾಪ್ ಮಾಜಿಪ ಆಲ. ಫನ್ ಧರ್ಮಶಾಸ್ತ್ರಾರ್ ನಸ್ಥತ, ಪಾಪ್ ಮಂಥ್ಯಾಲ ರಾಹಿತ್ ನವ್ವ.

9 ಮೀ ಧರ್ಮಶಾಸ್ತ್ರಾರ್ ಸಮಜುನ್ ಗಿಹ್ಯಾಚೆ ಆಂದಿ ಧರ್ಮಶಾಸ್ತ್ರಾರ್ ನಸಲ್ಯಾಚೆಗತ್ ಜಿತ್ತಾ ಹುತ್ಯೊ. ಫನ್ ಧರ್ಮಶಾಸ್ತ್ರಾರಾಚಾ ಆಜ್ಞಾ ಮಾಜಿಪ ಆಲ್ಯಾ ತವಾ. ಪಾಪ್ ಜೀವ್ನಾ ಕರಾಯಾ ಲಾಗ್ಲ.

10 ಮೀ ಪಾಪಾಸ್ ಲಾಗುನ್ ಆತ್ಮಾಚೆ ಮರುನ್ ಗೇಲೊ. ಜೀವ್ ಆನಾಯಾ ವ್ಹಯಿ ಜಾಲ್ಯಾಲೆ ಆಜ್ಞಾನಿ ಮನಾ ಮರಾನ್ ಆನ್ಲ.

11 ಕಾ ಮಂಜೆ ನೆಮಾನಿ ಗಾವಲ್ಯಾಲಾ ಅವ್ಕಾಶ್ ಪಾಪ್ ಉಪಯೊಗ್ ಕರುನ್ ಮನಾ ಮೊಸ್ ಕೆಲಾ ಆನಿ ತೃಚಿಸ್ ಲಾಗುನ್ ಮನಾ ಮ್ಯಾರ್.

12 ಆಸ ಆಸ್ಥಾನಾ ಧರ್ಮಶಾಸ್ತ್ರಾರ್ ನಿರ್ಮಳ್ ಹಾ, ಆನಿ ಆಜ್ಞಾ ನಿರ್ಮಳ್ ಆನಿ ಶಾರ್ಕ ಆಸ್ಲ್ಯಾಲ ಆನಿ ಚಾಂಗ್ಲ ಜಾಲ್ಯಾ.

13 ತಸ ಜಾಲ್ಯಾವ, ಚಾಂಗ್ಲ ತ್ಯಸ್ ಮನಾ ಮರಾನ್ ಆಂತ್ಯಾಲ ಮನ್ವುನ್ ಕ್ಯಾ? ಆಜೆಬಾದ್ ನಾಹಿ! ಫನ್ ಪಾಪ್ ಚಾಂಗ್ಲ ತ್ಯಸ್ ಉಪೇಗ್ ಕರುನ್ ಮನಾ ಮರಾನ್ ಆಂತ. ಹ್ಯಚಿಸ್ ಲಾಗುನ್, ಮೀ ಪಾಪಾಲಾ ಸಮಜುನ್ ಗೇತಲ್ಯಾ ಪಾಪ್ ಖುಬ್ ಬುರ್ಸ ಮನ್ವುನ್ ಆಜ್ಞಾನಿ ಸಮಾಜ್.

ಆಮ್ಚಿಪ್ಪಾ ಗೊಂದೊಳ್

14 ಧರ್ಮಶಾಸ್ತ್ರಾರ್ ಆತ್ಮಿಕ್ ಭಾಲ್ಯಾ ಮನ್ವನ್ ಮನಾ ರಾವ ಹಾ. ಫನ್ ಮೀ ಶಾರಿರಿಕ್ ಮಾನುಸ್. ಮೀ ಪಾಪಾಚಾ ಗುಲಾಮ್ ವ್ಹಪುನ್ ಇಕ್ಲಾಲ್ಯಾ ಜಾಲ್ಯೊ.

15 ಮೀ ಕರ್ತ್ಯಾಲಿ ಕಾಮ ಮನಾ ಸಮಜತ್ ನಾಹಿತ. ಕಾ ಮಂಜೆ ಮೀ ಕುಟ್ಟಿ ಚಾಂಗ್ಲಿ ಕಾಮ್ ಕರಾಯಾ ವ್ಹಯಿ ಮನ್ವನ್ ಮನ್ ಕರ್ತೊ ತೀ ಕಾಮ ಕರಾಚೆ ಆಂದಿ ಮೀ ನಕ್ವಾಟ್ ಕೇಲ್ಯಾಲ್ಯಾಲಿ ಬುರ್ಸಿ ಕಾಮಸ್ ಕರ್ತೊ.

16 ಮೀ ಕರುನಾಹಿ ಮಂಥ್ಯಾಲ ಮಿ ಕೆಲ್ಯಾವ ತ್ಯಾ ಹ್ಯಾ ದ್ಯಾವ್ತಾ ಕಾ ಮಂಜೆ ಮೀ ಧರ್ಮಶಾಸ್ತ್ರಾರ್ ಚಾಂಗ್ಲಿ ಮನ್ವನ್ ಮೀ ಗೆಥೊ.

17 ಆಸ ಆಸ್ಥಾನಾ ಹಿ ಬುರ್ಸಿ ಕಾಮ ಕರ್ತ್ಯಾಲಾ ಖರ್ಚಾನಿಸ್ ಮೀ ನವ್ವ ಮಾಜಿಪ ಆಸ್ಲಾಲ್ಯಾ ಪಾಪುಸ್ ಹೀ ಬುರ್ಸಿ ಕಾಮ ಕರ್ತ.

18 ವ್ಹಯ್, ಮಾಜಿಪ ಮಂಜೆ ಮಾಜಾ ಮಾನ್ಯಾಚಾ ಸ್ವಭಾವಾತ್ ಚಾಂಗ್ಲಿ ಕಾಯ್ ರಾಯ್ಲಿ ನಾಹಿ ಮನ್ವನ್ ಮನಾ ರಾವ ಹಾ. ಚಾಂಗ್ಲಿ ಕಾಮ ಕರಾಯಾ ಮನಾ ಮನ್ ಆಸ್ಲೆ ತರಿ ತೀ ಕರುನ್ ದಾವಾಯಾ ವ್ಹಯಿತ್ ನಾಹಿತ.

19 ಕಾ ಮಂಜೆ ಕವಾ ಮೀ ಚಾಂಗ್ಲಿ ಕಾಮ ಕರಾಯಾ ವ್ಹಯಿ ಮಂಥೊ ತ್ಯಾ ಮೀ ಕರೀತ್ ನಾಹಿ ಕಚ್ ಮೀ ಕರಾಯಾ ನಕೊ ಮಂಥೊ ತೀಸ್ ಬುರ್ಸಿ ಕಾಮ ಮೀ ಕರ್ತೊ.

20 ಆಸ ಆಸ್ಥಾನಾ, ಮೀ ಕರಾಯಾ ನಕೊ ಆಸ್ಲಾಲ್ಯಾಲಿ ಕಾಮ ಮೀ ಕಿಲಿತತ, ತೀ ಕರ್ತ್ಯಾಲಾ ಖರ್ಚಾನಿಸ್ ಮೀ ನವ್ವ ಮಾಜಿಪ ಆಸ್ಲಾಲ್ಯಾ ಪಾಪುಸ್ ತಿ ಬುರ್ಸಿ ಕಾಮ ಕರ್ತ.

21 ಆಸ ಆಸ್ಥಾನಾ, ಮೀ ಹ್ಯೊ ನೇಮ್ ಸಿಕ್ಲೊ: ಮೀ ಚಾಂಗ್ಲಿತ್ಯ ಕರಾಯಾ ಮನ್ ಕರ್ತ್ಯಾಲ, ಬುರ್ಸಿ ಮಾಜಿಪ ರಾಥ.

22 ಕಾ ಮಂಜೆ ಮಾಜೆ ಆತ್ ದೇವಾಚೆ ನೇಮಾಚೆ ಗುಚ್ಚಿತ್ ಮೀ ಸಂತೊಶ್ ವ್ಹತ್ಲೊ.

23 ಫನ್ ಮಾಜಾ ದಠಾತ್ ದುಸ್ರಾ ನೇಮ್ ಕಾಮ್ ಕರ್ತ್ಯಾಲಾ ಮಿ ಬಗ್ಲೊ. ಮಾಜೆ ಆತ್ ವ್ಹಯ್ ಮಂಥ್ಯಾಲ್ಯಾ ನೇಮಾಚೆ ಆಡ್ವಾ ತ್ಯೊ ನೇಮ್

ಲಡ್ಲೊ. ಮಾಜಾ ಮನಾತ್ ಕಾಮ್ ಕರ್ತ್ಯಾಲ್ಯಾತ್ಯಾ ಆನಿ ಯಕಾ ನೇಮಲಾ ನೇಮ್ ಪಾಪಾಚಾ ನೇಮ್ ಜಾಲ್ಯಾ ತ್ಯೊ ನೇಮ್ ಮನಾ ಆಪ್‌ಲ್ಯಾ ಪಾಪಾಚಾ ಗುಲಾಮಾತ್ ಬ್ಯಾಂತ.

24 ಮೀ ಕಿತಿ ಖೊಟ್ಯಾ ನಸಿಬಾಚಾ ಹಾ. ಮನಾ ಮರಾನ್ ಆಂತ್ಯಾಲ ಮಾಜಾ ಮನಾತ್ ಮನಾ ರಕ್ಷನ್ ಕರ್ತ್ಯಾಲಾ ಕೊನ್?

25 ದೇವುಸ್ ಮನಾ ರ್ಯಾಕ್ವಾರ್! ಆಮ್ಚಾ ಪ್ರಭುಜಾಲ್ಯಾಲ್ಯಾ ಕ್ರಿಸ್ತ ಯೇಸುಸ್ ಲಾಗುನ್ ತ್ಯನಿ ದಿಲ್ಯಾಲೆ ರಕ್ತನಿಸಾಟಿ ದೇವಾಲಾ ದನ್ಯವಾದ್ ವ್ಹವುನಿ!

ಮನ್ವುನ್ ಮಾಜಾ ಮನಾತ್ ಮೀ ದೇವಾಚಾ ನೇಮಾಲಾ ಗುಲಾಮ್ ಜಾಲ್ಯೊ ಫನ್ ಮಾಜಾ ಶರೀರಾಚಾ ಸ್ವಾಭಾವಾನಿ ಮೀ ಪಾಪಾಚಾ ನೇಮಾಚಾ ಗುಲಾಮ್ ಜಾಲ್ಯೊ.

8

ಪವಿತ್ರಾತ್ಮಾಚೆಗತ್ ಭಾಲಾಚಾ ಜೀವ್ನಾ

1 ಮನ್ವುನ್ ಆತಾ ಕ್ರಿಸ್ತ ಯೇಸುಪ ಆಸ್‌ಲ್ಯಾಲ್ಯಾ ಲೊಕಾನಾ ಗುನ್ವ ದಾರ್ ಮನ್ವುನ್ ತೀರ್ಮಾನ್ ವ್ಹಯಿತ್ ನಾಹಿ.

2 ಕಾ ಮಂಜೆ ಕ್ರಿಸ್ತ ಯೇಸುಪ ಆಸ್‌ಲ್ಯಾಲ್ಯಾ ಲೊಕಾನಾ ಜೀವ್ ಆನಾರ್ಯಾ ಪವಿತ್ರಾತ್ಮಾಚಾ ನೇಮ್ ಮನಾ ಪಾಪ ಆನಿ ಮರಾನ್ ಆಂತ್ಯಾಲ್ಯಾ ನೇಮಾತ್ಲಿ ಸುಟ್ಕೆ ಕೆಲ.

3 ಧರ್ಮಶಾಸ್ತ್ರಾರ್ ಬಳ್ ನಸ್‌ಲ್ಯಾಲ ಜಾಲ. ಕಾ ಮಂಜೆ ಆಮ್ಚಾ ಮಾನ್ಸಾಚಾ ಸ್ವಭಾವ್ ತ್ಯ ಬಳ್ ನಸ್‌ಲ್ಯಾಚೆಗತ್ ಕರ್ತ. ಆಸ ಆಸ್ಲಾನಾ ಧರ್ಮಶಾಸ್ತ್ರಾರಾಲಾ ಕರಾಯಾ ವ್ಹಯಿತ್ ನಸ್‌ಲ್ಯಾಲ ದೇವಾನಿ ಕೆಲ. ದೇವಾನಿ ಆಪ್‌ಲ್ಯಾ ಸ್ವತಾಚಾ ಲೇಕಾಲಾ ಪಾಪಾತ್ ಗಾವಲ್ಯಾಲ್ಯಾ ಮಾನ್ಸಾಚಾ ಸ್ವಭಾವಾ ಶಾರ್ಕ ಪಾಪಾಚೆ ಬದ್ಲಿಸ್ ಲಾವುನ್ ದಿಲಾ. ತ್ಯಾ ಕಾರ್ನಾನಿ ದೇವ್ ಪಾಪಾಲಾ ಮರಾನ್ ದಿಯಾ ಸಾಟಿ ಮಾನ್ಸಾಚಾ ಸ್ವಭಾವ್ ಉಪೇಗ್ ಕೇಲಾ.

4 ಆತಾ ಆಮ್ಚಾ ಸ್ವಭಾವ ಶಾರ್ಕಾ ಜೀವ್ಚಾ ಕರಾಚೆ ಆಂದಿ ಪವಿತ್ರಾತ್ಮಾ ಶಾರ್ಕಾ ಜೀವ್ಚಾ ಕರ್ತಾಲ್ಯಾ ಆಮ್ಚಾತ್ ಧರ್ಮ ಶಾಸ್ತ್ರಾರಾಚ್ ನೆಮ್ ಘಡಾಯಾ ಪಾಯ್ಚೆ ಮನ್ಶುನ್ ದೇವಾನಿ ಆಸ ಕೇಲ.

5 ಆಪ್ಲ್ಯಾ ಪಾಪಾಶಾರ್ಕಾ ಜೀವ್ಚಾ ಕರ್ತಾಲ್ಯಾ ಲೋಕ ಮಾನ್ವಾಚಾ ಸ್ವಭಾವ್ ಮಂಥ್ಯಾಲೆ ಗುಶ್ಟಿಂಚ್ ತ್ಯವ್ಡ್ ಯವಸ್‌ತ್ಯಾತ. ಫನ್ ಆತ್‌ಮ್ಯಾ ಶಾರ್ಕಿ ಚಾಲತ್ಯಾಲಿ ಲೋಕ ಆಪ್ಲಿಪ್ಪಿ ಆತ್ಮ ಮನ್ ಕರ್ತಾಲ್ಯಾ ಕಾಮಾಂಚೆ ಗುಶ್ಟಿತ್ ಯವಸ್‌ತ್ಯಾತ.

6 ಯಕಾಚಿ ಯವಜ್ಞಾ ತ್ಯಚಾ ಮಾನ್ವಾಚಾ ಸ್ವಭಾವಾಚಾ ತಾಬ್ಯಾತ್ ಆಸ್‌ಲ್ಯಾಲ ಮರಾನ್ ಜಾಲ್ಯಾ ತ್ಯಚಿಪ ಜೀವ್ ಧಂಡ್ವನ್ ರಾಧ.

7 ಕಾ ಮಂಜೆ ಯಕಾಚಿ ಯವಜ್ಞಾ ತ್ಯಚಾ ಮಾನ್ವಾಚಾ ಸ್ವಾಭಾತ್ ಆಸ್ಲಿತ ತ್ಯೊ ದೇವಾಲಾ ಆಡ್ವಾ ಜಾಲ್ಯಾ ತ್ಯೊ ದೇವಾಚಾ ನೇಮಾ ಶಾರ್ಕಾ ಚಾಲತ್ ನಾಹಿ. ಆನಿ ಕ್ಯಾ ಕರಾಯಾ ವ್ಹಯಿತುನ್ ನಾಹಿ.

8 ಆಪಲಾ ಮಾನ್ವಾಚಾ ಸ್ವಭಾವ್ ಚಾಲಿವತ್ಯಾಲಿ ತೀ ಲೋಕ ದೇವಾಲಾ ವ್ಯವ್ಯಾಳಾಯಾ ವ್ಹಯಿತ್ ನಾಹಿ.

9 ಫನ್ ತುಮಿ ತುಮಚಾ ಮಾನ್ವಾಚಾ ಸ್ವಾಭಾವ್ ಚಾಲಿವತ್ಯಾಲಿ ಜಾಲ್ಲ್ಯಾ ನಾಹಿಸಾ. ದೇವಾಚ್ ಆತ್ಮ ತುಮ್ಮಿಪ ಖರ್ಯಾನಿಸ್ ಆಸ್ಲತ ತುಮಿ ಆತ್ಮಾಚಾ ಚಾಲಿವನ್ಯಾತ್ ಗಾವಲ್ಯಾಸಾ ಕುನಾಪ ತರಿ ಕ್ರಿಸ್ತಾಚ್ ಆತ್ಮ ನಸ್ಲತ, ತ್ಯೊ ಕ್ರಿಸ್ತಾಲಾ ಮಿಳುನ್ ನಾಹಿ.

10 ತುಮಚ್ ಧಡ್ ಪಾಪಾಚೆ ಆಶೆನಿ ಕವಾಬಿ ಮೇಲ್ಯಾಚೆಗತ್ ಜಾಲ್ಯಾ ಫನ್ ಕ್ರಿಸ್ತ ತುಮ್ಮಿಪ ಆಸ್ಲತ ಆತ್ಮ ತುಮಾನಾ ಜೀವ್ ದೇತ. ಕಾ ಮಂಜೆ ಕ್ರಿಸ್ತಾನಿ ತುಮಾನಾ ನೀಯತಿಚಿ ಕೇಲ್ಯಾತ.

11 ಯೇಸುಲಾ ಮೇಲ್ಯಾಲ್ಯಾತ್ಲಿ ಜಿತ್ತಾ ಉರಿವಲ್ಯಾಲ್ಯಾಚ್ ಆತ್ಮ ತುಮ್ಮಿಪ ಆಸಲ್ಯಾವ ಕ್ರಿಸ್ತ ಯೆಸುಲಾ ಮೇಲ್ಯಾಲ್ಯಾತ್ಲಿ ಉರಿವಲ್ಯಾಲಾ ತುಮಚಿಪ ಆಸಲ್ಯಾಲ್ಯಾ ಆಪಲ್ಯಾ ಆತಮ್ಯಾನಿ ತುಮಚಿ ಮೇಲ್ಯಾಲಿ ಮಡಿ ಜಿತಿ ಕರ್ನಾರ್.

12 ಹ್ಯಚಿ ಸಾಟಿ ಮಾಜಾ ಬನ್ಲಿ ಬಾವ್ಡಾನು ಆಮಿ ಲಾಜಿಮಾತ್ ಹಾವ್ ಫನ್ ಪವಿತ್ರಾತಮ್ಯಾನಿ ಚಾಲಾಚಾ ಲಾಜಿಮಾತ್ ಹಾವ್ ತ್ಯ ಸುಡುನ್

ಶರೀರಾಚೆ ಆಶೆಚೆಗತ್ ಜಗಾಚಾ ಲಾಜಿಮಾತ್ ನವ್ವ.

13 ಕಾ ಮಂಜೆ ತುಮಚ್ ಶಾರಿರಿಕ್ ಸ್ವಭಾವ್ ಕರಾಯಾ ವ್ಹಯಿ ಮಂಥ್ಯಾಲಿ ಬುರ್ಸಿ ಕಾಮ ಕರಾಯಾ ತುಮಿ ತುಮಚ್ ಜೀವ್ಣಾ ಉಪೇಗ್ ಕೇಲಾಸಾತ ತುಮಿ ಆತ್ಮಿಕ್ ತರನಿ ಮರ್ನಾರ್ ಫನ್ ತುಮಿ ತುಮ್ಮಾ ಶರೀರಾನಿ ಕರ್ತ್ಯಾಲ್ಯಾ ಬುರ್ಶಾ ಕಾಮಾನಾ ಮರಾಯಾ ತುಮಿ ಶೊಡ್ಲಸಾತ ಪವಿತ್ರಾತ್ಮಾಚೆ ಮಘತಿನಿ ಜೀವ್ಣಾ ಕರ್ಸಿಲಾ.

14 ಕೊನ್ ಆಪ್ಲ್ಯಾಲಾ ದೇವಾಚಾ ಆತ್ಮಾಚೆಗತ್ ಘಾಲ್ವಾಯಾ ವಪ್ಸುನ್ ದೇತ್ಯಾತ ತೀಸ್ ದೇವಾಚಿ ಪೋರ ಭಾಲ್ಯಾತ.

15 ಆಮಿ ಗೆತಲ್ಯಾಲ ಆತ್ಮ ಆಮಾನಾ ಆನಿಕ್ ಗುಲಾಮ್ ಕರ್ತ್ಯಾಲ ನವ್ವ ಆನಿ ಆಮ್ಚಾತ್ ಭ್ಯಾ ಆಂತ್ಯಾಲ ನವ್ವ ಆಮಿ ಗೆತಲ್ಯಾಲ ಪವಿತ್ರಾತ್ಮ ಆಮಾನಾ ದೇವಾಚಿ ಪೋರ ಮನ್ವುನ್ ಕರ್ತ. ಹ್ಯಾಸ್ ಆತ್ಮಾಚಿ ಆಮಿ ದೇವಾಲಾ “ಬಾ ಮಾಜಾ ಬಾ ಮನ್ವುನ್ ಹಾಕಟಾವ್,

16 ಆಮಿ ದೇವಾಚಿ ಪೋರ ಭಾಲ್ಯಾವ್ ಮನ್ವುನ್ ಪವಿತ್ರಾತ್ಮ ಆಮ್ಚಾ ಆತ್ಮಾ ಸಂಗ ವಳಕ್ ದೇತ.

17 ಆಮಿ ದೇವಾಚಿ ಪೋರ ಭಾಲ್ಯಾವ್ ಮನ್ವುನ್ ಆಮಿ ತ್ಯನಿ ಆಪ್ಲ್ಯಾ ಲೊಕಾನಾ ಧೆವ್‌ಲ್ಯಾಲ್ಯಾ ಆಶಿರ್ವಾದಾನಾ ವಾರಸ್ಪಾರ್ ಭಾಲ್ಯಾವ್. ಆನಿ ದೇವಾನಿ ಕ್ರಿಸ್ತಾಸಾಟಿ ಧೆವ್‌ಲ್ಯಾಲ್ಯಾತ್ ಸಾಹಿತ್ ಕ್ರಿಸ್ತಾ ಸಂಗ ವಾರಸ್ಪಾರ್ ಭಾಲ್ಯಾವ್ ಕಾ ಮಂಜೆ ಕ್ರಿಸ್ತಾಚಾ ತರಾಸಾತ್ ಆಮಿ ವಾಟಿದಾರ್ ಭಾಲ್ಯಾವ್ ತ್ಯಚೆ ಮೈಮೆತ್ ಸಾಹಿತ್ ಆಮಿ ವಾಟಿದಾರ್ ವ್ಹನಾರ್.

ಮೊರ್ಲ್ಯಾಗಾವ್ನಾರಿ ಮೈಮಾ

18 ಮನಾ ವಾಟಿ ಆತಾ ಆಮಿ ಕಶ್ಟ ತರಾಸ್ ಗೆಥಾವ್. ಫನ್ ಆಮಾನಾ ಮೊರ್ಲ್ಯಾದೇನಾರೆ ಮೈಮೆಲಾ ಹ್ಯೊ ಕಶ್ಟ ತರಾಸ್ ಬಗ್‌ಲ್ಯಾವ ಹ್ಯೆ ಕಾಮಾಲಾ ಯಯಿತ್ನಾಹಿ.

19 ಕಾ ಮಂಜೆ ಉತ್ಪತ್ತಿ ದೇವಾಚಾ ಪೊರಾಂಚೆಸಾಟಿ ದಿಸತ್ಯಾಲ್ಯಾಲಾ ಖುಬ್ ಆತುರಾನಿ ಮೊರ್ಲ್ಯಾ ಬಗಿತ್ ಹಾ.

20 ಕಾ ಮಂಜೆ ಸ್ರಶ್ಚಿ ಆಪ್ಲಿ ಆಶಾ ನಸ್‌ಲ್ಯಾಚೆಗತ್ ಜಾಲ್ತಿ ಆಪ್‌ಲ್ಯಾ ಸ್ವತಾಚಾ ಉದ್ದೆಶಾನಿ ನವ್ವ ತ್ಯಚಿ ಇಚ್ಛಾಬಿ ನವ್ವ ಫನ್ ಆಸ ವ್ಹಯಾ ವ್ಹಯಿ ಮನ್ಹುನ್ ದೇವಾಚಿ ಇಚ್ಛಾ ಹುತ್ರಿ. ತ್ಯಲಾ ಸ್ರಶ್ಚಿ ವಾಟ್ ಬಗೀತ್ ಹಾ.

21 ಸಗ್ಳಿ ಸ್ರಶ್ಚಿ ಯೆಕ್ ದಿಸ್ ಆಪ್ಲು ನಾಸ್ ವ್ಹಪುನ್ ಜಾತ್ಯಾಲ್ಯಾ ಗುಲಾಮಾನ್ನಿ ಸುಟ್ಕುಕ್ ವ್ಹಪುನ್ ಆನಿ ದೇವಾಚಾ ಪೊರಾಂಚ್ ಮೈಮೆನಿ ಬರ್ಲ್ಯಾಲ್ಯಾ ಸ್ವಾತಂತ್ರ್ಯಾತ್ ವಾಟಿದಾರ್ ವ್ಹತ್ತ.

22 ಕಾ ಮಂಜೆ ಸ್ರಶ್ಚಿ ಆತಾಚಾ ಯಳಾ ಪರತ್ ಪೈಲ್ಯಾ ಯಳಾಚಾ ದುಖಾಚೆಗತ್ ಲೊಳತ್ ಹಾ ಮನ್ಹುನ್ ಆಮಾನಾ ರಾವ ಹಾ.

23 ತ್ಯವ್ಹಸ್ ನವ್ವ ಫನ್ ಆತ್ಮಾಚ್ ಪೈಲ ಫಳ್ ಮನ್ಹುನ್ ಗೆತಲ್ಯಾಲಿ ಆಮಿ ಸಾಹಿತ್ ಆಮ್ಚೆಸಾಟಿ ಖುಬ್ ಆಶೆನಿ ದೇವಾಚಿ ಪೊರ ವ್ಹಯಾಲಾ ಸ್ವತಂತ್ರ್ಯಾಲಾ ಆಮ್ಚಾ ಶರೀರಾಚೆ ಸುಟ್ಕುಕಿಲಾ ರ್ಯಾಕ್‌ತ್ಯಾವ್.

24 ಆಮಿ ರಕ್ಯನ್ ಗೆತ್ಲೆ ಫನ್ ಆಮಿ ಬಗ್‌ಲ್ಯಾಲಿ ಆಶಾ ಖರಾಚಿ ಆಶಾ ನವ್ವ ಕಾ ಮಂಜೆ ಆತಾತರಿ ಬಗ್‌ಲ್ಯಾಲ್ಯಾಲಾ ಕೊನ್ದರಿ ಆಶಾ ಕರಾಚ್ ಹಾ ಕ್ಯಾ?

25 ಫನ್ ಆಮಿ ಬಗ್‌ಲ್ಯಾ ನಸ್‌ಲ್ಯಾಲ್ಯಾಲಾ ಆಮಿ ಆಶಾ ಕೆಲ್ಯಾವ ಆಮಿ ತ್ಯಲಾ ಥಂಡ್ವನಾನಿ ರ್ಯಾಕ್‌ತ್ಯಾವ್.

26 ತಸಸ್ ಆಮಿ ಬಳ್ ನಸ್‌ಲ್ಯಾಲಿ ಜಾಲ್ಯಾವ್ ಮನ್ಹುನ್ ಆಮಾನಾ ಬಳ್ ನಸ್‌ಲ್ಯಾಲ್ಯಾತ್ ಪವಿತ್ರಾತ್ಮಾ ಆಮಾನಾ ಮಜ್ಜತ್ ಕರ್ನಾರ್. ಕಾ ಮಂಜೆ ಆಮಿ ಕಸ ಮಾಗ್ನ ಕರಯಾ ವ್ಹಯಿ ಆನಿ ಕಶಾಸಾಟಿ ಮಾಗ್ನ ಕರಾಯಾ ವ್ಹಯಿ ಮನ್ಹುನ್ ಆಮಾನಾ ಸಮಜ್ಜತ್ ನಾಹಿ. ಫನ್ ಪವಿತ್ರಾತ್ಮ ಆಪ್ಲುಸ್ ಆಮ್ಚೆಸಾಟಿ ದೇವಾಪ ಪೊಡಾಯಾ ವ್ಹಯಿತ್ ನಸ್‌ಲ್ಯಾಲ ಮಾಗ್ನ ಕರ್ತೊ.

27 ಮನ್ ಬಗ್‌ತ್ಯಾಲ್ಯಾ ದೇವಾಲಾ ಪವಿತ್ರಾತ್ಮಾಚಾ ಮನಾತ್ಲ ಸಗ್ಳಿ ರಾವ ಹಾ. ಕಾ ಮಂಜೆ ದೇವಾಚಾ ಮನಾಚೆಗತುಸ್ ಪವಿತ್ರಾತ್ಮ ದೇವಾಚಾ ಲೊಕಾಂಚೆಸಾಟಿ ದೇವಾಲಾ ಆವ್ಡ ಶಾರ್ಕ ಕರ್ತ.

28 ದೇವ್ ಆಪ್‌ಲ್ಯಾಲಾ ಮಾಯಾ ಕರ್ತ್ಯಾಲ್ಯಾಂಚೆ ಭಾಂಗಲ್ಯಾಸಾಟಿ ಪರತೀಕ್ ಕಾಮ ಕರ್ತೊ ಮನ್ಹುನ್ ಆಮಾನಾ ರಾವ ಹಾ. ತ್ಯಾ

ಲೋಕಾನಾ ದೇವಾನಿ ನಿವಡ್‌ಲ್ಯಾಲಿ, ಕಾ ಮಂಜೆ ತೀ ತ್ಯಚಿ ಯವಜ್ಞಾ ಜ್ಞಾಲಿ.

29 ಕುನಾಲಾ ದೇವಾನಿ ಪೈಲೆ ದರ್ನಿ ನಿವ್ಡನ್ ಗೇತ್ಲ ಹುತ್ಲ. ಲೇಕಾಚೆಗತ್ ವ್ಹಯಾ ವ್ಹಯಿ ಮನ್ವನ್ ನಿರ್ದಾರ್ ಕೇಲಾ. ಆಸ ಆಸ್ಥಾನಾ, ಇಸ್ಥಾಸಾತ್ ಆಸ್‌ಲ್ಯಾಲ್ಯಾ ಲೋಕಾನಾ ಲ್ಯೊಕುಸ್ ಆಂದಿಚ್ಚಾ ವ್ಹಯಾ ವ್ಹಯಿ.

30 ಆಸ ಆಸ್ಥಾನಾ ಕುನಾ ಕುನಾಲಾ ತ್ಯನಿ ಹಾಕ್ಪುನ್ ನಿವಡ್‌ಲ್ಯಾತ ಆನಿ ಕುನಾಕುನಾಲಾ ತ್ಯನಿ ಹಾಕಟ್‌ಲ್ಯಾತ ತ್ಯನಾ ತ್ಯೊನಿಯತಿಚಿ ಕರ್ತೊ. ಆನಿ ಆಪ್ಲೆ ಮೈಮಾತ್ ವಾಟದಾರ್ ಕರ್ತೊ.

ಕ್ರಿಸ್ತ ಯೇಸುಪ ದೇವಾಚಿ ಮಾಯಾ

31 ಆಸ ಆಸ್ಥಾನಾ ಹ್ಯಚೆ ಗುಪ್ತಿತ್ ಆಮಿ ಕ್ಯಾ ಸಾಂಗುಯಾ? ದೇವ್ ಆಮ್ಚಿ ಸಂಗ ಆಸ್ಥಾನಾ, ಆಮಾನಾ ಆಡ್ಚಿ ಯತ್ಯಾಲ ಕೊನ್ ಹಾ?

32 ದೇವ್ ಆಪ್‌ಲ್ಯಾ ಸ್ವತಾಚಾ ಲೇಕಾಲಾ ಉರ್ವುನ್ ಗಿಹ್ಯಾಚೆ ಆಂದಿ ಆಮ್ಚೆ ಸಗ್‌ಳ್ಯಾಂಚೆ ಸಾಟಿ ವಪುನ್ ದಿಲಾ. ಮನ್ವನ್ ಆತಾ, ದೇವ್ ಯೇಸು ಸಂಗ ಆಮಾನಾ ಸಗ್ಳು ಫುಕಟ್ ದಿಯಾಚೆ ಆಂದಿ ರಾಹಿಲ್ ಕ್ಯಾ?

33 ದೇವಾನಿ ನಿವಡ್‌ಲ್ಯಾಲ್ಯಾ ಲೋಕಾಂಚಿವ ಕೊನ್ ಗುನ್ನಾ ವಾವ್ನಾರ್? ದೇವಾನಿ ತ್ಯನಾ ಗುನ್ನದಾರ್ ನವ್ವ ಮನ್ವನ್ ನಿರ್ನಯ್ ಕೇಲಾ!

34 ಆಸ ಆಸ್ಥಾನಾ ತ್ಯನಾ ಭುಕಿಚ್ ಮನ್ವನ್ ಕೊನ್ ಸಾಂಗ್ತಾರ್? ಮೇಲ್ಯಾಲಾ ಕ್ರಿಸ್ತ ಯೇಸು ತ್ಯೊ ಮರ್ನಾತ್ಲಿ ಉಟ್‌ಲ್ಯಾ ಆನಿ ದೇವಾಚೆ ಉಜ್ವಾಂಗ್ನಿ ಬಸ್ಲಾ ಆನಿ ತ್ಯೊ ಆಮ್ಚಿ ಸಾಟಿ ದೇವಾಪ ಇನಂತಿ ಕರ್ತೊ.

35 ಆಸ ಆಸ್ಥಾನಾ ಆಮಾನಾ ಕ್ರಿಸ್ತಾಚೆ ಮಾಯೆತ್ಲಿ ದುರ್ ಕರ್ನಾರಾ ಕೊನ್ ಹಾ? ಕಶ್ಟ್ ತರಾಸ್, ಸಂಕಟ್ ನಾಹಿತ ಭುಕ್ ವ್ಹವುನಿ ಗರಿಬ್ತಿತಿ ಕ್ಯಾ ಅಪಾಯ್, ಮರಾನ್ ಕ್ಯಾ?

36 ಪವಿತ್ರ ಗ್ರಂಥಾತ್ ಆಸ ಲಿವ್‌ಲ್ಯಾಲ ಹಾ.

“ತುಮ್ಚೆಸಾಟಿಸ್ ಆಮಿ ಸಗ್‌ಳ್ಯಾ ಯೆಕಾತ್ ಮರ್ನಾಚೆ ತಾವ್ಡತ್ ಹಾವ್

ಕಾಪಾಯಾ ನೆಥ್ಯಾಲ್ಯಾ ಮೆಂಡ್ರಾಚೆಗತ್ ವ್ಯವಾರ್ ಕೆಲ್ಯಾ ”
ಕೀರ್ತನೆ 44:22

37 ಫನ್ ಆಮ್ಚೆ ಸಾಟಿ ಆಪ್ಲಿ ಮಾಯಾ ಕೆಲ್ಯಾಲ್ಯಾ ಹೇ ಸಗ್ಳೆ ಖಿನ್ನತಿತ್ ಆಮಾನಾ ಪೂರ್ನ್ ಜೀತ್ ಹಾ.

38 ವ್ಹಯ್, ಕ್ರಿಸ್ತಾಚೆ ಮಾಯೆತ್ಲಿ ಆಮಾನಾ ಕಚಾಲಾಸ್ ಯಗಳಾಯಾ ವ್ಹನಾರ್ ನಾಹಿ ಮನ್ವುನ್ ಮನಾ ಖರ್ಚ್ಯಾನ್ ಸಮಾಜ್‌ಲ್ಯಾ ಮರಾನ್ ವ್ಹವುನಿ, ಜಿವ್ ವ್ಹವುನಿ ದೇವ್ ದುತ್ ವ್ಹವುಂತ, ಅಧಿಕಾರಿ ವ್ಹವುಂತ ಹ್ಯಾ ಕಾಲಾತ್ ವ್ಹವುನಿ ಮೊರ್ಲ್ಯಾ ಕಾಲಾತ್ ವ್ಹವುನಿ

39 ನಾಹಿತ ಹೆ ದುನೆಚಾ ವೈಲ್ಯಾ ಖಿನ್ನತಿ ವ್ಹವುಂತಾ ಬುಡ್‌ಲ್ಯಾ ಖಿನ್ನತಿ ವ್ಹವುಂತಾ ಉತ್ಪನ್ ಕೇಲ್ಯಾಲಿ ಕುಟ್ಲೆ ಸಾಮ್ ವ್ಹವುಂತ ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚ್ಚಿ ದಾವುನ್ ಆಲ್ಯಾಲೆ ದೇವಾಚೆ ಮಾಯೆನಿ ಆಮಾನಾ ಯಗಳಾ ವ್ಹನಾರ್ ನಾಹಿ.

9

ದೇವ್ ಆನಿ ತ್ಯಚಿ ಮಾನ್ಯ

1 ಮೀ ಕ್ರಿಸ್ತಾಪ ಹಾ ಆನಿ ತುಮಾನಾ ಖರ ಸಾಂಗ್ತೊ. ಮಿ ಲಬಾಡ್ ಸಾಂಗಿತ್ ನಾಹಿ. ಮಾಜಾ ಯವಜ್ಜಾ ಪವಿತ್ರಾತ್‌ಮ್ಯಾನ್ ಚಾಲಿವ್ನಾರ್‌ಲ್ಯಾ ಜಾಲೆ. ತೀಸ್ ಮಾಜಿ ಮನಾಚಿ ವಳಕ್.

2 ಮನಾ ಖುಬ್ ದುಖ್ ಹಾ ಆನಿ ಮಾಜಾ ಮಾನಾತ್ ಕವಾಬಿ ಪಿಡಾ ಹಾ.

3 ತೀ ಮಾಜ ಭನ್ವಿಭಾಹು ಜಾಲ್ಯಾತ; ಹೇ ದುನೆಚಾ ಕುಟ್ಮಾತ್ ಜಾಲ್ಯಾತ. ತ್ಯನಾ ಮಜತ್ ಕರಾಯಾ ಕ್ರಿಸ್ತಾಲಾ ಸುಡುನ್ ಸರಾಪ್ ಗಿಯಾ ಆಸ ವ್ಹವು ಸಕ್ತ.

4 ತೀ ಇಸ್ರಾಯೇಲಾಚಿ ಲೊಕ ಜಾಲ್ಯಾತ. ತ್ಯನಾ ಆಪ್ಲಿ ಪೊರ ಮನ್ವುನ್ ಕೆಲ್ಯಾತ ಆನಿ ಆಪ್ಲಿ ಮೈಮಾ ತ್ಯನಾ ದ್ಯಾವ್ಲೆ; ತ್ಯನಿ ತ್ಯಂಚಿ ಸಂಗ ಕರಾರ್ ಕೆಲ. ಆನಿ ಧರ್ಮಶಾಸ್ತಾರ್ ದಿಲ ತ್ಯಂಚಿಪ ಖರ್ಚ್ಯಾಚಿ ಆರಾದಾನ್ ಹಾ; ತೀ ದೇವಾಚಿ ವಾಗ್ದಾನ್ ಗೆತಲ್ಯಾಲಿ ಜಾಲ್ಯಾತ;

5 ತೇ ಆಮ್ನಾ ಹಿಬ್ರಿಯಾ ವಡ್ಲಾಂಚಿ ಪಿಳ್ಳಿ ಜಾಲ್ಯಾತ; ಆನಿ ಮಾನ್ಸಾಚಾ ರುಪಾತ್ ಕ್ರಿಸ್ತ ತ್ಯಂಚಾ ಕುಳಾತ್ಲಾ ಜಾಲ್ಯಾ ಸಗ್ಳಾಂವ ರಾಜ್ ಭಾರ್ ಚಾಲಿವತ್ಯಾಲ್ಯಾ ದೇವಾಲಾ ಕವಾಬಿ ಸ್ತೊತ್ರ ವ್ಹಪುನಿ! ಆಮೇನ್.

6 ಮೀ ಆಸ ಸಾಂಗಿತ್ ನಾಹಿ. ದೇವಾನಿ ಅಪ್ಲ ವಚನ್ ಪೂರ್ನ್ ಕೇಲ ನಾಹಿ ಮನ್ವುನ್ ಸಾಂಗಿತ್ ನಾಹಿ ಇಸ್ರಾಯಾಲಾಚಿ ಸಗ್ಳಿ ಲೊಕ ಸಾಹಿತ್ ದೇವಾಚಿ ಲೊಕ ನವ್ತ.

7 ನಾಹಿತ ಅಬ್ರಹಾಮಾಚೆ ಪಿಳ್ಳಿತ್ಲಿ ಸಗ್ಳಿ ದೇವಾಚಿ ಪೊರ ನವ್ತ. ದೇವಾನಿ ಅಬ್ರಹಾಮಾಲಾ ಸಾಂಗ್ಲ ಮೀ ತುಲಾ ಸಬ್ದ ದೇತೊ ಇಸಾಕಾಪ್ಪಿ ಯತ್ಯಾಲಿ ಪಿಳ್ಳಿ ತ್ಯವ್ಹಿ ತುಜಿ.

8 ಹ್ಯಚಾ ಅರ್ಥ ಕ್ಯಾ ಮಂಜೆ ಶರೀರಾಚಾ ಸಮಂದಾನಿ ಜಲಾಮ್ಲ್ಯಾಲಿ ಸಗ್ಳಿ ದೇವಾಚಿ ಪೊರ ನವ್ತ. ವಾಗ್ದಾನಾನಿ ಜಲಾಮ್ಲ್ಯಾಲಿ ದೇವಾಚಿ ಪೊರ ಖರಿ ಪಿಳ್ಳಿ ಜಾಲೆ.

9 ಕಾ ಮಂಜೆ ದೇವಾನಿ ತ್ಯಲಾ, “ನೇಮಸ್ಲ್ಯಾಲ್ಯಾ ಕಾಲಾತ್ ಮೀ ಮಾಗಾರಾ ಪರಾತ್ಲೊ. ತವಾ ಸಾರಳಲಾ ಯೋಕ್ ಲ್ಯೊಕ್ ರಾನ್ಹಾರ್. ” ಮನ್ವುನ್ ವಾಗ್ದಾನ್ ಕೇಲ.

10 ತ್ಯವ್ಹಿ ನವ್ತ ರೆಬೆಕಾಲಾಬಿ ದೋಗ ಪ್ಯೊರ್ಗ ಹುತ್. ತ್ಯಾ ದೊಗಾನಾಬಿ ಯೋಕುಸ್ ಬಾ. ತ್ಯೊಸ್ ಆಮಚಾ ವಡಿಲ್ ಜಾಲ್ಯಾಲಾ ಇಸಾಕ್.

11 ತೇ ದೋಗ ಪ್ಯೊರ್ಗ ಜಲ್ಮಾಚೆ ಆಂದಿ ನಾಹಿತ ಚಾಂಗ್ಲ ನಾಹಿತ ಬುರ್ಸ ಕರಾಚೆ ಆಂದಿ ದೇವಾನಿ ಆಪ್ಲ್ಯಾ ಉದ್ದೆಶಾಲಾ ನಿವಡ್ಲಾಲೆಸಾಟಿ ಆಸ ಸಾಂಗ್ಲ.

12 ತೇ ಕರ್ತ್ಯಾಲ್ಯಾ ಕಾಮಾಸಾಟಿ ತ್ಯನಾ ಹಾಕಟ್ಲ ನಾಹಿತ. ತ್ಯಂಚಾ ಹಾಕಟ್ಲ್ಯಾ ಸಾಟಿ ತ್ಯನಿ ತಿಲಾ, “ಥೊರ್ಲಾ ದಾಕ್ಟ್ಯಾಚಿ ಸೇವಾ ಕರ್ನಾರ್” ಮನ್ವುನ್ ಸಾಂಗ್ಲ.

13 ತಸಸ್, ಮೀ ಯಾಕೊಬಾಚಿ ಮಾಯಾ ಕಿಲಿ ಫನ್ ಏಸಾವಲಾ ವಿರೊದ್ ಕೇಲಾ. ಮನ್ವುನ್ ಪವಿತ್ರ ಗ್ರಂಥ ಸಾಂಗ್ಲ.

14 ತಸ ಜಾಲ್ಯಾವ ಆಮಿ ದೇವಾಲಾ ಅನೇವ್ ಕರ್ತ್ಯಾಲಾ ಮನ್ವುನ್ ಸಾಂಗಾಯಾ ವ್ಹಯಿಲ್ ಕ್ಯಾ? ಖರ್ಯಾನಿಸ್ ನಾಹಿ.

15 ಕಾ ಮಂಜೆ ದೇವಾನಿ ಮೊಶೆಲಾ ಮೀ ಕುನಾಲಾ ಕರುನಾ ದಾವಾಯಾ ವ್ಹಯಿ ಮಂಥೊ ತ್ಯಲಾಸ್ ಕರುನೆ ದ್ಯಾವ್ನಾರ್ ಮೀ ಕುನಾಲಾ ಕನಿಕಾರ್ ದಾವಾಯಾ ವ್ಹಯಿ ಮಂಥೊ ತ್ಯನಾಸ್ ಕನಿಕಾರ್ ದ್ಯಾವ್ನಾರ್ ಮನ್ವುನ್ ಸಾಂಗ್ಲೆ.

16 ಆಸ ಆಸ್ಥಾನಾ ಸಗ್ಳ ಮಾನ್ಸಜಾಲ್ಯಾಲಿ ಆಮಿ ಕ್ಯಾ ಕರ್ತ್ಯಾವ್ ನಾಹಿತ ಆಮಾನಾ ಕ್ಯಾ ವ್ಹಯಿ ಮಂಥ್ಯಾಲ್ಯಾವ ಆಧಾರ್ ನಾಹಿ. ಫನ್ ನಿಸ್ಫ ದೇವಾಚಾ ಕರುನಾವ ಆಧಾರ್ ವ್ಹವುನ್ ಹಾ.

17 ಪವಿತ್ರ ಪುತಿಕಾತ್ ದೇವಾನಿ ಈಜಿಪ್ತಾಚಾ ರಾಜಾಲಾ, “ಮಿ ತುಲಾ ಮಾಜಿ ಬಳ್ ದಾವಾಯಾ ವ್ಹಯಿ ಮನ್ವುನ್ ಮಾಜಿ ನಾವ್ ದುನೆತ್ ಸಗ್ಳ ಪಗಳಾಯಾ ವ್ಹಯಿ ಮನ್ವುನ್ ತುಲಾ ರಾಜಾ ಕೇಲ್ಯಾ ಮನ್ವುನ್ ಸಾಂಗ್ಲೆ.

18 ಮನ್ವುನ್ ದೇವ್ ಕುನಾಲಾ ಕರುನೆ ದಾವಾಯಾ ವ್ಹಯಿ ಮಂಥೊ ತ್ಯಲಾ ಕರುನೆ ದ್ಯಾವ್ನೊ. ದೇವ್ ಕುನಾಲಾ ಹರೊಳಾ ಕರಾಯಾ ವ್ಹಯಿ ಮಂಥೊ ತ್ಯಲಾಸ್ ಹರೊಳಾ ಕರ್ತೊ.

ದೇವಾಚಾ ರಾಗ್ ಆನಿ ದಯಾ

19 ಫನ್, ತುಮ್ಚಾತ್ಲಾ ಕೋನ್ ತರಿ ಮನಾ, “ಆಸ ಆಸ್ಥಾನಾ, ಕೋನ್ ತರಿ ಚುಕಿತ್ ಹಾ ಮನ್ವುನ್ ಕಸಾ ಶೊದ್ನಾರ್? ದೇವಾಚಾ ಸಬ್ದಾಲಾ ಆಡ್ವಾ ಯನಾರಾ ಕೋನ್?

20 ಫನ್, ಯೇ ಮಾನ್ಸಾ ದೇವಾಲಾ ಆಡ್ವ ಬೊಲಾಯಾ ತು ಕೋನ್? ಯಕಾ ಮಾತಿಚಾ ಮೊಗ್ಯಾನಿ ಆಪ್ಲ್ಯಾಲಾ ಘಡಿವಲ್ಯಾಲ್ಯಾಲಾ ತು ಮನಾ ಆಸ ಘಡಿವ್ಲಸ್ ಕಾ ಮನ್ವುನ್ ಇಚಾರಾಲಾ ವ್ಹಯಿಲ್ ಕ್ಯಾ?

21 ಕುಂಬಾರ್ ಆಪ್ಲ್ಯಾಲಾ ಮನ್ ಯಯಿಚೊಗ ಯಕಾಸ್ ಮಾತಿಚಾ ಉಂಡ್ಯಾನಿ ದುಸ್ರಿ ದುಸ್ರಿ ಗ್ಯಾಡ್ಲಿ ಘಡ್ವಿತ್ ನಾಹಿ ಕ್ಯಾ? ತ್ಯೊ ಯಾಕ್ ಚಾಂಗಲ್ಯಾ ಕಾಮಾಲಾ ವಾಪ್ರಾಯಾ ಆನಿ ಯಾಕ್ ಕಸ್ಲ್ಯಾಬಿ ಕಾಮಾಲಾ ವಾಪ್ರಾಯಾ ಸಾಟಿ ಘಡಿವ್ಲೊ.

22 ದೇವಾನಿ ಕೇಲ್ಯಾಲ ಸಾಹಿತ್ ಹ್ಯಾಸ್. ತ್ಯೊ ಆಪ್ಲಾ ರಾಗ್ ದಾವುನ್, ಆಪ್ಲ ಬಳ್ ಲೋಕಾನಾ ದಾವಾಯಾ ವ್ಹಯಿ ಮನ್ಲಾತ. ತ್ಯೊ ಆಪ್ಲ್ಯಾ

ರಾಗಾತ್ ಗಾಹುನ್ ನಾಶ್ ವ್ಹತ್ಯಾಲ್ಯಾ ಲೋಕಾನಾ ಖುಬ್ ಥಂಢ್ವನಾನಿ ಸುಸ್ವನ್ ಗಿತ್ತಿತ.

23 ದೇವಾನಿ ಆಪ್ಲಿ ಪುಸ್ತಕ್ ಮೈಮೆ ದಾವಾಯಾ ವ್ಹಯಿ ಮನ್ವನ್ ಥಂಢ್ವನಾನಿ ವಾಟ್ ಬಗಿತಾ. ಆಪ್ಲಿ ಕರುನಾ ಗೆತಲ್ಯಾಲ್ಯಾ ಲೋಕಾನಾ ದೇವಾನಿ ತೀ ಮೈಮಾ ದಿಯಾ ವ್ಹಯಿ ಮನ್ಲಾ. ಆಪ್ಲಿ ಮೈಮಾ ಗಿಹ್ಯಾವ್ಹಯಿ ಮನ್ವನ್ ದೇವಾನಿ ತ್ಯಾ ಲೋಕಾನಾ ತಯಾರ್ ಕಿಲಿತ.

24 ಕಾ ಮಂಜೆ ತ್ಯನಿ ಹಾಕಟ್ಲ್ಯಾಲ್ಯಾಲಿ ಲೋಕ ಆಮಿಸ್. ದೇವಾನಿ ಆಮಾನಾ ಯೆಹುದ್ಯಾತ್ಲಿ ತ್ಯವ್ಹಸ್ ನವ್ವ ಯೆಹುದಿ ನಸ್ಲ್ಯಾಲ್ಯಾತ್ಲಿಬಿ ಹಾಕ್ಲಿತ.

25 ಪವಿತ್ರ ಗ್ರಂಥಾಚ್ ಹೋಶಯಚ್ ಪುಸ್ತಕ್ ಹೇ ತರನಿ ಲಿವಲ್ಯಾ.

“ಮಾಜಿ ನಸ್ಲ್ಯಾಲಿ ಲೋಕ

ಮಾಜಿ ಲೋಕ ಮನ್ವನ್ ಸಾಂಗ್ಲೊ.

‘ಮಾಜಿ ಮಾಯೆಚಿ ನಸ್ಲ್ಯಾಲ್ಯಾನಾ

ಮಾಜಿ ಮಾಯೆಚಿ ಮನ್ವನ್ ಸಾಂಗ್ಲಾರ್’ ಹೋಶಯ 2:23

26 ಆನಿ

ಕಚಾ ಜಾಗ್ಯಾತ್,

‘ತುಮಿ ಮಾಜಿ ಲೋಕ ನವ್ವಸಾ ಮನ್ವನ್ ಸಾಂಗ್ಲ್ಯಾ ತ್ಯಾಸ್ ಜಾಗ್ಯಾವ ತ್ಯನಾ ಜೀವ್ ಆಸ್ಸಾರ್ ದೇವಾಚಿ ಪೋರ’ ಮನ್ವನ್ ಹಾಕಟ್ಲಾರ್.

27 ತ್ಯವ್ಹಸ್ ನವ್ವ ಯೇಶಾಯನಿ ಇಸ್ರಾಯಲಾಚೆ ಗುಶ್ಟಿತ್ ವರ್ಡುನ್ ಸಾಂಗ್ಲ್ಯಾ

“ಸಮಿಂದೊರಾಪ ಆಸ್ಲ್ಯಾಲೆ ವಾಳ್ವಚೆಗತ್ ಇಸ್ರಾಲ್ ಲೆಖ್ಯಾತ್ ನಸ್ಲ್ಯಾಲಿ ಜಾಲ್ಯಾತ.

ಫನ್ ತ್ಯಾ ಲೋಕಾತ್ ಥುಡಿ ತ್ಯವ್ಹಿಸ್ ರಕ್ಯನ್ ಗೆನಾರ್;

28 ವ್ಹಯ್ ಪ್ರಭು ಧರ್ಥಿವ್ಲ್ಯಾ ಲೋಕಾನಾ ಆಪ್ಲಿ ಬುಲಿ ಪಾಟ್ಕ್ಯಾನಿ ಕರುನ್ ಸುಪಿವ್ಲಾರ್. ”

29 ಹ್ಯಕಸ ಮಂಜೆ ಯೇಶಾಯನಿ ಆಂದಿ ಸಾಂಗ್ಲ್ಯಾ ಶಾರ್ಕ:

“ಸರ್ವ ಶಕ್ತ ಜಾಲ್ಯಾಲ್ಯಾ ಪ್ರಭುನಿ ಆಮ್ಚಿಸಾಟಿ ಥೊಡ್ಯಾ ಪಿಳ್ಳಿತ್‌ಲ್ಯಾನಾ
ಥೆವ್ಚ ನಸ್ತತ.

ತ್ಯನಿ ಆಸ ಕೇಲ್ಯಾ ನಸ್‌ಲ್ಯಾವ
ಆಮಿ ಸದೋಮಾಚೆಗತ್
ಗೊಮೊರಾಚೆಗತ್ ರಾಹಿತಾವ್. ”

ಇಸ್ರಾಲ್ ಸಾಟಿ ಪೌಲಾಚ್ ಮಾಗ್ತು

³⁰ ಹ್ಯಾಚಾ ಅರ್ಥ್ ಕ್ಯಾ ಮಂಜೆ, ಯೆಹುದ್ಯಾ ನಸ್‌ಲ್ಯಾಲಿ ನೀಯತಿಚಿ
ವ್ಹಯಾ ಯತ್ನ ಕರಿತ್ ನವ್ಹಿತ. ತೇ ಇಸ್ರಾಸಾನಿ ತ್ಯಚಿ ಸಂಗ ನೀಯತಿಚಿ
ಜಾಲಿತ.

³¹ ತ್ಯಾಸ್ ಯಳಾಲಾ ಇಸ್ರಾಯೆಲಾಚಿ ಲೋಕ ಆಪ್‌ಲ್ಯಾಲಾ ನೀಯತಿಚಿ
ಕರಾಯಾ ಯೊಕ್ ನಿಯಮ್ ಸುದಿತ ಫನ್ ತ್ಯ ತ್ಯನಾ ಗಾವ್ಲ ನಾಹಿ.

³² ತ್ಯನಾ ಕಾ ಗಾವ್ಲ ನಾಹಿ? ಕಾಮಾನಿ ನೀಯತಿಚಿ ವ್ಹಯಾಲಾ
ತ್ಯಂಚಾನಿ ಯತ್ನ ಕಿಲಿತ ಫನ್ ಇಸ್ರಾಸಾಚಾ ಅದಾರ್ ಕೆಲಾ ನಾಹಿ. ಲೋಕ
ದೊಂಡ್ಯಾಚಿ ರ್ಯಾಸ್ ಲಾಗುನ್ ಪಡ್ಲಿತ.

³³ ಪವಿತ್ರ ಪುತಿಕ್ ತ್ಯಾ ದೊಂಡ್ಯಾಚೆ ಗುಶ್ಟಿತ್ ಆಸ ಸಾಂಗ್ತ.

“ಹಬಕ್, ಮೀ ಸಿಯೋನಾತ್ ಯೋಕ್ ದೊಂಡಾ ಥೆವ್ಚೊ.

ಹ್ಯಾ ದೊಂಡ್ಯಾನಿ ಲೋಕ ರ್ಯಾಸ್ ಲಾಗುನ್ ಪಡ್ಲಾರ್.

ಫನ್ ತ್ಯಾ ದೊಂಡ್ಯಾವ ಇಸ್ರಾಸ್ ಥೆವ್ಚಾರಾ ಕಂದಿಸ್ ಫಸ್ಕಾರ್ ನಾಹಿ.”

10

¹ ಮಾಜಾ ಭನ್ವಿ ಭಾವ್ವಾನು, ಮಾಜಿ ಲೋಕ ರಕ್ಷನ್ ಗಿಹ್ಯಾ ವ್ಹಯಿತ
ಮನ್ವುನ್ ಮನಾ ಖುಬ್ ಆಶಾ ಹಾ. ಮೀ ದೇವಾಪ ತ್ಯಂಚಿಸಾಟಿ ಮಾಗ್ತು
ಕರ್ತೊ.

² ತ್ಯನಾ ದೇವಾಪ ಖುಬ್ ಭಕ್ತಿ ಹಾ ಹ್ಯಲಾ ಮೀ ವಳಕ್ ದೇತೊ. ಫನ್
ತ್ಯಂಚಿ ಭಕ್ತಿ ಖರ್ಚಾಚಾ ಗಿನ್ಯಾನಾವ ಟೆಕುನ್ ನಾಹಿ.

³ ದೆವಾಪ್ಪಿ ಗಾವತ್ಯಾಲಿ ನೀಯತ್ ತ್ಯನಾ ರಾವಿ ನಸ್ತಾನಾ ಸ್ವತಾಚಿ
ನಿಯೆತ್ ಸ್ತಾಪನ್ ಕರಾಯಾ ವ್ಹಯಿ ಮನ್ವುನ್ ದೆವಾಚೆ ನಿಯೆತಿಲಾ ವಾಕ್ಲಿ
ನಾಹಿತ.

4 ಆಪ್ಲಿವ ಇಸ್ವಾಸ್ ಥೆವ್ವಾರಾ ಪರತೇಕ್ ಜಾನ್ ನೀತಿಚ್ಹಾ ತೀರ್ಮನ್ ವ್ಹಯಾಸಾಟಿ ಕ್ರಿಸ್ತಾನಿ ದರ್ಮಶಾಸ್ತಾರ್ ಪೂರ್ನ್ ಕೇಲ.

ಸಗ್ಳ್ಯಾನಾ ರಕ್ಷನ್

5 ಧರ್ಮಶಾಸ್ತಾರಾಚ್ ಐಕುನ್ ತ್ಯಚಿಗತ್ ಚಾಲತ್ಯಾಲಾ ನಿಯತಿಚ್ಹಾ ಮನ್ವುನ್ ಗೆಥ್ಯಾಲ್ಯಾಸ್ ಲಾಗುನ್ ಮೊಶೆನಿ ಆಸ ಲಿವ್‌ಲ್ಯಾ “ಧರ್ಮಶಾಸ್ತಾರ್ ಕೊನ್ ಪ್ಯಾಳ್ತೊ ತ್ಯೊಜೀವ್ನಾ ಕರ್ತೊ. ”

6 ಫನ್ ಇಸ್ವಾಸಾನಿ ದೇವಾಚೆ ಮೊರ್ಲ್ಡ್ ನಿಯತಿಚ್ಹಾ ಮನ್ವುನ್ ಗೆಥ್ಯಾಲ್ಯಾಸ್ ಲಾಗುನ್ ಪವಿತ್ರ ಪುತೀಕ್ ಆಸ ಸಾಂಗ್ತ, “ತು ತುಲಾಸ್ ಕಾಯ್ ಆಸ ಇಚಾರು ನಕೊಸ್ ಕ್ರಿಸ್ತಾಲಾ ಸ್ವರ್ಗಾತ್ಲಿ ಖಾಲ್ ಹಾಕ್ಚುನ್ ಆನಾಯಾ ಕೊನ್ ಜಾನಾರ್?”

7 ನಾಹಿತ ತುಲಾಸ್ ತು ಆಸ ಇಚಾರು ನಕೊಸ್ ಕ್ರಿಸ್ತಾಲಾ ಮೇಲ್ಯಾಲ್ಯಾತ್ಲಿ ಆನಾಯಾ ಪಾತಾಳಾತ್ ಕೊನ್ ಜಾನಾರ್?

8 ಪವಿತ್ರ ಪುತೀಕ್ ಆಸ ಸಾಂಗ್ತ, “ದೇವಾಚಿ ವಚನ ತುಮ್ಚೆ ಜವಳುಸ್ ಹಾತ. ತಿ ತುಮ್ಚಾ ತೊಂಡಾತ್ ತುಮ್ಚಾ ಮನಾತ್ ಹಾತಾ” ಹೀಸ್ ಇಸ್ವಾಸಾಚಿ ವಚನ ಪರಚಾರ್ ಕರ್ತಾವ್.

9 ಫನ್ ಯೇಸುಸ್ ಪ್ರಭು ಮನ್ವುನ್ ತುಜಾ ತೊಂಡಾನಿ ಸಾಂಗ್ಲತ ಆನಿ ದೇವಾನಿ ಕುನಾಲಾ ಮರ್ನಾತ್ಲಿ ಉರಿವಲ್ಯಾ ತ್ಯಚಿವ ತುಮಿ ಇಸ್ವಾಸ್ ಥೆವ್ವಾಸಾತ ತುಮಿ ರಕ್ತನ್ ಗೆನ್ಹಾರ್.

10 ಕಾ ಮಂಜೆ ವ್ಹಯ್ ಆಮಿ ಆಮ್ಚಾ ಮನಾತ್ ಇಸ್ವಾಸ್ ಥೆವ್‌ಲ್ಯಾಲ್ಯಾಸ್ ಲಾಗುನ್ ನಿಯತಿಚಿ ವ್ಹನಾರ್ ಇಸ್ವಾಸ್ ಥೆವ್ತಾವ್ ಮನ್ವುನ್ ತೊಂಡಾನಿ ಸಾಂಗ್‌ತ್ಯಾಲ್ಯಾನಿ ರಕ್ತನ್ ಗೆಥಾವ್.

11 ಪವಿತ್ರ ಪುತೀಕ್ ಆಸ ಸಾಂಗ್ತ, “ಕೋನ್ ತ್ಯಚಿವ ಇಸ್ವಾಸ್ ಥೆವ್ಚೊ ತ್ಯೊಫಸತ್ ನಾಹಿ”

12 ಕಾ ಮಂಜೆ ಯೆಹುದ್ಯಾನಾ ಯೆಹುದಿ ನಸ್‌ಲ್ಯಾಲ್ಯಾನಾ ಕಾಯ್ ಫರಕ್ ನಾಹಿ. ಸಗ್ಳ್ಯಾನಾ ಯೋಕುಸ್ ಪ್ರಭು ದೇವ್. ಕೋನ್ ಹಾಳಿ ಮ್ಯಾರ್ತೊ ತ್ಯಲಾ ತ್ಯೊಮಿಬ್ ಆಶಿರ್ವಾದ್ ದೇತೊ.

13 ಪವಿತ್ರ ಪುತೀಕ್ ಸಾಂಗ್‌ತ್ಯಾಚೆಗತ್ ಕೋನ್ ಪ್ರಭುಚಾ ನಾವಾನಿ ಹಾಕಟೊ ತ್ಯಲಾ ರಕ್ತನ್ ವ್ಹನಾರ್. *

14 ಫನ್ ಕೋನ್ ತ್ಯಚಿವ ಇಸ್ವಾಸ್ ಧಿವಿತ್ ನಾಹಿ ತ್ಯಲಾ ಕಸಿ ಹಾಳಿ ಮ್ಯಾರ್? ಕಚಾನಿ ಪ್ರಭುಚ್ ವಚನ್ ಐಕ್ಲ ನಾಹಿ ತ ತೀ ತ್ಯಚಿಪ ಇಸ್ವಾಸ್ ಕಸಾ ಥೆವ್ನಾರ್? ಆನಿ ಯಕಾನಿ ಸಾಂಗಾಚೆ ಆಂದಿ ಪ್ರಭುಚೆ ಗುಶ್ಟಿತ್ ಐಕಾಚ್ ತರಿ ಕಸ?

15 ಪ್ರಚಾರ್ ಕರಾಯಾ ಕುನಾಲಾ ಲಾವುನ್ ದಿಲಾ ನಾಹಿ ಮಂಜೆ ತ್ಯೊ ಪ್ರಚಾರ್ ಕರ್ನಾರ್ ಕಸಾ? ಮನ್ವುನ್ ಪವಿತ್ರ ಪುತಿಕಾತ್ ಸಾಂಗ್‌ತ್ಯಾ ಶಾರ್ಕ ಚಾಂಗ್ಲಿ ಖಬರ್ ಸಾಂಗ್‌ತ್ಯಾಂಲ್ಯಾಂಚಿ ಪಾವ್ಲ ಕ್ಯವ್ಲಿ ಶಾದ್ರಿ ಹಾತ್ತ್! †

16 ಫನ್ ಸಗ್ಳಾಂಚಾನಿ ಬರಿ ಖಬರ್ ಗೀತ್ಲಿ ನಾಹಿ. ಯೇಶಾಯ್ ಸಾಂಗ್ಲೊ, “ಪ್ರಭು ಆಪ್ಲಿ ವಚನ ಕುನಿ ಐಕ್ಲಿತ್ ಇಸ್ವಾಸ್ ಥೆವ್ಲಾ? ‡

17 ಆಸ ಆಸ್ತಾನಾ ವಚನ ಐಕ್‌ನ್ಯಾನಿ ಇಸ್ವಾಸ್ ಯತೊ. ವಚನ್ ಐಕ್‌ತಾನಾ ಇಸ್ವಾಸ್ ಯತೊ ಆನಿ ಕ್ರಿಸ್ತಾಚಾ ವಾಕ್ಯಾ ಐಕ್ತಾನಾ ಬಾಪ್ಲಿ ಯತಿ.

18 ಫನ್ ಲೋಕಾಂಚಾನಿ ಬರಿ ಖಬರ್ ಐಕ್ಲಿ ನಾಹಿಕ್ಯಾ? ಮನ್ವುನ್ ಮೀ ಪ್ರಶ್ನೆ ಕರ್ತೊ. ವ್ಹಯ್ ತೆಂಚಾನಿ ಐಕ್ಲ ಪವಿತ್ರ ಪುತೀಕ್ ಸಾಂಗ್ತ. ತ್ಯಂಚ್ ನಾದ್ ದುನೆತ್ ಸಗ್ಳ ಪಗಾಳ. ತ್ಯಂಚಾ ಬೊಲ್ಯಾ ಪರಪಂಚಾತ್ ಸಗ್ಳಿಕ್ ಗೇಲ್ಯಾ

19 ಪರ್ತುನ್ ಮೀ ಐಕ್‌ತ್ಯೊ ಕ್ಯಾ ಇಸ್ರಾಯೆಲ್ ಲೋಕಾನಾ ಸಮಜ್‌ತ್ ನವ್ತ ಕ್ಯಾ?

ಮೊಶೆ ಸ್ವತಾ ಆಪ್ಲು ಸಾಂಗ್ಲೊ ಮೀ ತುಮ್ಚಾ ಮನಾತ್ ಆಸ್‌ಲ್ಯಾ ಲೋಕಾಂಚಿಸ್ ಲಾಗುನ್ ಖರಿ ನವ್ವಜಾಲ್ಯಾಂಚಿಪ್ಪಿ ತುಮ್ಚಾ ಮನಾತ್ ಖೊಟ ಫನ್ ಯಯಿಜೊಗ ಕರೀನ್ ಆನಿ ಮೂರ್ಕ ರಾಶ್ಟ್ರಾಂಚಿಪ್ಪಿ ತುಮಾನಾ ರಾಗ್ ಯಯಿ ಶಾರ್ಕಾ ಕರ್ತೊ.

* 10:13 ಯೇವೆಲ್ 2:32 † 10:15 ಯೇಶಾಯ್. 52:7. ‡ 10:16 ಯೇಶಾಯ್ 53:1

20 ನಂತರ್ ಯೆಶಾಯ್ ಧಿರ್ದ್ವಾನಿ ಸಾಂಗ್ತೊ. ಮನಾ ಸೊದಾಚೆ ಆಂದಿ ಆಸ್‌ಲ್ಯಾಲ್ಯಾ ಲೋಕಾಂಚಾನಿ ಬಗ್ಲಾ ಮಾಜಿಸಾಟಿ ಮಾಗಿತ್ ನಸ್‌ಲ್ಯಾಲ್ಯಾ ಲೋಕಾನಾ ಮೀ ದಿಸ್ಲೊ.

21 ಫನ್ ಇಸ್ರಾಯೆಲಾಂಚೆ ಗುಶ್ಟಿತ್ ತ್ಯೊ ಆಸಾ ಸಾಂಗ್ತೊ. “ಮೀ ಸಗ್ಳ್ಯಾ ದಿಸಾತ್ ಆಜ್ಞಾ ಪಾಳಿತ್ ನಸ್‌ಲ್ಯಾಲ್ಯಾನಾ ಆನಿ ವಾದಿಂಚೆ ಮೊರ್ದ್ವಾಹಾತ್ ಪಗಳುನ್ ರಾಯ್ಲೊ.”

11

ಇಸ್ರಾಯೆಲಾಂಚಿವ ದೇವಾಚಿ ಕರ್ನಾ

1 ತಸ ಭಾಲ್ಯಾವ, “ದೇವಾನಿ ಆಪ್‌ಲ್ಯಾ ಲೋಕಾಂಚಿ ನಕ್ಷಾಟ್ ಕಿಲಿ ಕ್ಯಾ? ಮನ್ವುನ್ ಮೀ ಇಚಾರ್ತೊ. ನಾಹಿ ಖರ್ದ್ಯಾನಿಸ್ ನಾಹಿ! ಮೀ ಯೋಕ್ ಇಸ್ರಾಲ್ ಭಾಲ್ಯೊ ಮೀ ಅಬ್ರಹಾಮಾಚಾ ಕುಟ್ಮಾತ್ಲಾ ಬೆನ್ಯಾಮಿನಾಚಾ ಕುಳಾತ್ಲಾ ಭಾಲ್ಯೊ.

2 ಇಸ್ರಾಲ್ ಜಲ್ಮಾಚೆ ಆಂದಿ ದೇವಾನಿ ತ್ಯನಾ ಆಪ್ಲಿ ಲೊಕ ಮನ್ವುನ್ ನಿವ್ವುನ್ ಗಿತ್ಲಿತ. ತ್ಯನಿ ತ್ಯನಾ ಬಾಹಿರ್ ಥಕಲ್ಲಿ ನಾಹಿತ. ಎಲಿಯಾಚೆ ಗುಶ್ಟಿತ್ ಪವಿತ್ರ ಪುತಿಕ್ ಕ್ಯಾ ಸಾಂಗ್ತ ಮನ್ವುನ್ ತುಮಾನಾ ಖರ್ದ್ಯಾನಿಸ್ ರಾವ ಹಾ: ಇಸ್ರಾಲ್‌ಚಾ ಲೋಕಾಂಚೆ ಆಡ್ವ ಎಲಿಯಾನಿ ದೇವಾಲಾ ಕೇಲ್ಯಾಲ್ಯಾ ಮಾಗ್‌ನ್ಯಾಚೆ ಗುಶ್ಟಿತ್ ತ್ಯಾತ್ ಲಿವ್‌ಲ್ಯಾ.

3 “ಪ್ರಭು, ಲೋಕಾಂಚಾನಿ ತುಜಾ ಪ್ರವಾದಿನಾ ಮಾರುನ್ ಟ್ಯಾಕ್ಲ ತುಜಾ ಬಲಿ ದಿಯಾಚಿ ಭಾಗ ನಾಸ್ ಕೆಲಾ. ಪ್ರವಾದಿತ್ ಮೀಯಕ್ಲಾಸ್ ಆಜುನ್ ಜಗಲ್ಯೊ ಆತಾ ಲೊಕ ಮನಾ ಮಾರುನ್ ಟಾಕಾಯಾ ಯತ್ನ ಕರ್ತಾತ್”

4 ಫನ್ ದೇವಾನಿ ಎಲಿಯಾಲಾ ದಿಲ್ಯಾಲಾ ಉತ್ತರ್ ಕ್ಯಾ? “ಬಾಳ್ ಮಂಥ್ಯಾಲ್ಯಾ ಲಬಾಡ್ ದೇವಾಲಾ ಆರಾದಾನ್ ಕರಾಚೆ ಆಂದಿ ಆಸ್‌ಲ್ಯಾಲ್ಯಾ ಸಾತ್ ಹಾಜಾರ್ ಲೋಕಾನಾ ಮಿ ಮಾಜಿಸಾಟಿ ಥೆವ್‌ಲ್ಯಾತ್.” ಮನ್ವುನ್ ಉತ್ತರ್ ದಿಲಾ.

5 ತಸಸ್ ಆತಾಬಿ. ದೇವ್ ಆಪ್ಲೆ ಕ್ರಪಾನಿ ನಿವಡ್‌ಲ್ಯಾಲಿ ಧುಡಿಸ್ ಲೊಕ ಹಾತ್.

6 ದೇವಾಚೆ ಕ್ರಪೆನಿ ನಿವಡ್‌ಲ್ಯಾಲಿ ತೀ ದೇವಾಚೆ ಲೊಕ ಜಾಲ್ಯಾಲಿ ಆಪ್‌ಲ್ಯಾ ಕಾಮಾನಿ ನವ್ವ ಕಾ ಮಂಜೆ ದೇವಾಚೆ ಕ್ರಪೆನಿ. ತೇ ತ್ಯಂಚಾ ಕಾಮಾನಿಸ್ ಜಾಲ್ಯಾಲ ಅಸ್ಥತ ಹೀ ತ್ಯಚಿ ಕ್ರಪಾ ಖರಿ ಜಾಲ್ಲ್ಯಿ ನಸ್ಲಿ.

7 ಮನ್ವುನ್ ಜಾಲ್ಯಾಲಿ ಖನ್ಕತ್ ಯವ್ಹಿಸ್: ಇಸ್ರಾಯಲಾಚಾ ಲೋಕಾಂಚಾನಿ ನಿಯತಿಚಿ ವ್ಹಯಾ ಯತ್ನ ಕಿಲಿತ. ಫನ್ ತ್ಯಂಚಿಪ್ಪಿ ಜಾಲ್ಲ್ಯಾ ನಾಹಿ ಆಸ ಆಸ್ಲಾನಾ ದೇವಾಪ್ಪಿ ನಿವಡ್‌ಲ್ಯಾಲಿ ಧುಡಿ ಲೋಕ ನೀಯತಿಚಿ ಜಾಲ್ಲಿತ. ಫನ್ ಉರ್ಲ್ಯಾಲಿ ಲೋಕ ಕರಿನ್ ವ್ಹಪುನ್ ದೇವಾಚ್ ಸಾಂಗ್ಲಿ ಐಕ್ಲ ನಾಹಿ.

8 ಪವಿತ್ರ ಪುತೀಕ್ ಆಸ ಸಾಂಗ್ಲಿ. “ಲೋಕಾನಾ ಸಮಜುನಾಹಿ ಆಸ ದೇವಾನಿ ತ್ಯನಾ ಮಂದ್ ಕಿಲಿತ. ” ತೇ ಆಜುನ್ ಪರತ್ ಡೊಳ ಆಸ್ಲ ತರಿ ದಿಸತ್ ನಸ್‌ಲ್ಯಾಚೆಗತ್. ಕಾನ್ ಆಸ್ಲ ತರಿ ಐಕು ಯಯಿನಾಹಿಜೊಗ ಕೆಲ. *

9 ಆನಿ ದಾವಿದ್ ಆಸಾ ಮಂಥೊ: “ತ್ಯಂಚ್ ಜೇವಾನುಸ್ ತ್ಯನಾ ಘಾಸಿ ಆನಿ ಬಲಿ ಜಾಲಿತ ತ್ಯನಾ ಪ್ಯಾಡ್ಲಿತ ಆನಿ ಶಿಕ್ಷೆತ್ ಗಾವ್ಲಿತ!.

10 ತ್ಯಂಚ್ ಡೊಳ ಆಂದ್ಲ ವ್ಹಪುಂತ ಕಾ ಮಂಜೆ ತ್ಯನಾ ದಿಸು ನಾಹಿ. ಖಾಯಿಮ್ಜಾ ವಜ್ಜಾನಿ ಪಾಠಿಲಾ ಡೂಗ್ ಯವುನಿ. ”

11 ಆಸ್ ಆಸ್ಲಾನಾ ಮೀ ಇಚಾರ್ತೊ ತೇ ಪಡುನ್ ನಾಸ್ ವ್ಹಯಾ ಗಸಾರ್ಲ್ಯಾ ಕ್ಯಾ? ಖರ್ಯಾನಿಸ್ ನವ್ವ ಕಾ ಮಂಜೆ ತ್ಯಂಚಾನಿ ಪಾಪ್ ಕೇಲ್ಯಾ ಮನ್ವುನ್ ಯೆಹುದಿ ನಸ್‌ಲ್ಯಾಲ್ಯಾನಾ ರಕ್ಷನ್ ಗಾವ್ಲಿ ಕಾ ಮಂಜೆ ತ್ಯಂಚಿವ ಯೆಹುದ್ಯಾಂಚ್ ಖೊಟೆಫನ್ ಕರಾಯಾ ವ್ಹಯಿ.

12 ಯೆಹುದ್ಯಾಂಚಾ ಪಾಪಾನಿ ದುನೆಲಾ ಖುಬ್ ಆಶಿರ್ವಾದ್ ತ್ಯಂಚ್ ಪಡ್ಲ ಯೆಹುದಿ ನಸ್‌ಲ್ಯಾಲ್ಯಾ ಲೋಕಾನಾ ಖುಬ್ ಆಶಿರ್ವಾದ್ ಆನಾಯಾ ಕಾರನ್ ಜಾಲ್ಲ್ಯಾತ್. ಆನಿ ತ್ಯಂಚಾ ಆತ್ಮಿಕ್ ಗರಿಬ್ ತಿಥಿನಿ ಯೆಹುದಿ ನಸ್‌ಲ್ಯಾಲ್ಯಾನಾ ಮೋಟಾ ಆಶಿರ್ವಾದ್ ಗಾವ್ಲಾ ಯಕ ವೇಳಿ ಸಗ್ಳೆ

* 11:8 ಧರ್ಮೋಪದೇಶಕಾಂಡ್ 29:4

ಯೆಹುದಿ ಹಿತ್ತ ಯವುನ್ ಮಿಳಾಲತ ಆಸ್ಲಾ ಆಶಿರ್ವಾದ್ ಕೃವ್ವಾ ಮೊಟಾ ಆಸಲ್!

ಯೆಹುದಿ ನಸ್‌ಲ್ಯಾಲ್ಯಾ ಲೋಕಾಂಚಿ ರಕ್ಷಣ್

13 ಆತಾ ಮೀ ಯೆಹುದಿ ನಸ್‌ಲ್ಯಾಲ್ಯಾ ಲೋಕಾಂಚೆ ಗುಶ್ಟಿತ್ ಬೊಲ್‌ತ್ಯೊ ಮೀ ತ್ಯನಾ ಅಪೋಸ್ತಲ್ ವ್ಹಪುನ್ ರಾಹಿ ಪರತ್. ಮಿ ಕರ್ತ್ಯಾಲ್ಯಾ ಕಾಮಾಲಾ ವವ್ಯಾಳುನ್ ಗೆಥೊ.

14 ಮಿ ಮಾಜಿ ಸ್ವತಾಚಿ ಲೊಕ್ ಖೊಟಫನ್ ಕರ್ತ್ಯಾಲ್ಯಾ ಥೊಡ್ಯಾಂಚಾನಿ ತರಿ ರಕ್ಯನ್ ಗಿಹಿಬೊಗ ಕರಿನ್ ಮನ್ಯಾಚಿ ಆಶಾ ಮಾನಾ ಹಾ.

15 ಕಾ ಮಂಜೆ ಯೆಹುದಿ ಲೋಕಾಂಚಾನಿ ನಕ್ವಾಟ್ ಕಿಲಿ ಮನ್ವುನ್ ಜಗತ್ ದೇವಾ ಸಂಗ ಯೇಕ್ ಜಾಲಿ ಫನ್ ತ್ಯಂಚಾನಿ ಗೆತಲ್ಯಾವ ಕ್ಯಾ ಘಡ್ನಾರ್? ಮೇಲ್ಯಾಲ್ಯಾನಾ ಜೀವ್ ಗಾವತಾ ನವ್!

16 ಬಾಕ್ರಿಚಾ ಪೈಲಾ ತುಕ್ಡಾ ದೇವಾಲಾ ದಿಲಾತ. ಸಗ್ಳಿ ಬಾಕ್ರಿ ಪವಿತ್ರ ಜಾಲ್ಲ್ಯಿ ಮುಳ ದೇವಾಲಾ ದಿಲತ ಖಾಂಡ್ಯಾಬಿ ತ್ಯಾಚಾಸ್ ಜಾಲ್ಯಾ.

17 ಫನ್ ಥೊಡ್ಯಾ ಖಾಂಡ್ಯಾ ಮುಡುನ್, ಆಲಿವ್ ಭಾಡಾಚಿ ಖಾಂಡಿ ಯೇಕ್ ಆಂದಿಚಾ ಆಲಿವ್ ಭಾಡಾಲಾ ಲಾಗಲ್ಯಾಚೆಗತ್ ಹಾ. ಯೆಹುದಿ ನಸ್‌ಲ್ಯಾಲಿ ತುಮಿ ಖಾಂಡ್ಯಾಚೆಗತ್ ಹಾಸಾ. ಆನಿ ಆತಾ ತುಮಿ ಯೆಹುದ್ಯಾಂಚಾ ಬಳಾಚಾ ಆತ್ಮಿಕ್ ಜೀವ್ವಾಚಿ ತರನಿ ತುಮಿ ವಾಟೆದಾರ್ ಜಾಲ್ಯಾಸಾ.

18 ಮನ್ವುನ್ ಮೊಡಲ್ಯಾಲ್ಯಾ ತ್ಯಾ ಖಾಂಡಿಚಾ ಗಾಳ್ ಕರುನೋಸಾ. ತ್ಯಂಚಾ ಗಾಳ್ ಕರಾಯಾ ತುಮಾನಾ ಕಚ್‌ಸ್ ಕಾರನ್ ನಾಹಿ ಕಾ ಮಂಜೆ ತುಮಿ ಮೂಳಾಲಾ ಆದಾರ್ ದಿಯಿತ್ ನಾಹಿಸಾ ಮುಳ್ ತುಮಾನಾ ಆದಾರ್ ದೇತ.

19 ಫನ್ ತುಮಿ ಆಸ ಸಾಂಗು ಸಕ್ತ. “ಆಮಿ ತ್ಯಾ ಭಾಡಾಚೆ ಖಾಂಡಿನಾ ಮಿಳಾಯಾ ವ್ಹಯಿ ಮನ್ವುನ್ ತ್ಯಾ ಖಾಂಡ್ಯಾ ಮೊಡಲ್ಯಾ”

20 ತ್ಯಾ ಖರ. ತ್ಯನಾ ಇಸ್ವಾಸ್ ನವ್ಲಾ ಮನ್ವುನ್ ತ್ಯನಾ ತ್ಯೊಡಲ್ಯಾ ತುಮಾನಾ ತ್ಯಾತ್ ಮೀಳ್ವಿ ಹುತ್ತಿತ ತುಮಾನಾ ತ್ಯಾತ್ ಇಸ್ವಾಸ್ ಹುತ್ತಾ ಮನ್ವುನ್ ತುಮಿ ಹ್ಯಾತ್ ದಿಮಾಕ್ ಕರು ನಕೋಸಾ ಭೆ ರಾಹುನಿ.

21 ಸ್ವಭಾವಿಕ್ ಖಾಂಡ್ಯಾಚೆಗತ್ ಅಸ್‌ಲ್ಯಾಲ್ಯಾ ಯೆಹುದಿನಾಸ್ ದೇವಾನಿ ಶುಡ್ಲಿ ನಾಹಿತ. ತುಮಾನಾ ಸುಡಿಲ್ ಮನ್ವನ್ ಸಮಾಜಲಾಸಾ ಕ್ಯಾ?

22 ಮನ್ವನ್ ದೇವ್ ದಯಾ ಆಸ್‌ಲ್ಯಾಲಾ ಜಾಲ್ಯಾ ಆನಿ ಖುಬ್ ಕರಿನ್ ಜಾಲ್ಯಾ ಮನ್ವನ್ ಸಮಜಾ. ದೇವ್ ಆಪ್ಲೆ ಮಾಗ್ನಿ ಯಯಿತ್ ನಸ್‌ಲ್ಯಾಲ್ಯಾ ಲೋಕಾನಾ ಶಿಕ್ಯಾದೇತೊ. ಫನ್ ತು ದೇವಾಚೆ ದಯೆಚಾ ಆದಾರ್ ಕೇಲಾಸ್ತ. ದೇವ್ ತುಲಾ ದಯಾ ಆಸ್‌ಲ್ಯಾಲಾ ಜಾಲ್ಯಾ ನಾಹಿತ, ತುಲಾ ತುಡುನ್ ಟ್ಯಾಕ್ವಾರ್.

23 ಇಸ್ರಾಯೆಲಾಂಚಿ ಸಂಗ ಆಘುನ್ ಬೆಇಸ್ವಾಸಾನಿ ಥಾಂಬ ನಸ್ತಾನಾ ತ್ಯನಾ ಕಸಿ ಕರ್ನಾರ್. ದೆವಾಲಾ ತ್ಯನಾ ಆನಿಕ್ ಕಸಿ ಕರಾಯಾ ಶಕ್ಯಾಹಾ.

24 ರಾನಾಚಿ ಥ್ಯಾಳ್ ಯೇಕ್ ಚಾಂಗಲ್ಯಾ ಝಾಡಾಚಿ ಥ್ಯಾಳ್ ವ್ಹಯಾಚಿ ಸೊಪ ನವ್ವ. ಫನ್ ಯೆಹುದಿ ನಸ್‌ಲ್ಯಾಲಿ ತುಮಿ ರಾನ್ ಆಲಿವ್ ಭಾಡ್ವಾತ್ಲಿ ತ್ಯೊಡ್‌ಲ್ಯಾಲಿ ಥಾಳಿ ವ್ಹವುನ್ ಫನ್ ತ್ಯ ಪ್ರಖರತಿಲಾ ಆಡ್ಲಿ ಜಾಲ್ಯಾಲಿ ಚಾಂಗ್ಲೆ ಆಲಿವ್ ಭಾಡಾಲಾ ಮಿಳಿವ್‌ಲ್ಯಾಚೆಗತ್ ಹಾಸಾ. ಫನ್ ಯೆಹುದಿ ತ್ಯಾಸ್ ಭಾಡಾಚಿ ತ್ಯೊಡ್‌ಲ್ಯಾಲಿ ಥಾಳ್ವಿ ಜಾಲ್ಯಾತ ಆಸ ಆಸ್ತಾನಾ ದೇವಾಲಾ ಕ್ಯವ್ ಸಲ್ಪ ಆಸಲ್ ತ್ಯೊಡ್‌ಲ್ಯಾಲ್ಯಾ ತ್ಯಾಸ್ ಭಾಡಾಲಾ ಮಿಳ್ವಾಯಾ ಕ್ಯವ್ ಸಲ್ಪ.

ಸಗ್‌ಳಾಂಚಿವ ದೇವಾಚಿ ಕರುನಾ

25 ಮಾಜಾ ಭನ್ವಿ ಭಾವ್ಣಾನು ಮೀ ತುಮಾನಾ ದಡುನ್ ರಾಯಲ್ಯಾಲ ಖರ ತ್ಯ ಮೀ ಆಡಶಾ ಕರೀತ್ ನಾಹಿ ತುಮಿ ತುಮಾನಾಸ್ ಶಾನ ಮನ್ವನ್ ಗಿಹುನಕೋಸಾ ಹ್ಯ ಖರ ತುಮಾನಾ ಸಮಜುನಾಹಿ ಆಸ ವ್ಹಯಿತ್ ನಾಹಿ ಆಸಸ್ ಇಸ್ರಾಯೆಲಾಚಿ ಥುಡಿ ಲೋಕ ಕಾರನ್ ಜಾಲ್ಯಾತ ಆನಿ ಆನಿ ರಾಥ್ಯಾಲಿ ಕ್ಯವಡ್ಯಾ ಪರೆತ್ ಮನ್‌ಲ್ಯಾವ ಸಗ್ಳಿ ಯೆಹುದಿ ನಸ್‌ಲ್ಯಾಲಿ ಲೋಕ ದೇವಾಚೆ ಸಂಗ ಕ್ಯವಡ್ಯಾಪರೆತ್ ಮನ್‌ಲ್ಯಾವ ಯೆಹುದಿ ದೇವಾಪ ಯಯಿಪರೆತ್.

26 ಆನಿ ಆಸಸ್ ಸಗ್‌ಳಾ ಇಸ್ರೇಲ್ ಲೋಕಾಂಚ್ ರಕ್ಮನ್ ವ್ಹನ್ವಾರ್. ಪವಿತ್ರ ಪುತೀಕ್ ಆಸ ಲಿವ್‌ಲ್ಯಾ.

“ಸಿಯೋನಾತ್ಸಿ ರ್ಯಾಕ್ಸಾರಾ ಯನಾರ್.

ತ್ಯೊಯಾಕೊಬಾಚಾ ಕುಟ್ಮಾತ್ಲ ಸಗ್ಳ ಬುರ್ಸ ಕಾಡುನ್ ಟ್ಯಾಕ್ಸಾರ್.

27 ಮೀ ತ್ಯಾ ಲೋಕಾಂಚೆ ಪಾಪ್ ಪರಿಹಾರ್ ಕರ್ತಾನಾ.

ತ್ಯಂಚಿ ಸಂಗ ಹ್ಯೊ ಕರಾರ್ ಕರ್ನಾರ್. ”

28 ಯೆಹುದ್ಯಾಂಚಾನಿ ಬರಿ ಖಬರ್ ಗೀತ್ಲಿ ನಾಹಿ. ಮನ್ವುನ್ ತೇ ದೇವಾಚೆ ವಾದಿ ಜಾಲ್ಯಾತ್. ಯೆಹುದಿ ನಸ್‌ಲ್ಯಾಲ್ಯಾ ಲೋಕಾನಾ ಮಜ್ಜತ್ ವ್ಹಯಾ ವ್ಹಯಿ ಮನ್ವುನ್ ಹ್ಯ ಜಾಲ್ಲ್ ಫನ್ ಆಜುನ್ ದೇವಾಪ್ಪಿ ನಿವಡ್‌ಲ್ಯಾಲಿ ಲೋಕ ಜಾಲ್ಯಾತ್. ಮನ್ವುನ್ ತ್ಯೊ ವಡ್ಲಾಂಚೆ ಸಂಗ ಆಪ್ಲು ಕೇಲ್ಯಾಲ್ಯಾ ಕರಾರಾಸ್ಲಾಗುನ್ ತ್ಯಂಚಿ ಮಾಯಾ ಕರ್ನಾರ್.

29 ತ್ಯೊ ದೇವಾನಿ ಕುನಾಲಾ ನಿವಡ್‌ಲ್ಯಾತ್ ತ್ಯಂಚೆ ಗುಶ್ಟಿತ್ ತ್ಯನಾ ಆಸ್‌ಲ್ಯಾಲಾ ಆಶಿರ್ವಾದ್ ಬದಲಿತನಾಹಿ.

30 ಯಕಾ ಕಾಲಾತ್ ಯೆಹುದಿ ನಸ್‌ಲ್ಯಾಲಿ ತುಮಿ ತ್ಯಚಾ ಆಜ್ಞಾ ಪಾಳಿತ್ ನವ್ಲಾಸಾ. ಫನ್ ಆತಾ ತ್ಯಂಚಾನಿ ಆಜ್ಞಾ ಪ್ಯಾಳ್ಯಾ ನಾಹಿತಾ ಮನ್ವುನ್ ತುಮಾನಾ ದೇವಾಚಿ ದಯಾ ಗಾವ್ಲೆ.

31 ದೇವಾನಿ ತುಮಾನಾ ದಯಾ ದ್ಯಾವ್ಲಿ ಮನ್ವುನ್ ಆತಾ ಯೆಹುದಿ ಆಜ್ಞಾ ಶಾರ್ಕೆ ಚಾಲ್ಲ ನಾಹಿತ. ಫನ್ ತ್ಯಂಚಾನಿ ಸಾಹಿತ್ ದೇವಾಪ್ಪಿ ಕರುನೆ ಗಿತ್ಲಿ ಮನ್ವುನ್ ಆಸ ಜಾಲ್ಲ್.

32 ಸಗ್ಳಿ ದೇವಾಲಾ ಅವಿದೆಯ್ ಜಾಲಿತ. ದೇವಾನಿ ಸಗ್ಳಾಳ್ಯಾನಾ ದಯಾ ದಾವಾಯಾ ಸಗ್ಳಾಳ್ಯಾನಾ ಯಂಗ್ವಾಸ್ ಸಾಂಗ್‌ಲ್ಯಾ ಶಾರ್ಕೆ ಚಾಲ್ಲ ನಾಹಿ ಮನ್ವುನ್ ಕೊಂಡ್ಲಿತ.

ದೇವಾಲಾ ಸ್ತುತಿ

33 ವ್ಹಯ್ ದೇವಾಚಿ ದವ್ಲತ್ ಖುಬ್ ಹಾ! ದೇವಾಚೆ ಗಿನ್ಯಾನಾಲಾ ಆನಿ ಬುದ್ಧಿಲಾ ಸರ್ತಸ್ ನಾಹಿ! ತ್ಯಚಾ ನಿರ್ದಾರ್ ಫುಡುನ್ ಸಾಂಗ್ವಾರಾ ಕೋನ್ ಹಾ? ತ್ಯಚಾ ಮಾರ್ಗ ಕುನಾಲಾ ಸಮಾಜ್ವಾರ್.

34 ಪವಿತ್ರ ಪುತೀಕ್ ಸಾಂಗ್‌ತ್ಯಾ ಶಾರ್ಕೆ.

“ಪ್ರಭುಚೆ ಮನ್ ಸಮಜುನ್ ಗೇತ್ಯಾಲಾ ಕೊನ್?”

ದೇವಾಲಾ ಸಲಹಾ ಕೊನ್ ಸಾಂಗ್ಗಾರ್?

35 ತ್ಯಲಾ ಕುನಿ ಕ್ಯಾ ದಿಲ್ಯಾ?

ತ್ಯ ತ್ಯೊ ತ್ಯಲಾ ಮಾಗರ ದಿಯಿಲ್. ”

36 ವ್ಹಯ್ ತ್ಯನಿಸ್ ಸಗ್ಗ ಉತ್ಪನ್ ಕೇಲ. ಸಗ್ಗ ತ್ಯಚಿಸ್ ಲಾಗುನ್ ತ್ಯಚಿಸಾಟಿಸ್ ಹಾ. ದೇವಾಲಾ ಖಾಯಿಮ್ಮಾ ಕಾಲಾತ್ ಮೈಮಾ ವ್ಹಪುನಿ! ಆಮೆನ್.

12

ದೇವಾಚಿ ಸೇವೆತ್ ಜೀವ್ನಾ

1 ಮನ್ವುನ್ ಬನ್ವಿ ಬಾವ್ವಾನಾ, ದೇವಾಚಿ ಕನಿಕರಾ ಯಾದ್ ಕರಿತ್ ತುಮಚಿಪ ಮೀ ಇನಂತಿ ಕರ್ತೊ, ತುಮಿ ತುಮಚಿ ತುಮಚಿ ಶರೀರ ದೇವಾಸಾಟಿ ಥೆವಲ್ಯಾಲಿ, ಆವಾಡಲ್ಯಾಲಿ ಜೀತ್ರಿ ಜ್ಞನಾವಾರ ಮಾರಾ. ಹ್ಯಸ್ ಖರ ಆರಾಧನ್ ದೇವಾಲಾ ದಿಯಾ ವ್ಹಯಿಸಾ.

2 ಹೇ ದುನೆಚಾ ಚಾಲನ್ಯಾಚೆಗತ್ ಚಾಲಾಚೆ ಆಂದಿ ತುಮ್ಮಿ ಮನ ಬದಲುನ್ ಮನ ನವಿನಿ ಜ್ಞಾಲ್ಯಾಚೆಗತ್ ತುಮಿ ರಾವ್ತಾ ತವಾ ತುಮಿ ದೇವಾಚಾ ಮನಾಶಾರ್ಕ ಕಚ್ ಚಾಂಗ್ಲ ಕಚ್ ಆವಾಡಲ್ಯಾಲ ಆನಿ ಕಚ್ ಪರಿ ಪೂರ್ನ್ ಜ್ಞಾಲ್ಯಾಲ ಮನ್ವುನ್ ಸಮಜುನ್ ಗೇನ್ವಾರ್.

3 ದೇವಾನಿ ಮನಾ ವಿಶೇಶಾಚಾ ಯೋಕ್ ವರ್ ದಿಲ್ತಾ. ಮನ್ವುನ್, ತುಮ್ಮಿಪಲ್ಯಾ ಪರತೇಕಾಲಾ ಹ್ಯಾ ಖನ್ಕತಿ ಸಾಂಗ್ಲೊ. ತುಮಿ ತುಮ್ಮಾ ಖರ್ಯಾ ಯೋಗಿತ್ಯಾನ್ನಿ ಖುಬ್ ತುಮ್ಮೆ ಗುಶ್ಟಿತ್ ಯವಜ್ಞನಕೊಸಾ. ಹ್ಯಚೆ ಬದ್ಲಿ ತುಮಿ ತುಮ್ಮೆ ಗುಶ್ಟಿತ್ ಕ್ಯಾ ಯವಜ್ಞ ತರಿ ತ್ಯ ಯವಜ್ಞ ತುಮ್ಮಾ ಖರ್ಯಾ ಯೋಗಿತೆಲಾ ಶಾರ್ಕ ರಾಹ್ಯಾವ್ಹಯಿ. ದೇವಾನಿ ತುಮಾನಾ ಕೃಪ್ಪಾ ಇಸ್ವಾಸ್ ದಿಲ್ಯಾ ತ್ಯಾ ಇಸ್ವಾಸಾಚಾ ಮಾಪಾ ಯಿತ್ಕ್ ತುಮಾನಾ ತುಮಿಸ್ ಯವಜ್ಞಾ.

4 ಪರತೇಕಾಲಾ ಯಾಕ್ ಶರೀರ್ ಹಾ. ತ್ಯಾ ಶರೀರಾಲಾ ಖುಬ್ ಆಂಗ ಹಾತ್ತ್. ತೀ ಆಂಗ ಯಾಕುಸ್ ಕಾಮ ಕರೀತ್ಪಾಹಿತ.

5 ತಸಸ್ ಕ್ರಿಸ್ತಾಪ ಆಮಿ ಸಗ್ಗ ಯಾಕುಸ್ ಆಂಗ್ ಜ್ಞಾಲ್ಯಾವ್. ಆನಿ ಆಮಿ ಯಕಾ ಶಿರಾಚಾ ದುಸರ್ಯಾ ದುಸರ್ಯಾ ಬಾಗಾಚೆಗತ್ ಶರೀರಾಲಾ ಮಿಳುನ್ ಹಾವ್.

6 ಆಮಿ ಸಗ್ಳಾಂಚಾನಿ ದುಸ್ರಿ ದುಸ್ರಿ ವರ ಗೆತಲ್ಯಾತ. ದೇವಾನಿ ಆಮಾನಾ ದಿಲ್ಯಾಲೆ ಕ್ರಪೆನಿ ಪರತೇಕ್ ವರ ದಿಲ್ಯಾ ಪ್ರವಾದಿಚ್ ವರ ದಿಲ ಆಸ್ಲತ ತ್ಯಾ ಆಪಲ್ಯಾ ಇಸ್ವಾಸಾಸಾರ ತ್ಯೊ ವರ ಉಪೇಗ್ ಕರಾಯಾ ವ್ಹಯಿ.

7 ಸೇವಾ ಕರ್ತ್ಯಾಲ ವರ ಗೆಡ್ಯಾಲ್ಯಾನಿ ಸೇವಾ ಕರಾಯಾ ವ್ಹಯಿ. ಸಿಕ್ವಾಚ್ ವರ ಆಸ್ಲ್ಯಾಲಾ ಸಿಕ್ವುನಿ

8 ಉಮೇದ್ ದೇತ್ಯಾಲ ವರ ಆಸ್ಲತ ತಸಸ್ ಕರುನಿ. ಕೋನ್ ವ್ಯಾಡ್ತ್ಯಾಲಾ ಹಾ ತ್ಯೊ ಉದಾರ್ ಮನಾನಿ ವಾಡುನಿ. ಜಾಂತಿಕ್ ಚಾಲಿವತ್ಯಾಲ್ಯಾನಿ ಜಾಂತಿಕ್ ಕರ್ತಾನಾ ಕಶ್ಟಾನಿ ರಾಬಾಯಾ ವ್ಹಯಿ. ಕನಿಕರ್ ದ್ಯಾವ್ತ್ಯಾಲ್ಯಾನಿ ಸಂತೋಶಾನಿ ತೀ ಕಾಮ ಕರಾಯಾ ವ್ಹಯಿತ.

9 ತುಮ್ಮಿ ಮಾಯಾ ಖರಿ ರಾಹುನಿ. ಬುರ್ಶಾ ಕಾಮಾಂಚಾ ರಾಗ್ ಕರಾ. ಚಾಂಗ್ಲಿ ಕಾಮ ದರುನ್ ರಾವ್ತಾ

10 ಇಸ್ವಾಸಾಚಾ ಬಾವ್ತಾ ಬನ್ವಿಂಚೆಗತ್ ಯಕಾ ಮಕಾ ಸಂಗ ಕ್ರಿಸ್ತಾಚೆ ಮಾಯೆಶಾರ್ಕಿ ಮಾಯಾ ಕರಾ. ತುಮಿ ತುಮ್ಮಿಸಾಟಿ ಮಂಥ್ಯಾಲೆ ಮರೆದಿವ್ಚಿ ಖುಬ್ ಮರ್ಯಾದ್ ತುಮ್ಮಾ ಬನ್ವಿ ಬಾವ್ತಾನಾ ದಾವಾ.

11 ತುಮ್ಮಾ ಪ್ರಭುಸಾಟಿ ಸೇವಾಕರಾಚಿ ವ್ಹಯಿ ಆಸ್ಥಾನಾ ಆಳಸೊಟಿ ವ್ಹಪುನಕೋಸಾ, ಆತ್ಮಾಚಾ ಸಂತೋಶಾನಿ ತ್ಯಚಿ ಸೇವಾ ಕರಾ.

12 ತುಮಾನಾ ಆಶಾ ಹಾ ಮನ್ವುನ್ ಸಂತೋಶ್ ವ್ಹವಾ. ತುಮಾನಾ ತರಾಸ್ ಆಸ್ಥಾನಾ ಥಂಡ್ವನಾನಿ ರಾವ್ತಾ ಸಗ್ಳಾ ಯಳಾತ್ ಮಾಗ್ನ ಕರಾ.

13 ಕೊರತೆತ್ ಆಸ್ಲ್ಯಾಲ್ಯಾ ದೇವಾಚಾ ಲೋಕಾನಾ ಮಜ್ಜತ್ ಕರಾ, ತುಮಾಚಾ ಗರಾಂತ್ಲಿ ದಾರ ವಳಕ್ ನಸ್ಲ್ಯಾಲ್ಯಾ ಲೋಕಾಂಚೆ ಸೇವೆ ಸಾರಿ ಉಡ್ಗುನ್ ಥೆವಾ.

14 ಕೊನ್ ತುಮಾನಾ ಬುರ್ಸ ಕರ್ತ ತ್ಯಂಚಿ ಸಾಟಿ ಪ್ರಬುಪ ಮಾಗಾ ತ್ಯನಾ ಸರ್ಪುನಕೋಸಾ ಆಶಿರ್ವಾದ್ ಕರಾ.

15 ಸಂತೋಶ್ ವ್ಹತ್ಯಾಲ್ಯಾಂಚೆ ಸಂಗ ಸಂತೋಶ್ ವ್ಹವಾ. ದುಖ ವ್ಹತ್ಯಾಲ್ಯಾಂಚೆ ಸಂಗ ದುಖಾನಿ ರಾವಾ.

16 ತುಮಿ ಯಕಾಮಕಾಲಾ ಸಮಾಧಾನಾನಿ ಮಿಳುನ್ ಜೀವ್ತಾ ಕರಾ. ಗಮೆಂಡಿ ಕರುನಕೋಸಾ ಫನ್ ಥಂಡ್ವನಾನಿ ತುಮ್ಮಾ ಹಾತಾತ್

ಆಸ್ಲ್ಯಾಲ್ಯಾ ಲೋಕಾಸಂಗ ಕಾಮ್ ಕರಾ. ತುಮಾನಾ ತುಮಿಸ್ ಶಾನ ಮನ್ವುನ್ ಗಿಹುನಕೋಸಾ.

17 ಕುನಿ ತರಿ ತುಮಾನಾ ಬುರ್ಸ ಕೇಲತ, ತ್ಯಚಿ ಬದ್ಲಿ ತ್ಯಲಾ ಬುರ್ಸ ಕರುನಕೋಸಾ. ಸಗ್ಳಿ ಲೋಕ ಚಾಂಗ್ಲ ಮನ್ವುನ್ ಸಮಜುನ್ ಗೆಥ್ಯಾಲಿ ಕಾಮ ಕರಾಯಾ ಯತ್ನ ಕರಾ.

18 ಸಗ್ಳ್ಯಾ ಲೋಕಾ ಸಂಗ ಥಂಡ್ವನಾನಿ ಜೀವ್ವಾಕರಾಯಾ ತುಮ್ಮಿಪ್ಪಿ ವ್ಹಯಿಲ್ ತ್ಯವ್ವ ಯತ್ನ ಕರಾ.

19 ಮಾಜಾ ಸೊಪ್ತ್ಯಾನು ತುಮಾನಾ ಬುರ್ಸ ಕರ್ತ್ಯಾಲ್ಯಾ ಲೋಕಾಂಚಿವ್ಲಾ ತುಮಿ ಕವಾಸ್ ಡಾವ್ ಫಾರಿಕ್ ಕರುನಕೋಸಾ. ಫನ್ ದೇವಾಚಾ ರಾಗಾತ್ ತ್ಯನಾ ಸುಡುನ್ ದೇವಾ. ಪವಿತ್ರ ಪುತಿಕಾತ್ ಮೀಸ್ ಡಾವ್ ಫಾರಿಕ್ ಕರ್ನಾರ್ ಆನಿ ಮೀಸ್ ಪ್ರತಿ ಫಳ್ ದೇನಾರ್. ” ಆಸ ಪ್ರಭು ಸಾಂಗ್ಲೊ.

20 ತ್ಯಚಿ ಬದ್ಲಿ ಪವಿತ್ರ ಪುತಿಕಾತ್ ಸಾಂಗ್ಲ್ಯಾ ಶಾರ್ಕ, ತುಮಚ್ ವಾದಿ ಭೂಕ್ಯಾಲಾತ, ತ್ಯಲಾ ಖಾಯಾ ದೇವಾ. ತುಮಚ್ ವಾದಿ ತಾನ್ಯಾಲಾತ, ತ್ಯಲಾ ಪಿಯಾಲಾ ಪಾನಿ ದೇವಾ. ತುಮಿ ಆಸ ಕೇಲಸಾತ, ತ್ಯಚಿ ಡುಯಿವ ಇಂಗಾಳ್ ಥೆವಲ್ಯಾಸಾರ ವ್ಹನಾರ್ ಆನಿ ತ್ಯಲಾ ಲಾಜ್ ವಾಟ್ನಾರ್.”

21 ಬುರ್ಶಾ ಫನಾಲಾ ತುಮಾನಾ ಪಡು ದಿವು ನಕೋಸಾ ತ್ಯಚಿ ಬದ್ಲಿ ಚಾಂಗ್ಲ ಕರ್ತ್ಯಾಲ್ಯಾನಿ ಬುರ್ಶಾ ಫನಾಲಾ ಹರ್ವಾ.

13

ಅಧಿಕಾರ್ಯಾಂಚೆ ಗುಶ್ಟಿತ್ ಆಮ್ಚಿ ಕಾಮ

1 ತುಮಿ ಪರತೇಕ್ ಅಧಿಕಾರ್ಯಾನಿ ಸಾಂಗ್ಲ್ಯಾಲ ಐಕಾಯಾ ವ್ಹಯಿಸಾ ಕಾ ಮಂಜೆ ದೇವಾಚಿ ಪರವಾನ್ಗಿ ನಸ್ಥಾನಾ ಕಚಾ ಹುಕುಮ್ ದಿಯಿತ್ ನಾಹಿ. ಸಗ್ಳ್ಯಾ ಅಧಿಕಾರ್ಯಾನಾ ದೇವಾನಿಸ್ ನಿವಡ್ಲ್ಯಾ

2 ಮನ್ವುನ್ ಆತಾ ಆಸ್ಲ್ಯಾಲ್ಯಾ ಅಧಿಕಾರ್ಯಾಲಾ ಆಡ್ವಾ ಜಾಲ್ಯಾಲಾ ಮಾನುಸ್ ಖರ್ಯಾನಿಸ್ ದೇವಾಚೆ ಆಜ್ಞೆಲಾ ಆಡ್ವಾ ಜಾಲ್ಯಾ ವೈಲ್ಯಾ

ಅಧಿಕಾರ್ಯಾಲಾ ಆಡ್ತಿ ಜಾಲ್ಯಾಲಿ ಲೋಕ ಆಪ್ಲಿವ ಆಪ್ಲುನ್ ತೀರ್ಪ್ ಆನೂನ್ ಗೆನ್ನಾರ್.

³ ಚಾಂಗ್ಲ ಕರ್ತ್ಯಾಲ್ಯಾ ಲೋಕಾನಾ ಅಧಿಕಾರಿಂಚ್ ಭ್ಯಾ ರಾಹಿತ್ಯಾಹಿ. ಫನ್ ಬುರ್ಸ ಕರ್ತ್ಯಾಲ್ಯಾ ಲೋಕಾನಾ ಅಧಿಕಾರ್ಯಾಂಚ್ ಭ್ಯಾ ಆಸ್ಲ. ತುಮಿ ಅಧಿಕಾರಿನಾ ಭ್ಯಾ ನಸ್‌ಲ್ಯಾಲಿ ರಾಹ್ಯಾ ವ್ಹಯಿಸಾ ಮನ್ವುನ್ ಮಂಥಾಸಾ ಕ್ಯಾ? ತಸ ಜಾಲ್ಯಾವ ತುಮಿ ಶಾರ್ಕತ್ಯಸ್ ಕರಾ ತವಾ ಅಧಿಕಾರಿ ತುಮಾನಾ ಬರ ಮನ್ವಾರ್.

⁴ ಕಾ ಮಂಜೆ ಅಧಿಕಾರಿ ತುಮ್ಜಾ ಚಾಂಗಲ್ಯಾಸಾಟಿ ನಿವಡ್‌ಲ್ಯಾಲಾ ದೇವಾಚಾ ಸೇವಕ್ ಜಾಲ್ಯಾ ಫನ್ ತುಮಿ ಬುರ್ಸ ಕೇಲಸಾತ ಬಿಹ್ಯಾ ವ್ಹಯಿಸಾ. ತುಮಾನಾ ಶಿಕ್ಯಾ ದಿಯಾ ತ್ಯಲಾ ಹುಕುಮ್ ಹಾ. ತವಾ ತ್ಯೊ ಹುಕುಮ್ ಉಪೇಗ್ ಕರ್ನಾರ್ ಅಧಿಕಾರಿ ಬುರ್ಸ ಕರ್ತ್ಯಾಲ್ಯಾ ಲೋಕಾನಾ ಶಿಕ್ಯಾದಿಯಾ ನಿವಡ್‌ಲ್ಯಾಲಾ ದೇವಾಚಾ ಸೇವಕ್ ಜಾಲ್ಯಾ.

⁵ ಮನ್ವುನ್ ತುಮಿ ಅಧಿಕಾರಿನಿ ಸಾಂಗ್‌ಲ್ಯಾಲ ಐಕಾಯಾ ವ್ಹಯಿಸಾ ತುಮಾನಾ ಶಿಕ್ಯೆ ವ್ಹತೆ ಮನ್ವುನ್ ನವ್ವ ತುಮ್ಜಾ ಮನಾಚೆ ವಳಕಿಲಾ ತ್ಯಂಚಾನಿ ಸಾಂಗ್‌ಲ್ಯಾಲ ಐಕಾಯಾ ವ್ಹಯಿ.

⁶ ಮನ್ವುನ್ ತುಮಿ ತೆರಿಗೆ ಸಾಹಿತ್ ದೇತಾಸಾ. ಕಾ ಮಂಜೆ ತೇ ಅಧಿಕಾರಿ ದೇವಾಸಾಟಿ ಕಾಮ್ ಕರ್ತ್ಯಾಲ ಜಾಲ್ಯಾತ.

⁷ ಆಸ ಆಸ್ಥಾನಾ, ತುಮಿ ಕುನಾಲಾ ವ್ಹಯಿ ತ್ಯಲಾ ದೇವಾ. ಜಖತ್ ಆನಿ ಆಮ್ಚಾ ಕಂದಾಯಾ ದಿಯಾ ವ್ಹಯಿ ತೀ ದೇವಾ. ಕುನಾಲಾ ಮರ್ಯಾದ್ ದಿಯಾ ವ್ಹಯಿ ತ್ಯನಾ ಮರ್ಯಾದ್ ದೇವಾ.

ಯಕಾಮಕಾ ಮದ್ಲಿ ಆಮ್ಚಿ ಕಾಮ

⁸ ಯಕಾಮಕಾಚಿ ಮಾಯಾ ಕರಾಚ್ ಉಪ್ಕಾರ್ ಸುಡುನ್ ದಿಸ್ತ ಕಚ್‌ಸ್ ಉಪ್ಕಾರ್ ತುಮ್ಚಿವ ರಾಹು ನಾಹಿ. ಸಂಗ್‌ಳ್ಕಾಂಚಿ ಮಾಯಾ ಕರ್ತ್ಯಾಲಾ ಮಾನುಸ್ ಸಗ್‌ಳ್ಕಾ ಧರ್ಮಶಾಸ್ತ್ರಾರಾಚೆಗತ್ ಚಾಲ್ತೊ.

⁹ ಕಾ ಮಂಜೆ, “ವೈಬೀಚಾರ್ ಕರುನಾಹಿ; ಖುನ್ ಕರುನಾಹಿ ಚುರಿಕರುನಾಹಿ; ದುಸರ್‌ಲ್ಯಾಂಚಾ ಸಾಮಾನಾವ್ಲಿ ಆಶಾ ಕರುನಕೋಸಾ”

ಮನ್ವುನ್ ಧರ್ಮಶಾಸ್ತ್ರಾರ್ ಸಾಂಗ್ತ. ಹೇ ಆಜ್ಞೆ ದರ್ನಿ ಸಗ್ಳ್ಯಾ ಆಜ್ಞಾ,
 “ತು ತುಜಿ ಮಾಯಾ ಕರ್ತ್ಯಾಚೆಗತ್ ಸೇಜಾರ್ಯಾಂಚಿ ಮಾಯಾ ಕರ್”
 ಮಂಥ್ಯಾಲೆ ಯಕಸ್ ಆಜ್ಞೆತ್ ಹಾತ್ತಾ.

10 ಮಾಯಾ ದುಸ್ಮರ್ಯಾನಾ ಬುರ್ಸ ಕರೀತ್ಪಾಹಿ ಮನ್ವುನ್ ಮಾಯಾ
 ಧರ್ಮಶಾಸ್ತ್ರಾರಾತ್ ಹಾ.

11 ಹ್ಯ ತುಮಿ ಕರಾಯಾ ವ್ಹಯಿಸಾ ಕಾ ಮಂಜೆ ತುಮಿ ತುಮ್ಚೆ ನಿಭತ್ಪಿ
 ಉಠಾಚಾ ಯೋಳ್ ಆಲ್ಯಾ ಮನ್ವುನ್ ತುಮಾನಾ ಸಮಾಭಲ್ಯಾ. ಕಾ
 ಮಂಜೆ ಆಮಿ ಆಂದಿ ಇಸ್ವಾಸ್ ಥೆವ್‌ಲ್ಯಾಲ್ಯಾ ಯಳಾವ್ಣಿ ರಕ್ಷನ್ ಆತಾ
 ಮಿಬ್ ಜವಳ್ ಹಾ.

12 ಲ ತೀ “ರ್ಯಾತ್” ಸರ್ಲೆ, ಲ ತ್ಯೊ “ದೀಸ್” ಆಲ್ಯಾ ಮನ್ವುನ್
 ಆಂದಾರಾತ್ ಮಿಸಾಳ್ಕಾಲಿ ಕಾಮ ಹಿತ್ಪಿ ಮೊರ್ಡ್ ಕರಾಚಿ ಸುಡುನ್
 ಉಜಿಡಾಚಿ ಲಡಾಯಿ ಕರಾಯಾ ಆಮಿ ಹತ್ಯಾರಿ ಗಿಹುನ್ ತಯಾರ್
 ವ್ಹಪುಯಾ.

13 ದಿಸಾಚಾ ಜೀವ್ಣಾ ಕರ್ತ್ಯಾಲ್ಯಾ ಲೊಕಾಂಚೆಗತ್ ಚಾಂಗ್ಲಾ ಜೀವ್ಣಾ
 ಕರುಯಾ. ನಕೋತಸ್ಲ ಖಾನ ಪಿನ ಆಮಿ ಕರುನಾಹಿ, ಆಮಿ ವ್ಯಬಿಚಾರ್
 ಕರುನಾಹಿ ಮನಾತ್ಪಿ ಕಸ್ಲಸ್ ಪಾಪ್ ಕರುನಾಹಿ ಬಾಂಡ್ ಆನಿ ಕಳಿ
 ಕರುನಾಹಿತಾ, ತ್ಯವ್ಡಸ್ ನವ್ಡ ಖೊಟೆಫನ್ ಕರುನಾಹಿ. ಹ್ಯ ಸಗ್ಳೆ
 ಕರುನಾಹಿ.

14 ಫನ್ ಪ್ರಭು ಜಾಲ್ಯಾಲ್ಯಾ ಯೇಸುಕ್ರಿಸ್ತಾಲಾ ಹತ್ಯಾರ್ಯಾಂಚೆಗತ್
 ಗೆವಾ. ಆನಿ ತುಮ್ಚಾ ಪಾಪಾಚಾ ಸ್ವಭಾವ್ ಆನಿ ಬುರ್ಶಾ ಆಶಾ ಕರಾಚಿ
 ಯವಜ್ಞಾ ಥಾಂಬ್ಜಾ.

14

ಯಕಾಮಕಾಚಾ ತಿರ್ಮಾನ್ ಕರುನಕೋಸಾ

1 ಇಸ್ವಾಸಾತ್ ಬಳ್ ನಸಲ್ಯಾಲ್ಯಾ ಮಾನ್ಸಾಲಾ ತುಮ್ಚಾ ಮೇಳ್ಕಾತ್
 ಮಿಳ್ವನ್ ಗೆವ್ಪಾ ತ್ಯಚಾ ಯಕ್‌ಲ್ಯಾಚೆ ಗುಶ್ಟಿತ್ ತ್ಯಂಚಿ ಸಂಗ ಬಾಂಡಾನ್
 ಕರುನಕೋಸಾ.

2 ಯೋಕ್ ಕಸ್ಲಬಿ ಜೇವಾನ್ ಖಾಯಾ ವ್ಹಯಿ ಮಂಥೊ. ಫನ್ ಇಸ್ವಾಸಾತ್ ಬಳ್ ನಸ್‌ಲ್ಯಾಲಾ ಮಾನುಸ್ ಆಪ್ನು ಬಾಜಿಪಾಲ್ಯಾಚ್ ಜೇವಾನ್ ತ್ಯವ್ಹಸ್ ಖಾತೊ.

3 ಕಸ್ಲಬಿ ಜೇವಾನ್ ಖಾಯಾ ವ್ಹಯಿ ಮಂಥ್ಯಾಲ್ಯಾ ಮಾನ್ಸಾನಿ ಬಾಜಿಪಾಲ್ಯಾಚ್ ಜೇವಾನ್ ಖಾತ್ಯಾಲ್ಯಾ ಮಾನ್ಸಾಚಾ ತಿರ್ಮಾನ್ ಕರು ನಾಹಿ. ತಸಸ್ ಬಾಜಿಪಾಲ್ಯಾಚ್ ಜೇವಾನ್ ಖಾತ್ಯಾಲಾ ಮಾನುಸ್ ಸಗ್ಳು ಖಾತ್ಯಾಲ್ಯಾ ಮಾನ್ಸಾಲಾ ಚುಕಿಚಾ ಮನ್ವುನ್ ತೀರ್ಮಾನ್ ಕರು ನಾಹಿ. ದೇವಾನಿ ತ್ಯಾ ಮಾನ್ಸಾಲಾ ಸಾಹಿತ್ ಗೇತಲ್ಯಾ.

4 ಆನಿ ಯಕಾ ಮಾನ್ಸಾಚಾ ಸೇವಕಾಲಾ ತೀರ್ಮಾನ್ ಕರ್ನಾರಾ ತು ಕೋನ್? ತ್ಯೊ ಉಬಾ ರಾಹ್ಯಾಚ್ ಆನಿ ಪಡಾಚಾ ಧನ್ವಿಸ್ ತೀರ್ಮಾನ್ ಕರ್ನಾರ್. ಆನಿ ತ್ಯೊ ಘಟ್ ರಾನ್ವಾರ್ ಕಾ ಮಂಜೆ ಪ್ರಭು ತ್ಯಲಾ ಘಟ್ ಕರಾಯಾ ಶಕ್ತ ಭಾಲ್ಯಾ.

5 ಯೋಕ್ ಮಾನುಸ್ ಉಲ್ಕಾಲ್ಯಾ ಸಗ್ಳ್ಯಾ ದಿಸಾವ್ನಿ ಸಮಜುನ್ ಗೆಥೊ. ಯಕಾ ದಿಸಾವ್ನಿ ಅನಿ ಯೋಕ್ ದೀಸ್ ಮೂಖ್ಯ ಮನ್ವುನ್ ಸಮಜುನ್ ಗೆಥೊ. ಫನ್ ಆನಿ ಯೋಕ್ ಸಗ್ಳು ದೀಸ್ ಯೋಕುಸ್ ಮನ್ವುನ್ ಇಸ್ವಾಸ್ ಧಿವತ್ಯಾಚೆಗತ್. ಪರತೇಕ್ ಮಾನುಸ್ ಆಪ್‌ಲ್ಯಾ ಸ್ವತಾಚಾ ಮನಾತ್ ಆಪ್‌ಲ್ಯಾ ಸ್ವತಾಚಾ ಇಸ್ವಾಸಾತ್ ಖರಾ ವ್ಹಪುನ್ ರಾಹ್ಯಾ ವ್ಹಯಿ.

6 ಸಗ್ಳ್ಯಾ ದಿಸಾವ್ನಿ ಯೋಕ್ ದೀಸ್ ಮೊಟಾ ಮನ್ವುನ್ ಯವಸ್‌ತ್ಯಾಲಾ ಮಾನುಸ್ ಪ್ರಭುಲಾ ಮಾನ್ ದಿಯಾ ಆಸ ಕರ್ತೊ ಆಸಸ್ ಸಗ್ಳೆ ತರಚ್ ಜೇವಾನ್ ಖಾತ್ಯಾಲಾ ಮಾನುಸ್ ಪ್ರಭುಸಾಟೆಸ್ ಕರ್ತೊ, ಕಾ ಮಂಜೆ ತ್ಯೊ ತ್ಯಾ ಜೇವ್ನಾಸಾಟಿ ದೇವಾಲಾ ಕ್ರತಜ್ಞತಾ ದೇತೊ. ಆನಿ ಕೋನ್ ಸಗ್ಳು ಖಾಯಿತ್ ನಾಹಿ ತ್ಯೊ ಬಿ ಪ್ರಭುಲಾ ಮಾನ್ ದಿಯಾಸಾಟಿ ತಸ ಕರ್ತೊ, ತ್ಯೊಬಿ ದೇವಾಲಾ ಕ್ರತಜ್ಞತಾ ದೇತೊ.

7 ಆಮ್ಚಾತ್ ಕೋನ್ ಯೋಕ್ ಆಪ್ಲೆಸಾಟಿ ಜಗತ್ನಾಹಿ ಆನಿ ಆಪ್ಲೆಸಾಟಿ ಮರತ್ ನಾಹಿ.

8 ಆಮಿ ಜಗ್ಲಾವ್ತ. ಪ್ರಭುಸಾಟಿ ಜಗತಾವ್; ಮೇಲಾವ್ತ. ಪ್ರಭುಸಾಟಿ

ಮರ್ತಾವ್. ಮನ್ವನ್ ಜಗ್ಗವರಿ ಮೇಲಾವರಿ ಆಮಿ ಪ್ರಭುಚಿಸ್ ಜಾಲ್ಯಾವ್.

⁹ ಕಾ ಮಂಜೆ ಮೆಲ್ಯಾಲ್ಯಾನಾಬಿ ಜಿತ್ತಿ ಆಸ್‌ಲ್ಯಾಲ್ಯಾನಾಬಿ ಪ್ರಭು ವ್ಹಯಾ ವ್ಹಯಿ ಮನ್ವನ್ ಕ್ರಿಸ್ತ್ ಮೇಲಾ ಆನಿ ಜಿವಂತ್ ಉರುನ್ ಆಲಾ.

¹⁰ ನಿಸ್ಸಾ ಬಾಜಿಪಾಲಾ ಖಾತ್ಯಾಲಾ ತು ಬನ್ನಿ ಬಾವ್ತಾನಾ ಕಾ ತೀರ್ಮಾನ್ ಕರ್ತೊಸ್? ಆನಿ ಸಗ್ಳೆ ಖಾತ್ಯಾಲಾ ತು ಬನ್ನಿ ಬಾವ್ತಾನಾ ಕಾ ಖಾಲ್ಚಿ ಕರ್ತೊಸ್? ಆಮಿ ಸಗ್ಳಿ ದೇವಾಚೆ ಮೊರ್ವ್ತುಲುಬಿ ರಾನ್ಹಾರ್, ತವಾ ತ್ಯೊ ಆಮಾನಾ ಸಗ್ಳಾನ್ ತೀರ್ಮಾನ್ ದೇನಾರ್.

¹¹ ವ್ಹಯ್, ಪವಿತ್ರ ಗ್ರಂಥಾತ್ ಆಸ ಲಿವ್‌ಲ್ಯಾ:

ಪರತೇಕ್ ಯೋಕ್ ಮನಾ ಆಡ್ತಾ ಪಡ್ತಾರ್. ಪರತೇಕ್ ಯೋಕ್ ಮನಾ ದೇವ್ ಮನ್ವನ್ ತೊಂಡಾನಿ ಸಾಂಗ್ತಾರ್. ಖರ್ಚಾನಿಸ್ ಮಿ ಜಿವ್ತಾ ಕರ್ತಾಲಾ ದೇವ್ ಮನ್ವನ್ ಪ್ರಭು ಮಂಥೊ.

¹² ಮನ್ವನ್ ಆಮ್ಚಾತ್ಲಾ ಪರತೇಕ್ ಯೋಕ್ ಆಮ್ಚಾ ಆಮ್ಚಾ ಜೀವ್ತಾಚಿ ಗುಶ್ಟಿತ್ ದೇವಾಲಾ ಲೆಕ್ಕಾ ವಪ್ತಾವ್ತಾಯಿ.

ದುಸ್ರ್ಯಾಂಚಾ ಪಾಪಾಲಾ ತುಮಿ ಕಾರನ್ ವ್ಹವುನಕೊಸಾ

¹³ ಹ್ಯಾಚೆ ಬದ್ಲಿ ಆಸ್ಲೆ ಕಾಯ್ ಕರುನಾಹಿ ಮನ್ವನ್ ಆಮಿ ಆಮ್ಚಾ ಬಾವ್ತಾಂಡಾನಾ ಆಡ್ತೆ ಕರುನಾಹಿ ನಾಹಿತ ತ್ಯಲಾ ಪಾಪಾತ್ ಪಡಾಯಾ ಕಾರನ್ ವ್ಹವುನಾಹಿ ಮನ್ವನ್ ತೀರ್ಮಾನ್ ಕರಾ.

¹⁴ ಮೀ ಪ್ರಭು ಜಾಲ್ಯಾಲ್ಯಾಯೇಸುಪ ಹಾ ಮನ್ವನ್ ಮೀ ಹೇ ಬುಲಿತ್ ಖರಾ ಹಾ. ಕಳಾ ಜೆವ್ತಾಳಾ ಜಿನೋಸ್ ಬುರ್ಸ ರಾಹಿತ್ವಾಹಿ; ಫನ್ ಯೋಕ್ ಮಾನುಸ್ ಥೊಡಾ ಜೇವ್ತಾಳಾ ಜಿನೋಸ್ ಖಾಯಾಳಾ ಬುರ್ಸ ಮನ್ವನ್ ಇಸ್ವಾಸ್ ಥೆವ್ಲಾತ್, ತ್ಯೊ ಜೇವ್ತಾಳಾ ಜಿನೋಸ್ ತ್ಯಲಾ ಬುರ್ಸ ವ್ಹತೊ.

¹⁵ ತು ಖಾತ್ಯಾಲಾ ಯೋಕ್ ಜೇವ್ತಾಳಾ ಜಿನೋಸ್ ತುಜಾ ಭಾವ್ತಾಚಾ ಇಸ್ವಾಸಾಲಾ ತು ತರಾಸ್ ಕೇಲಾಸ್ತ, ತು ಮಾಯೆಚಾ ಮಾರ್ಗ ಖರ್ಚಾನಿಸ್ ಗಿಹಿತ್ವಾಹಿ. ತುಜಾ ಜೇವ್ತಾನಿ ಕುನಾಚಿಸಾಟಿ ಕ್ರಿಸ್ತ್ ಮೇಲ್ಯಾ ತಸ್‌ಲ್ಯಾಲಾ ನಾಸ್ ಕರುನಕೊಸ್.

16 ಮನ್ವುನ್ ತು ಕಚ್ಚ ಚಾಂಗ್ಲ ಮನ್ವುನ್ ಯವಸ್ತೊಸ್ ತ್ಯ ತುಜ್ಜ ನಾವ್ ಹಾಳ್ ಕರಾಯಾ ದಿವುನಕೊಸಾ.

17 ದೇವಾಚಾ ರಾಜಾತ್ ಖಾಯಾಚ್ ವ್ಹವುನಿ ಪಿಯಾಚ್ ವ್ಹವುನಿ ಮಖ್ಯನವ್ವ ಫನ್ ನೀಯತ್ ಥಂಡ್ವನ ಪವಿತ್ರಾತ್ಮಾ ದೇತ್ಯಾಲ ಆನಂದ್ ತಿಥ ಮುಖ್ಯ ಜಾಲ್ಯಾ.

18 ಹೇ ತರನಿ ಕ್ರಿಸ್ತಾಚಿ ಸೇವಾ ಕರ್ತಾಲಾ ದೇವಾಲಾ ಆವಾಡಲ್ಯಾಲಾ ಜಾಲ್ಯಾ ಲೋಕ ತ್ಯಲಾ ಚಾಂಗ್ಲಾ ಸ್ವಿಕಾರ್ ಕರುನ್ ಗೆನ್ಹಾರ್.

19 ಮನ್ವುನ್ ಸಮಾಧಾನ್ ಕರ್ತಾಲಿ ಕಾಮ ಆಮ್ಚಿಪ್ಪಿ ವ್ಹಯಿಲ್ ತ್ಯವ್ಚಿ ಕರಾಯಾ ಆಮಿ ಯತ್ನ ಕರುಯಾ. ಯಕಾಮಕಾಲಾ ಖಾಯಿಮ್ಚಿ ಮಜ್ಜತ್ ಜಾಲ್ಯಾಲಿ ಕಾಮ ಕರಾಯಾ ಆಮಿ ಯತ್ನ ಕರುಯಾ.

20 ದೇವಾಚಿ ಕಾಮ ನಾಸ್ ಕರಾಯಾ ಜೇವ್ನಾಲಾ ಅವ್ಕಾಶ್ ದಿವುನಕೊಸಾ. ಸಗ್ಳ ಜೇವಾಚ್ ಜಿನೊಸ್ ಬರ ಹಾತ್ತ ಆನಿ ಖಾಯಾಲಾ ಲಾಯಕ್ ಹಾತ್ತ. ಫನ್ ಯಕ್ಲಾ ಆಪ್ನು ಖಾತ್ಯಾಲ್ಯಾ ಜೇವ್ನಾಚಾ ಜಿನೊಸಾವ್ಚಿ ಆನಿ ಯಕಾ ಮಾನ್ಸಾಲಾ ಪಾಪಾತ್ ಪಾಡಾಚ್ ಜಾಲ್ತಾ. ತ್ಯನಿ ತ್ಯ ಜೇವಾನ್ ಖಾಯಾಚ್ ಭುಕ್.

21 ತು ಮಾಸ್ ಖಾಯಾಚ್ ನಾಹಿತ ದರಾಕ್ರಿಚಾ ರಸ್ ಪಿಯಾಚ್, ತುಜ್ಜ ಇಸ್ವಾಸಿ ಭನ್ವಿ ಭಾಹು ಪಾಪಾತ್ ಪಾಡಾಯಾ ಕಾರನ್ ಜಾಲ್ಯಾಲ ಕಾಯ್ಚಿ ವ್ಹವುನಿ ಸಗ್ಳಾತ್ವಿ ದುರ್ ರ್ವ್ಹಾ.

22 ಆಸ ಆಸ್ಲಾನಾ ಹೆ ಗುಶ್ಟಿತ್ ತುಲಾ ಆಸ್ಲ್ಯಾಲಾ ಇಸ್ವಾಸ್ ದೇವಾಚೆ ಆನಿ ತುಜೆ ಮದ್ದಿ ರಾಹುನಿ ಆಪ್ನು ಕೆಲ್ಯಾಲ್ಯಾ ಕಾಮಾಸಾಟಿ ಶಾರ್ಕ್ ಹಾ ಮನ್ವುನ್ ಸಾಂಗುನ್ ಸಂಶೆವ್ ನಸ್ಲಾನಾ ವಪ್ಸುನ್ ಗೆಥಾಲಾ ದನ್ಯ.

23 ಫನ್ ಕೊನ್ ಆಪ್ನು ಖಾತ್ಯಾಲ್ಯಾ ಜೀನೋಸಾತ್ ಸಂಶೆವ್ ಥೆವ್ಚೊ ದೇವ್ ತ್ಯಲಾ ದುಶಿ ಮನ್ವುನ್ ಥರ್ವಿಲ್, ಕಾ ಮಂಜೆ ತ್ಯನಿ ಕೆಲ್ಯಾಲಿ ಕಾಮ ತ್ಯಚಾ ಇಸ್ವಾಸಾಚೆಗತ್ ನಾಹಿ. ಆನಿ ಕಚ್ಚಾ ಸಬೋತ್ ತ್ಯಚಾ ಇಸ್ವಾಸಾಚಾ ನಾಹಿ ತ್ಯೊ ಪಾಪ್ ಜಾಲ್ಯಾ.

ದುಸರಲ್ಯಾನಾ ಆವಾಡತ್ಯಾಲಿ ವ್ಹವುನ್ ರಾವ್ವಾತುಮಾನಾಸ್ ತುಮಿ ನವ್ವ

¹ ಮನ್ವುನ್ ಬಳ್ ಆಸ್‌ಲ್ಯಾಲ ಆಮಿ ಇಸ್ವಾಸಾತ್ ಬಳ್ ನಸ್‌ಲ್ಯಾಲ ಆಮಿ ಸುಸ್ವುನ್ ಗಿಹ್ಯಾ ವ್ಹಯಿ. ಆಮಾನಾಸ್ ವವ್ಯಾಳುನ್ ಗಿಹುನಾಹಿ.

² ಹ್ಯಚೆ ಬದ್ಲಿಸ್ ಆಮ್ಚಾತ್ ಪರತೇಕ್ ಯೋಕ್ ಆಪ್‌ಲ್ಯಾ ಇಸ್ವಾಸಾಚಾ ಭೆನ್ಡಿ ಭಾವ್ವಾಂಚೆ ಗುಶ್ಟಿತ್ ಯವಜುನ್ ತ್ಯಂಚಾ ಚಾಂಗಲ್ಯಾಸಾಟೆ ಆನಿ ತ್ಯಂಚಾ ಇಸ್ವಾಸಾತ್ ಘಟ್ ರಾಹ್ಯಾ ವ್ಹಯಿತ ಮನ್ವುನ್ ಬಗಾಯಾ ವ್ಹಯಿ.

³ ಕಾ ಮಂಜೆ ಕ್ರಿಸ್ತಾನಿ ಆಪ್‌ಲ್ಯಾ ಸುಕಾಚಿ ಚಿಂತಾ ಕಿಲಿನಾಹಿ. ದೇವಾನಿಸ್, “ತುಲಾ ಸರಪಲ್ಯಾಲಾ ಸರಾಪ್ ಮಾಜಿವ ಆಲ್ಯಾ” * ಮನ್ವುನ್ ಲಿವಲ್ಯಾ

⁴ ಪವಿತ್ರ ಗ್ರಂಥಾತ್ ಲಿವ್‌ಲ್ಯಾಲ ಸಗ್ಳೆ ಆಮಾನಾ ಸಿಕ್ವಾಯಾಸಾಟೆ ಲಿವ್‌ಲ್ಯಾ ಆಮಿ ಭರವಸಾ ಆಸ್‌ಲ್ಯಾಲಿ ರಾಹ್ಯಾ ವ್ಹಯಿ ಮನ್ವುನ್ ಹ್ಯಾ ಖನ್ಕತಿ ಲಿವ್‌ಲ್ಯಾತಾ. ಫನ್ ಆಮಾನಾ ದೆತ್ಯಾಲ್ಯಾ ಥಂಡ್ಣನಾನಿ ಉಮೇದಿನಿ ಭರವಸಾ ರಾಹ್ಯಾಸಾಟೆ ಹ್ಯಾ ಗುಶ್ಟಿ ಲಿವ್‌ಲ್ಯಾತಾ.

⁵ ಥಂಡ್ಣನ್ ಆನಿ ಉಮೇದ್ ಹ್ಯಚ್ಣಾ ಮೂಳ್ ಜಾಲ್ಯಾಲಾ ದೇವ್ ತುಮಾನಾ ಕ್ರಿಸ್ತ ಯೇಸುಲಾ ಮಿಳುನ್ ಯಾಕುಸ್ ಮನ್ ಆಸ್‌ಲ್ಯಾಲಿ ರಾಹುಂತ ಮನ್ವುನ್ ಕರುನಿ.

⁶ ಆಸಸ್ ತುಮಿ ಸಗ್ಳಿ ಯಕಾಸ್ ಸಬ್ದಾನಿ ಆಮಚ್ಣಾ ಪ್ರಭುಜಾಲ್ಯಾಲ್ಯಾ ಯೇಸುಕ್ರಿಸ್ತಾಚ್ಣಾ ಬಾ ಜಾಲ್ಯಾಲ್ಯಾ ದೇವಾಲಾ ಸ್ತುತಿ ಕರಾ.

ಯೆಹುದಿ ನಸ್‌ಲ್ಯಾಲ್ಯಾನಾ ಬರಿ ಖಬರ್

⁷ ದೇವಾಚೆ ಮೈಮೆಸಾಟೆ ಕ್ರಿಸ್ತಾನಿ ಕಸಿ ತುಮಾನಾ ಗೇತಲ್ಯಾತ ತಸಸ್ ಯಕಾಮಕಾಲಾ ಗೆವ್ವಾ

⁸ ಮೀ ತುಮಾನಾ ಸಾಂಗ್ಲೊ. ದೇವಾನಿ ಖರ ದಾವಾಯಾಸಾಟೆ ಕ್ರಿಸ್ತ್ ಯೆಹುದ್ಯಾಂಚ್ಣಾ ಸೆವಕ್ ಜಾಲ್ಯಾ ಆಸ ವಡ್ಲಾನಾ ದಿಲ್ಯಾಲ ಸಬ್ದ ಖರ ಕರಾಯಾ

* 15:3 ಕೀರ್ತನ್ 69:9

9 ಆನಿ ದೇವಾನಿ ದ್ಯಾವ್‌ತ್ಯಾಲೆ ಕರುಣೆಸಾಟಿ ಯೆಹುದ್ಯ ನಸ್‌ಲ್ಯಾಲ ತ್ಯಲಾ ಸ್ತುತಿ ಕರಾಯಾ. ಪವಿತ್ರ ಪುತಿಕಾತ್ ಆಸ ಲಿವ್‌ಲ್ಯಾ:

“ಮನ್ವುನ್ ಯೆಹುದಿ ನಸ್‌ಲ್ಯಾಲ್ಯಾ ಲೋಕಾಂಚೆ ಮದ್ಲಿ ಮೀ ತುಲಾ ಸ್ತುತಿಕರ್ತೊ. ಮೀ ತುಜಾ ನಾವಾಚ್ ಸ್ತುತಿ ಗಿತ್ ಗ್ಯಾವ್ತೊ. ”

10 ಯವ್ಜಸ್ ನ್ಹಹ ಪವಿತ್ರ ಗ್ರಂಥ ಆಸ ಸಾಂಗ್ತೆ.

ಯೆಹುದಿ ನಸ್‌ಲ್ಯಾಲಿ ತುಮಿ ದೇವಾಚಾ ಸ್ವತಾಚಾ ಲೋಕಾ ಸಂಗ ಸಂತೋಶ್ ವ್ಹವಾ!.

11 ಆನಿ ಯೆಕಿಕ್ ಪವಿತ್ರ ಗ್ರಂಥ ಆಸ ಸಾಂಗ್ತೆ:

“ಯೆಹುದಿ ನಸ್‌ಲ್ಯಾಲಿ ತುಮಿ ಸಗ್ಳಿ ಪ್ರಭುಲಾ ಸ್ತುತಿ ಕರ್ತಾಸಾ, ಸಗ್ಳಿ ಲೋಕ ಪ್ರಭುಲಾ ಸ್ತೊತ್ರ ಕರುಂತ. ”

12 ಆನಿ ಯೇಶಾಯನಿ ಆಸ ಸಾಂಗ್ತೆ:

ಇಶಾಯಚಾ ಕುಟ್ಮಾತ್ಲಿ ಯೋಕ್ ಮಾನುಸ್ ದಿಸ್ವಾರ್. ತ್ಯೊ ಯೆಹುದಿ ನಸ್‌ಲ್ಯಾಲ್ಯಾನಾ ಚಾಲ್ವಾಯಾ ಯನಾರ್. ಯೆಹುದಿ ನಸ್‌ಲ್ಯಾಲಿ ಲೋಕ ತ್ಯಚಿವ ಆಶಾ ಥೆವ್ವಾರ್. ”

13 ಆಶಾಚಾ ಮುಳ್ ಭಾಲ್ಯಾಲಾ ದೇವ್ ಇಸ್ವಾಸಾನಿ ಯತ್ಯಾಲಾ ಆನಂದ್ ಥಂಡ್ವನ್ ತುಮಾನಾ ಸಗ್ಳಾ ಗಾಹುನಿ. ತವಾ ಪವಿತ್ರತ್ಮಾಚಾ ಬಳಾನಿ ಆಶಾ ತುಮ್ಮಾತ್ ಬರ್ಪ್ವನ್ ಬಾಹಿರ್ ವ್ಹಾವ್ವಾರ್.

ಆಪ್ಲೆ ಸೇವೆಚೆ ಗುಶ್ಟಿತ್ ಪೌಲ್ ಸಗ್ಳೆ ಸಾಂಗಾಲಾ ಕಾರನ್

14 ಮಾಜಾ ಭನ್ವಿ ಭಾವ್ವಾನು, ತುಮಚಾತ್ ಬರ ಫನ್ ಬರ್‌ಲ್ಯಾ ಆನಿ ಸಗ್ಳೆ ಗಿನ್ಯಾನ್ ತುಮಾನಾ ಹಾ ಮನ್ವುನ್ ಆನಿ ಯಕಾಮಕಾಲಾ ಸಿಕ್ವಾಯಾ ಸಾಮರ್ಥ್ ತುಮಾನಾ ಹಾ ಮನ್ವುನ್ ಮನಾ ರಾವ ಹಾ.

15 ಫನ್ ಹ್ಯಾ ಪತ್ರಾತ್ ತುಮಾನಾ ಯಾದ್ ಕಾರಾಚೆ ಗುಶ್ಟಿತ್ ಥೊಡ ವಿವರನ್ ಕರುನ್ ಲಿವ್‌ಲ್ಯಾ. ಕಾ ಮಂಜೆ ದೇವಾನಿ ಮನಾ ಹ್ಯೊ ಯೋಕ್ ಅವ್ತಾತ್ ದಿಲಾ

16 ಯೆಹುದಿ ನಸ್‌ಲ್ಯಾಲ್ಯಾ ಲೋಕಾಂಚೆಸಾಟಿ ಕಾಮ್ ಕರಾಯಾ ಕ್ರಿಸ್ತ ಯೇಸುಚಾ ಸೇವಕ್ ಮನ್ವುನ್ ರಾಹ್ಯಾಲಾ ಕೇಲ್ಯಾ. ಮೀ ಯಕಾ ಯಾಜಕಾಚೇಗತ್ ದೇವಾಚಿ ಬರಿ ಖಬರ್ ಸಿಕ್ವಿಲ್ಯಾ ಆಸ ಯೆಹುದಿ

ನಸ್‌ಲ್ಯಾಲ್ಯಾನಾ ಪವಿತ್ರಾತ್ಮಾನಿ ತ್ಯಲಾ ಅರ್ಪನ್ ಕೆಲ್ಯಾಲ ಯಾಕ್ ಸ್ವಿಕಾರ್ ಕೇಲ್ಯಾಲಿ ದಿನ್ಲಿ ವ್ಹಯಾ ವ್ಹಯಿ.

17 ಮನ್ವುನ್ ಕ್ರಿಸ್ತ ಯೇಸುಚೆ ಯಕಿತ್ ಮೀ ದೇವಾಸಾಟಿ ಕರ್ತ್ಯಾಲ್ಯಾ ಕಾಮಾಚೆ ಗುಶ್ಟಿತ್ ಹೆಮ್ಮೆನಿ ಹಾ.

18 ಮಿ ಮಾಜಿ ಸ್ವತಾಚಿ ಕಾಮ ಕರೀತ್ ನಾಹಿ. ಯೆಹುದಿ ನಸ್‌ಲ್ಯಾಲ್ಯಾ ಲೋಕಾನಾ ಆಪ್ಲಿ ಸಾಂಗಲ್ಯಾ ಶಾರಕ ಭಾಲತ್ಯಾಲಿ ಕರುನ್ ಗಿಹ್ಯಾ ಕ್ರಿಸ್ತ ಮಾಜಾ ಬೊಲ್‌ನ್ಯಾನಿ ಕರ್ತುಕಿನಿ ಕೇಲ್ಯಾಲಿ ಕಾಮ ಉಗ್ಡುನ್ ಸಾಂಗ್ಲೊ.

19 ಚಮತ್ಕಾರಾಚಾ ಕಾಮಾಚೆ ಬಳ್ ಆನಿ ದೇವಾಚಾ ಆತ್ಮಾಚಾ ಬಳಾಚಾ ನಿಮಿತಾನಿ ಮಾಜಿಪ್ಲಿ ಪೂರ್ನ್ ಕೇಲ. ಮನ್ವುನ್ ಯೆರುಸಲಮೇತ್ಲಿ ಇಲ್ಲುರಿಕಾಚೆ ಸರ್ಬಾರ್ ಕ್ರಿಸ್ತಾಚಿ ಬರಿ ಖಬರ್ ಸಾಂಗಾಚೆ ಕಾಮ್ ಪೂರ್ನ್ ಕೇಲ.

20 ಕ್ರಿಸ್ತಾಚೆ ಗುಶ್ಟಿತ್ ಲೋಕಾಂಚಾನಿ ಕಂದಿಸ್ ಐಕ್‌ಲ್ಯಾ ನಸ್‌ಲ್ಯಾ ಖನ್ಯತಿತ್ಲಿ ಬರಿ ಖಬರ್ ಸಿಕ್ವಾಯಾ ಮೀ ಖಾಯಿಮ್ ತಯಾರ್ ಹಾ. ಮನ್ವುನ್ ದುಸರ್ಯಾನಿ ಗ್ಯಾತ್‌ಲ್ಯಾಲ್ಯಾ ಪಾಯಾವ ಬಾಂದಾಯಾ ಮಿ ಮನ್ ಕರಿತ್ ನಾಹಿ.

21 ಫನ್ ಹ್ಯಾಸಾಹಿತ್ ಪವಿತ್ರ ಗ್ರಂಥಾತ್ ಲಿವ್‌ಲ್ಯಾ:

“ತ್ಯಚೆ ಗುಶ್ಟಿತ್ ಐಕತ್ ನಸ್‌ಲ್ಯಾಲಿ ಲೋಕ ತ್ಯಲಾ ಬಗ್ವಾರ್.

ತ್ಯಚೆ ಗುಶ್ಟಿತ್ ಐಕ್‌ಲ್ಯಾನಸ್‌ಲ್ಯಾಲಿ ಲೋಕ ತ್ಯಲಾ ಸಮಜುನ್ ಗೆನಾರ್.”

ರೋಮಾತ್ ಜಾಯಾ ಪೌಲಾಚಿ ಯವಜ್ಞಾ

22 ಹ್ಯಾ ಕಾರ್ನಾನಿಸ್ ತುಮ್ಮಿಪ ಯವುನಾಹಿ ಆಸ ಮನಾ ಖುಬ್ ಪಾಪ್ಲಿ ಅಡಚನ್ ಆಲಿ.

23 ಫನ್ ಆತಾ ಹ್ಯಾ ಪ್ರಾಂಥ್ಯಾತ್ ಮೀ ಕರ್ತ್ಯಾಲಿ ಸೇವಾ ಕರುನ್ ಸುಪಿವ್ಲೆ ಆನಿ ಖುಬ್ ವರ್ಸಾದರ್ ಮನಾ ತುಮ್ಮಿಪ ಯಯಾ ಹಾವುಸ್ ಹುತಿ ಮನ್ವುನ್.

24 ಮೀ ಸ್ಪೆನಿತ್ ಜಾತಾನಾ ತುಮಾನಾ ಬೆರೊ. ವ್ಹಯ್ ಮೀ ಸ್ಪೆನ್ ದೆಶೆತ್ ಜಾತಾನಾ ತುಮಾನಾ ಗೆಥೊ. ಥೊಡ ದಿಸ್ ತುಮ್ಮಿ ಸಂಗ

ಸಂತೋಶಾನಿ ರಾಧೊ ಮನ್ವನ್ ಆಶಾ ಮನಾ ಹಾ. ನಂತರ್ ತುಮಿ ಮಾಜಾ ಜಾನ್ಯಾಲಾ ಮಜತ್ ಕರ್ಶಿಲಾ ಮನ್ವನ್ ಮನಾ ಆಶಾ ಹಾ.

25 ಆತಾ ಮೀ ದೇವಾಚಾ ಲೋಕಾಂಚಿ ಸೇವಾ ಕರಾಯಾ ಯೇರುಸಲೇಮಿತ್ ಜಾತ್ಯೊ

26 ಮಕೆದೊನ್ಯಾತ್ಲಿ ಆನಿ ಅಖಾಯಾಚೆ ಸಭೆತ್ಲಿ ಇಸ್ವಾಸಿ ಲೋಕಾಂಚಾನಿ ಯೆರುಸಲೇಮ್ ಸಭೆಚಾ ಗರೀಬ್ ಲೋಕಾನಾ ಮಜತ್ ಕರಾಯಾ ವ್ಹಯಿ ಮನ್ವನ್ ನಿರ್ದಾರ್ ಕೆಲ್ಯಾ

27 ಮಕೆದೊನಿಯಾ ಆನಿ ಅಖಾಯಾತ್ಲಿ ಇಸ್ವಾಸಿ ಸ್ವತಾಚಾ ಮನಾನಿ ಹೀ ಕಾಮ ಕರ್ತಾತ್. ಕಾ ಮಂಜೆ ಯೆಹುದಿ ಯೆಹುದಿ ನಸ್‌ಲ್ಯಾಲ್ಯಾಂಚೆ ಸಂಗ ಆತ್ಮಿಕ್ ಆಶಿರ್ವಾದ್ ಗೆತಲ್ಯಾ ಯೆಹುದಿನಾ ಮಜತ್ ವ್ಹಯಾ ಯೆಹುದಿ ನಸ್‌ಲ್ಯಾಲಿ ಸಾಮ್ರಾಚಾ ರುಪಾತ್ ಆಪ್ಲ ಆಶಿರ್ವಾದ್ ಯೆಹುದಿ ಸಂಗ ವಾಟುನ್ ಗಿಹ್ಯಾ ಹಾತ್ತ್.

28 ಯೇರುಸಲೇಮಿತ್ ಗರೀಬ್ ಲೋಕಾಂಚೆ ಸಾಟಿ ದಿಲ್ಯಾಲ ಹೇ ಪೈಸ ಸಗ್ಳು ಜಪುನ್ ತ್ಯನಾ ಪುಚಿವ್‌ಲ್ಯಾವ ಮೀ ಸ್ಪೆನಿತ್ ಜಾನಾರ್.

ಮೀ ಸ್ಪೆನಿತ್ ಜಾತಾನಾ ತುಮಾನಾ ಬೆರೊ.

29 ಮಿ ತುಮ್ಮಿಪ ಯತಾನಾ ಕ್ರಿಸ್ತಾಚಾ ಖುಬ್ ಆಶಿರ್ವಾದ್ ಗಿಹುನ್ ತುಮಚಿಪ ಯತೊ.

30 ಭನ್ವಿ ಭಾವ್ವಾನ್, ತುಮಿ ಮಾಜಿಸಾಟಿ ದೇವಾಪ ಮಾಗ್ನ ಕರ್ತಾನಾ ಆಪ್ಲೆ ಸೇವೆಲಾ ಮಜತ್ ಕರಾಯಾ ವ್ಹಯಿ ಮನ್ವನ್ ಮೀ ತುಮಚಿಪ ಇನಂತಿ ಕರ್ತೊ. ಮಾಜಾ ಪ್ರಭು ಜಾಲ್ಯಾಲ್ಯಾ ಯೇಸುಚಾ ನಿಮ್ನಾನಿ ಪವಿತ್ರಾತ್ಮಾನಿ ಮನಾ ದೇತ್ಯಾಲೆ ಮಾಯೆಚಾ ನಿಮ್ನಾನಿ ತುಮಿ ಮಾಗ್ನ ಕರಾ.

31 ದೆವಾನಿ ಮನಾ ಯುದಾಯಾತಲ್ಯಾ ಇಸ್ವಾಸ್ ನಸ್‌ಲ್ಯಾಲ್ಯಾಂಚಾ ಹಾತಾತ್ಲಿ ಮನಾ ಪಾರ್ ಕರಾಯಾ. ಮೀ ಯೇರುಸಲೇಮಿತ್ ಗಿಹುನ್ ಜಾತ್ಯಾಲಿ ಹೇ ಮಜತಿಚೆ ಪೈಸ ತಿಥ ಆಸ್‌ಲ್ಯಾಲ್ಯಾ ದೇವಾಚಿ ಲೊಕ ಗಿಹುಂತ ಮನ್ವನ್ ಮಾಗ್ನ ಕರಾ.

32 ಆಸಾ ಮಿ ದೇವಾಚಾ ಮನಾಚೆಗತ್ ಆನಂದಾನಿ ಯವುನ್ ತುಮ್ಮಿ ಸಂಗ ಯವುನ್ ಇಸ್ರಾಂತಿ ಗೆನ್ನಾರ್.

33 ಸಮಾದಾನಾಚಾ ಜಾಲ್ಯಾಲಾ ದೇವ್ ತುಮ್ಮೆ ಸಗ್ಳಾಂಚೆ ಸಂಗ ರಾಹುನಿ. ಆಮೆನ್.

16

ಸ್ವತಾಚಾ ನಮಸ್ಕಾರ್

1 ಕ್ರಿಸ್ತಾಪ ಆಮ್ಚಿ ಭನ್ ಜಾಲ್ಯಾಲಿ ಪೊಯಿಬೆಲಾ ಮೀ ತುಮಾನಾ ಶಿಫಾರಸ್ ಕರ್ತೊ. ಹೀ ಕೆಂಕ್ರೆ ಪೆರತ್ ಸೇವೆ ಕರ್ತಾಲಿ ಜಾಲೆ.

2 ತುಮಿ ತೀಲಾ ಪ್ರಬುಚಾ ನಾವಾನಿ ಗೆವ್ವಾ ದೇವಾಚಾ ಲೋಕಾಂಚೆ ಶಾರ್ಕ ಹಿಲಾ ಗೆವ್ವಾ ತಿಲಾ ವ್ಹಯಿ ಜಾಲ್ಯಾಲಿ ಮಜತ್ ಸಗ್ಳಿ ಕರಾ. ತಿ ಮನಾ ಆನಿ ಖುಬ್ ಲೊಕೊನಾ ಯೇಕ್ ಘಾಂಗ್ಲಿ ಸುಪ್ತೆನ್ ಜಾಲೆ.

3 ಪ್ರಿಸ್ಕಿಲ್ಲಾಲಾ ಆನಿ ಅಕ್ವಿಲಾಲಾ ಮಾಜಾ ನಮಸ್ಕಾರ್ ಸಾಂಗಾ. ತ್ಯಾ ಕ್ರಿಸ್ತ ಯೇಸುಪ ಮಾಜಿಸಂಗ ಸೇವಾ ಕರ್ತಾಲಾ ಜಾಲ್ಯಾತಾ.

4 ಮಾಜಿ ಸಾಟಿ ಆಪ್ಲಾ ಜೀವುಸ್ ಘಾತ್ ವ್ಹಯಿಸಾ ಕೇಲಾ. ಮೀ ತ್ಯನಾ ಉಪ್ಕಾರಾತ್ ಯಾದ್ ಕರ್ತೊ. ನಿಸ್ಲಾ ಮೀ ತ್ಯವ್ಡಾಸ್ ನವ್ಲ ಯೆಹುದಿ ನಸ್ಲಾಲ್ ಸಭೆತ್ಲಿ ಸಗ್ಳಿ ತ್ಯನಾ ಉಪ್ಕಾರ್ ಕರ್ತಾತ

5 ತ್ಯವ್ಡಾಸ್ ನವ್ಲ ತ್ಯಂಚಾ ಗರ್ಜಾತ್ ಮಿಳುನ್ ಯತ್ಯಾಲೆ ಸಭೆತ್ಲ್ಯಾನಾ ಮಾಜಾ ನಮಸ್ಕಾರ್. ಮಾಜಾ ಮಾಯೆಚಾ ಸುಪ್ತಿ ಜಾಲ್ಯಾಲಾ ಎಪ್ಪೆನೆತಲಾ ಮಾಜಾ ನಮಸ್ಕಾರ್. ಆಶಾ ಸಿಮತ್ ಕ್ರಿಸ್ತಾವ ಇಸ್ವಾಸ್ ಥೆವ್‌ಲ್ಯಾಲ್ಯಾತ್ ತ್ಯೊಸ್ ಪೈಲಾ ಜಾಲ್ಯಾ

6 ಮರಿಯಾಲಾ ಮಾಜಾ ನಮಸ್ಕಾರ್. ತಿನಿ ತುಮ್ಮಿಸಾಟಿ ಖುಬ್ ಕಶ್ಟಾನಿ ಕಾಮ್ ಕೇಲ.

7 ಆಂದ್ರೋನಿಕಾಲಾ ಆನಿ ಯೂನ್ಯನಾಲಾ ಸಾಹಿತ್ ಮಾಜಾ ನಮಸ್ಕಾರ್. ತೇ ಮಾಜಾ ಕುಳಾತ್ಲಿ ಜಾಲ್ಯಾತ. ತ್ಯವ್ಡಾಸ್ ನವ್ಲ ತೇ ಮಾಜಿಸಂಗ ತುರುಂಗಾತ್ ಹುತ್ತ. ಅಪೋಸ್ತಲಾನಾ ಸಾಹಿತ್ ಘಾಂಗ್ಲಾ ರಾವ ಹುತ್ತ. ತೇ ಮಾಜೆ ಆಂದಿಸ್ ಕ್ರಿಸ್ತಾಚೆ ಇಸ್ವಾಸಿ ಜಾಲ್ಯಾತ.

8 ಪ್ರಭುಪ ಮಾಜೆ ಮಾಯೆಚಾ ಸುಪ್ತಿ ಜಾಲ್ಯಾಲಾ ಅಂಫ್ಲಿಯಾತಾಲಾ ಮಾಜಾ ನಮಸ್ಕಾರ್.

9 ಉರ್ಬಾನಾಲಾ ಸಾಹಿತ್ ಮಾಜಾ ನಮಸ್ಕಾರ್. ತ್ಯೊ ಕ್ರಿಸ್ತಾ ಸಾಟಿ ಮಾಜೆ ಸಂಗ ಕಾಮ್ದಾರ್ ಜಾಲ್ಯಾ ಆನಿ ಮಾಜಾ ಮಾಯೆಚಾ ಸುಪ್ತಿ ಜಾಲ್ಯಾಲಾ ಸ್ತಾಖೊನಾಲಾ ಮಾಜಾ ನಮಸ್ಕಾರ್.

10 ಅಪೆಲ್ಲಾಲಾ ಮಾಜಾ ನಮಸ್ಕಾರ್. ತ್ಯೊ ಕ್ರಿಸ್ತಾಲಾ ಇಸ್ವಾಸಾಲಾ ಲಾಯಕ್ ಜಾಲ್ಯಾ ಮನ್ವುನ್ ದಾವುನ್ ದಿಲ್ಯಾ ಅರಿಸ್ತೆಬೂಲಾಚಾ ಕುಟ್ಮಾತ್ ರಾಧ್ಯಾಲ್ಯಾ ಸಗ್ಳಾನ್ಯಾ ಮಾಜಾ ನಮಸ್ಕಾರ್.

11 ಮಾಜಾ ಕುಳಾತ್ಲಾ ಜಾಲ್ಯಾಲ್ಯಾ ಹೆರೊಡಿಯೊನಾಲಾಬಿ ಆನಿ ಪ್ರಭುಚಾ ಜಾಲ್ಯಾಲ್ಯಾ ನಾರ್ಕಿಸಾಚಾ ಕುಟ್ಮಾತ್ಲಾ ಸಗ್ಳಾನ್ಯಾಬಿ ಮಾಜಾ ನಮಸ್ಕಾರ್.

12 ತ್ರುಪೈನಿಲಾ ತ್ರುಪೋಸನಿಲಾಬಿ ಮಾಜಾ ನಮಸ್ಕಾರ್.

ತ್ಯಾ ಪ್ರಭುಸಾಟಿ ಖುಬ್ ತರಾಸಾನಿ ಕಾಮ್ ಕರ್ತ್ಯಾಲ್ಯಾ ಜಾಲ್ಯಾತಾ.

ಆನಿ ಮಾಜೆ ಮಾಯೆಚೆ ಪೆರ್ಸೆಸನಿಲಾಬಿ ಮಾಜಾ ನಮಸ್ಕಾರ್.

ತಿನಿಬಿ ಪ್ರಭುಸಾಟಿ ಖುಬ್ ತರಾಸ್ ಗಿಹುನ್ ಕಾಮ ಕೇಲ್ಯಾತ.

13 ರೂಫಾಲಾ ಮಾಜಾ ನಮಸ್ಕಾರ್. ತ್ಯೊ ಪ್ರಭುಪ ಖುಬ್ ಚಾಂಗ್ಲೆ

ಕಾಮ್ ಕರ್ತ್ಯಾಲಾ. ಆನಿ ತ್ಯಚೆ ಆಯಿಲಾಬಿ ಮಾಜಾ ನಮಸ್ಕಾರ್.

ತಿನಿ ಮನಾ ಆಪಲ್ಯಾ ಸ್ವತಾಚಾ ಲೆಕಾಚೆಗತ್ ಬಗ್ಲಾ.

14 ಅಸುಂಕ್ರಿತಾಲಾ ಪೆಗೊನಾಲಾ ಹೆರ್ಮೆಯಾಲಾ ಪತ್ರೋಬಾಲಾ

ಹೆರ್ಮಾನಾಲಾ ಆನಿ ತ್ಯಂಚಿ ಸಂಗ ಆಸಲ್ಯಾಲ್ಯಾ ಸಗ್ಳಾ ಇಸ್ವಾಸಿ

ಬಾವ್ತಾನಾಬಿ ಮಾಜಾ ನಮಸ್ಕಾರ್.

15 ಪಿಲೊಲೋಗಾಲಾ ಯೂಲ್ಯೆಲಾ ನೆರ್ಯಲಾ ತ್ಯಚೆ ಭನ್ನಿಲಾಬಿ

ಆನಿ ಒಲುಂಪಾಲಾ ಆನಿ ತ್ಯಂಚಿಸಂಗ ಆಸಲ್ಯಾಲ್ಯಾ ದೇವಾಚಾ

ಲೋಕಾನಾ ಸಾಹಿತ್ ಮಾಜಾ ನಮಸ್ಕಾರ್.

16 ತುಮಿ ಯಕಾಮಕಾಲಾ ಮಾಯೆನಿ ಬೆರಾನಾ ನಮಸ್ಕಾರ್ ಕರಾ.

ಕ್ರಿಸ್ತಾಚೆ ಸಬೆಚಿ ಸಗ್ಳಿ ತುಮಾನಾ ನಮಸ್ಕಾರ್ ಸಾಂಗತ್ಯಾತ.

ಸರ್ತ್ಯಾ ಬೊಲ್ಯಾ

17 ಬಾವ್ತಾ ಬನ್ನಿನ್, ತುಮ್ಚಾತ್ ದುಯಿ ಗ್ಯಾಲತ್ಯಾಲ್ಯಾ ಲೊಕಾಂಚೆ ಗುಸ್ತಿತ್ ತುಮಿ ಖುಬ್ ಜಾಗ್ರುತ್ ರಾಹ್ಯಾ ವ್ಹಯಿಸಾ ಆನಿ ದಿಸರ್ಯಾಂಚಾ

ಇಸ್ವಾನ್ ಹಾಳ್ ಕರ್ತ್ಯಾಲ್ಯಾಂಚೆ ಗುಸ್ತಿತ್ ಖುಬ್ ಜಾಗ್ರತ್ ರಾವ್ತಾ. ತುಮಿ ಸಿಕ್‌ಲ್ಯಾಲ್ಯಾ ಸಿಕ್ಳೆನಾಲಾ ತೀ ವೈರಿ ಜಾಲ್ಯಾತ. ತುಮಿ ತ್ಯಂಚಿಷ್ಟಿ ದುರ್ ರಾವಾ ಮನ್ವನ್ ಇನಂತಿ ಕರ್ತೊ.

18 ಕಾ ಮಂಜೆ ತಸ್‌ಲ್ಯಾ ಖನ್ನತಿ ಕರ್ತ್ಯಾಲಿ ಲೊಕ ಆಮ್ಚಾ ಪ್ರಭು ಕ್ರಿಸ್ತಾಚಿ ಸೆವೆ ಕರಿತ್ನಾಹಿತ. ತೀ ನಿಸ್ಥಿ ಆಪ್‌ಲ್ಯಾ ಪೋಟಾಸಾಟಿ ಹಿ ಕಾಮ ಕರಿತ್ ಹಾತ. ಬುರ್ಸ ರಾವ ನಸ್‌ಲ್ಯಾಲ್ಯಾ ಲೊಕಾಂಚಾ ಮನಾಂಚಾ ಮೋಸ್ ಕರಾಯಾ ತಿ ನವ ನಾಚುಕ್ ಸಬ್ ಬೊಲ್ವಾತ ಆನಿ ತೊಂಡಾ ಮೊರ್ಹ ವವ್ಯಾಳುನ್ ಬೊಲ್‌ತ್ಯಾತ.

19 ತುಮಾಚ್ ಕರ್ನ ಸಗಲ್ಯಾ ಇಸ್ವಾಸಿನಾ ಸಮಾಜ್‌ಲ್ಯಾ ಮನ್ವನ್ ತುಮ್ಚೆ ಗುಸ್ತಿತ್ ಮನಾ ಖುಬ್ ಸಂತೊಸ್ ವ್ಹತ್ಯೊ ಫನ್ ಚಾಂಗ್ಲೆ ಗುಸ್ತಿನಾ ತುಮಿ ಶಾನ ಹ್ವಪುನ್ ರಾಹ್ಯಾ ವ್ಹಯಿಸಾ ಮನ್ವನ್ ಆನಿ ಬುರ್ಶಾ ಗುಸ್ತಿ ರಾವ್ಯಾ ನಸ್‌ಲ್ಯಾಲ ವ್ಹಪುನ್ ರಾಹ್ಯಾ ವ್ಹಯಿಸಾ ಮನ್ವನ್ ಮೀ ಮನ್ ಕರ್ತೊ.

20 ಆನಿ ಶಾಂತಿ ದೆತ್ಯಾಲಾ ದೆವ್ ಬಿಗಿನಿ ಸೈತಾನಾಲಾ ಪಾಯಾ ಬುಡಿ ಗಾಲ್ವುನ್ ತುಡುವುನ್ ಟ್ಯಾಕ್ವಾರ್,

ಆಮ್‌ಚಾ ಪ್ರಭು ಯೇಸು ಕ್ರಿಸ್ತಾಚಿ ಕ್ರಪಾ ತುಮ್ಚಿ ಸಂಗ ರಾಹುನಿ.

21 ಮಾಜೆ ಸಂಗ ಕಾಮ್ ಕರ್ತ್ಯಾಲಾ ತಿಮೊಥೆ ಆನಿ ಮಾಜೆ ಸಂಗಚ್ ಯೆಹುದಿ ಜಾಲ್ಯಾಲ ಲೂಕ್ಯ ಯಾಸೊನ್ ಆನಿ ಸೋಸಿಪತ್ರ ಹ್ಯಂಚಾನಿ ತುಮಾನಾ ನಮಸ್ಕಾರ್ ಸಾಂಗ್‌ಲ್ಯಾ.

22 ಪೌಲ್ ಸಾಂಗತ್ಯಾಲ್ಯಾ ಗುಸ್ತಿ ಲಿವತ್ಯಾಲಾ ತೆರ್ತೆನ್ ಮಂತ್ಯಾಲಾ ಮೀ ಸಾಹಿತ್ ತುಮಾನಾ ಪ್ರಭುಪ ನಮಸ್ಕಾರ್ ಕರ್ತೊ.

23 ಗಾಯಾ ಮಾಜೆ ದೆಕರೆಕಿ ಕರ್ತೊ. ಆನಿ ಸಬೆಚಾ ಮಿಳನ್ಯಾಸಾಟಿ ತ್ಯಚ್ ಘರುಸ್ ವಾಫರ್ತ್ಯಾವ್. ತ್ಯೊ ಸಾಹಿತ್ ತುಮಾನಾ ನಮಸ್ಕಾರ್ ಸಾಂಗ್‌ತ್ಯೊ ಹೆ ಪೆರಚಾ ಖಜಾಂನ್ಸಿ ಎರಸ್ತ ಆನಿ ಆಮಚ್ಕಾ ಇಸ್ವಾಸಿ ಬಾಹು ಕ್ವರ್ತ ತುಮಾನಾ ನಮಸ್ಕಾರ್ ಸಾಂಗ್‌ತ್ಯಾತ.

24 “ಆಮಚ್ಚಾ ಪ್ರಭು ಜ್ಞಾಲ್ಯಾಲ್ಯಾ ಯೇಸು ಕ್ರಿಸ್ತಾಚಿ ಕುಪಾ ತುಮ್ಮಿ ಸಗಲ್ಯಾಂಚಿಸಂಗ ರಾಹುನಿ. ಆಮೆನ್. ” *

ವವ್ಯಾಳಾಚ್ ಸರ್ತ ಮಾಗ್ನ್

25 ದೇವಾಲಾ ಮೈಮೆ ಹ್ವವುನಿ. ಯೇಸು ಕ್ರಿಸ್ತಾಚೆ ಗುಶ್ಟಿತ್ ಮಿ ಸಾಂಗ್ಲ್ಯಾಲೆ ಬರೆ ಖಬರಿನಿ ಆನಿ ಮಾಗ್ಲ್ಯಾ ಕಾಲಾ ದರ್ನಿ ದಡ್ವನ್ ಥೆವ್ಲ್ಯಾಲೆ ಗುಟ್ ಆತಾ ಉಜಿಡಾಸ್ ಯವುನ್ ತುಮ್ಮಾ ಇಸ್ವಾಸಾತ್ ತುಮಿ ಘಟ್ ಉಬಿ ರಾಹ್ಯಾ ತ್ಯೊ ಶಕ್ತ ಜ್ಞಾಲ್ಯಾ.

26 ಫನ್ ಆತಾ ಖಾಯಿಮ್ಮಾ ದೇವಾಚಿ ಆಜ್ಞಾ ಆನಿ ಪ್ರವಾಂದಿಂಚಾ ಲಿವ್ನ್ಯಾನಿ ತ್ಯೆ ಖರ ಸಗ್ಳೆ ದೆಶೆತ್ಲಿ ಇಸ್ವಾಸ್ ಥೆವಾಸಾಟಿ ಆನಿ ವಾಕುನ್ ಚಾಲಾಯಾಸಾಟಿ ದ್ಯಾವ್ಲ್ಯಾ.

27 ಯಕ್ಲಾಸ್ ಜ್ಞಾನಿ ಜ್ಞಾಲ್ಯಾಲ್ಯಾ ದೇವಾಲಾ ಯೇಸುಕ್ರಿಸ್ತಾಚ್ಚಿ ಖಾಯಿಮ್ ಮೈಮೆ ವ್ಹವುನಿ. ಆಮೆನ್.

* 16:24 ಥೊಡ್ಯಾಗ್ರೀಕ್ ಪ್ರತೀತ್ ಹ್ಯೆ ವಚನ್ ಗಾವತ್ ನಾಹಿ

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922